

**NATIONAL ASSEMBLY OF
SEYCHELLES**

Tuesday 08th March 2022

The Assembly met at 09.01 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab ki dan lasal e *staff* nou sekretarya ki akonpanyy nou ozordi. Bonzour tou manm piblik ki pe swiv nou.

Mon remarke ki bann Manm Lopozisyon pa dan lasal bomaten. Mon oule enform bann Manm ek piblik ki mon napa okenn lendikasyon aköz sa i le ka. Ki'n arive. Ki rezon zot pa dan lasal.

Alor Manm ek piblik, mon oule pran lokazyon nou premye rankont ordiner, apre Mesaz lo Leta Lanasyon pou fer en ladres lo travay Lasanble.

Mon lentansyon se tou senpleman pour met an valer nou rol koman en lenstitisyon Gouvernman, avek en kontrandi lo travay ki nou'n fer dan sa lannen ki'n pase, pou regard en pe sa lannen ki devan nou e tous en pe lo bann size ki konsern nou.

Mon fer sa prensipalman pour met Lasanble en pe plis dan konesans piblik. Mon oule ki piblik Seselwa, i konn pli byen ki Lasanble pe fer e ki diferans i fer.

Lannen 2021 in en lannen aktiv pour Lasanble Nasyonal, malgre enteripsyon e sirkonstans spesyal ki COVID-19 in anmennen. Mon annan plezir note ki COVID in fer nou bezwen adapte, me i pa'n boulders nou bokou.

In annan de lokazyon kot nou'n sispann Lasanble pour detruwa zour, me an zeneral nou'n reste entak e nou'n kontinyen travay.

Mon konvenki ki sa i aköz nou'n reponn boner lapel pour proteksyon, enkli pran vaksen e swiv bann konsiny ki Lotorite Lasante in donner.

Si in napa lensidan mazer dan Lasanble, mon mazine ki i osi aköz bann Manm in responsab dan evit sirkonstans ki ti kapab met zot a risk.

Lo sa, mon oule dir ki i enportan ki nou dan Lasanble nou toultan donn legzanp. Nou annan lasans ki piblik i swiv nou tre byen, e sa i donn nou loportinite azir konman model dan nou konportman e dan nou parol.

Mon pran lokazyon pou dir mersi Minister Lasante e

sirtou bann ki'n lo devan dan kanpany kont *COVID*, espesyalman kan zot in asiste nou isi direkteman.

Zot in fer tes kot nou kan nou ti demande. *COVID* in fors lemonn antye sanz serten fason, e sa i enkli bann Parlman partou dan lemonn.

Parey bokou lorganizasyon, nou'n aprann fer miting vertyel ki'n ranplas bann rankont fas-a-fas e fotespere nou a kapab kontinyen servi sa pou ranforsi nou travay.

Me la, lo sa size, mon espere ki sa i dernyen fwa ki mon bezwen nonm *COVID-19* dan en diskour. Nou konnen pou toultan annan defi selman, e difikilte ki kapab afekte nou.

I annan deza sityasyon *Ukraine* ki pou sertenman anmenn nouvo difikilte pour nou lekonomi. Si i annan reperkisyon pour nou pei, i pou osi afekte nou Lasanble.

La mon eksprim mon santiman latristes lo sa sityasyon ki'n devlope dan *Ukraine*. I sagrinan pou war en nouvo lager devlope dan en parti lemonn.

Lorganizasyon enternasyonal ki nou Manm ladan, *International Parliamentary Union*, in fer sorti en mesaz ki deplor sa sityasyon

e kondann aksyon militer kont en Pei Souvren.

In eksprim solidarite avek Parlman Ikrenyen ki osi en Manm sa lorganizasyon. Mon donn mon sipor pour sa deklarasyon. Lannen 2021 ti premye lannen konplet travay Setyenm Lasanble.

Nou'n fer bokou. Nou'n annan 104 zour Lasanble in rankontre an sesyon plenyer, bokou in bann long zournen ki'n al ziskan tar. Nou'n pas 70 Prozedlwa, plis ki dan bann lannen presedan.

Manm in anmenn 122 kestyon pour bann Minis e tou Minis in prezan dan Lasanble pou reponn. Lo kote Mosyon in annan 18 enkli lo bann Trete Enternasyonal.

Pour premye fwa dan listwar Lasanble, nou'n konsider e pas 2 Bidze nasyonal, premye an Zanvye pour 2021 e dezyenm an Novanm/Desanm pour lannen 2022.

Anliny avek koutim, nou'n pas bokou letan lo tou lede Bidze pour demann kestyon e klarifikasyon, me osi pou fer komanter. E sa in permet piblik Seselwa konn bokou lo programm Gouvernman, ki i pe antreprann dan sa 2 lannen respektif e sirtou ki mannyer i pou servi larzan Leta.

Mon persyade ki sa travay i fer bokou pou enfliyans sistenm kontrol finansyer ki Gouvernman i annan. Nou'n annan osi 2 ladres par Prezidan Larepiblik, enn pour Mesaz lo Leta Lanasyon 2021 e lot pou mark 1an son Gouvernman, ki Prezidan Ramkalawan ti delivre an Oktob.

Mon remerisi Prezidan e bann Minis, pour ki zot in zwenn nou pour ranpli nou bann latas konstitisyonnèl.

Bann diskour parey mesaz lo Leta Lanasyon in permet nou piblik konnen ki mannyer zot dirizan pe war sityasyon dan pei e dan ki direksyon zot krwar nou devret ale. E bann Manm in donn zot larepons.

Pour komans nou travay pou sa lannen, nou'n ekout larepons bann Manm lo Mesaz Leta Lanasyon pou 2022. Mon remerisye bann Manm pour zot komantr e partisipasyon an repons, ki nou fek terminen avek semenn pase.

Bann sesyon keston, enkli bann *Private Notice Question* sorti kot *Leader* Lopozisyon, ki'n annan preski sak semen ki Lasanble in an sesyon, in permet nou met o kler bann sityasyon ki devlope, bann size ki lev konsern.

Sityasyon lasante, lord ek sekirite, sirkonstans ekonomik,

nou bann lendistri prensipal parey lapes, tourizm, lagrikiltir, e osi bann size lanvironnman e lozman, tousala in bann size ki'n ganny eklersi atraver keston.

Sa travay anmenn keston pour Minis i ganny elarzi par posibilite pour bann Minis oubyen Lotorite Gouvernman vin fer *statement* dan Lasanble ler zot santi ki i neser, pour met en size a latasyon Lasanble e atraver li, pou piblik.

Lannen pase nou ti annan *statement* lo *Air Seychelles* par egzanp, ki'n fer bokou pou eklersi sa sityasyon, in permet bann Manm eksprim zot konsern e met zot pwen pou konsiderasyon.

Mon persyade ki sa in ede omwen pour enfliyans lafason ki desizyon in ganny pran, e mannyer sityasyon in ganny zere.

Pli tar ozordi, nou pou annan en *statement* lo lenplikasyon lager dan *Ukraine* par Minis Finans. Nou ekspekte annan byento lezot *statement*, enn lo nouvo Polisi pour Later ek Lakaz, e tousala i bann size ki konsern Seselwa.

Mon espere ki sa bann sesyon i a ede eklersi bann sirkonstans otour sa bann size.

Pli gran parti nou letan dan Lasanble, i lo nou rol

Lezislatif. Nou en pei *rule of law*, e alor sa travay i en mayon fondamantal dan lafason ki nou pei i fonksyonnen.

Travay ki nou'n fer lo bann Lalwa dan sa lannen ki'n pase in fer en kantite pou met azour nou kad legal. Plizyer dan sa bann Lalwa in rektifye Lezislasyon ki'n la depi lontan, menm depi letan kolonyal.

Revwar e refer bann Lalwa, e anmenn nouvo kot i nesaser, in permet nou sistenm legal reponn pli byen a bann bezwen ki nou fer fas avek ozordi.

Ler nou repas lo bann Lalwa ki'n vin devan nou, nou war ki nou'n fer en gran kontribisyon dan met bann regleman kontrol lo sekter finansyel, pour anmenn li anliny avek standar enternasyonal.

In konsern bann Lalwa ki'n anmenn plis latransparans dan ki mannyer bann lenstitisyon finansyel i fer zot travay, fer deklarasyon e raport lo zot tranzaksyon, tousala avek bi pou anpes bann lofans tel ki trafik drog, trafik zarm, blansisaz larzan, frod e koripsyon.

Bokou Lezislasyon in vin apre ki nou pei in fer fas avek menas sanksyon bann lorganizasyon pei devlope ki

kontrol sistenm finansyer enternasyonal.

Koman en pti pei i enportan pour nou fer sa bann revizyon, aköz nou depan lo fonksyonman sa bann lorganizasyon enternasyonal.

Defayans parey in ganny fer sorti dan Lasanble, i anmenn risk ki nou bann tranzaksyon finansyer i a ganny bloke avek reperkisyon serye pou nou komers, nou bann lendistri, lenvestisman enternasyonal, e byensir byennet nou sitwayen.

Lezot Lezislasyon in tous lo plizyer size sosyal, lo drwa imen, lo Kod Penal, lo Kod Sivil, lo proteksyon lanvironnman, lo lorganizasyon travay Gouvernman parey kreasyon Lazans Lenfrastriktir.

Tousala bann size enportan pour nou pei. I mon swe ki nou Lasanble i a reste touzour relevan fas a bann bezwen nasyonal, e dan sa konteks nou pare pou antreprann en gro lo Lezislasyon sa lannen.

Deza i annan 7 morso Lezislasyon mazer ki pe atann nou, e ki nou pou komans konsidere toudswit. Sa i enkli Lalwa lo bann rezerv natirel, lo proteksyon konsonmater, lo ledikasyon avanse e lezot size.

Nou osi pare pou reponn lapel Komisyoner Drwa Imen, Ziz Bernardin Renaud, pour fasilite akse popilasyon avek Lalwa. Nou kapab regard avek lezot lenstitisyon parey Zidisyer, pou war ki mannyer nou kapab fer sa.

A kote bann Lalwa, i annan bann Trete enternasyonal, Konvansyon oubyen lagreman ki i nou responsabilite pour ratifye avan ki i antre dan lobligasyon pou nou pei.

Sa bann tel lenstriman i ranforsi nou bann Lalwa. Lannen pase nou'n adopte bann lagreman lo drwa zanfan, lo komers zis ensidswit, ki'n met nou anliny avek mezir enternasyonal e ki ranforsi korperasyon miltilateral.

Tou sa la i permet nou pei reste an bon pozisyon lo bann Lendeks devlopman. Avek Komite Lasanble ki pas an revi Lalwa an preparasyon pour Lasanble, e sa se *Scrutiny of Bills Committee*, nou pe regard bann metod travay ki kapab fer proses pas Lalwa pli efikas dan Lasanble.

Bills Committee i enn nou bann Komite Lasanble ki'n tre aktiv, e mon remersye zot pour zot travay. Mon a osi not travay lezot Komite dan Lasanble, ki

enplik Manm e osi *personnel* nou sekretarya.

Travay Komite i en lapse enportan dan biznes Lasanble. Zot travay i ganny fer dan letan kot nou pa dan sesyon, souvan pandan poz dezennen, oubyen dan bann zour ki napa *sitting* alor piblik i ava apresye ki i annan travay ki ganny fer pandan letan ki nou pa devan zot lo televizyon.

Travay Komite nou kapab plas dan 2 kategori. Premye i annan bann Komite ki konsernen avek Lasanble li menm, tel ki *Assembly Business Committee* ki aranz program travay Lasanble e diskite bann prosedir.

Evidaman i konsernen avek bann regleman Lasanble. Me i annan en lot Komite ki apel *House Committee*, ki konsider size bann fasilite travay, lespas Lasanble, lanvironnman dan nou sikonstans.

Mon remersye zot osi pou zot travay. I annan osi Komite *International Affairs Committee* ki regard bann lagreman enternasyonal, bann Konvansyon oubyen bann Trete, pour ratifikasyon par Lasanble.

Nou annan osi *Standing Orders Committee*, ki regard bann regilasyon pou prosedir dan Lasanble. Lezot Komite ki i

annan, i lye nou Lasanble avek lezot brans Gouvernman e avek lakominote an zeneral.

I annan *Finance and Public Accounts Committee, FPAC*, ki tou dimoun i konn byen, e li i pas an revy finans Gouvernman, depans larzan piblik, e bann size sirveyans propriyete Gouvernman.

I annan Komite lo Lasirans Gouvernman, mye koni koman COGA, li i reste an kontak avek bann Minister pour fer sir ki bann deklarasyon ki Minis oubyen lezot Lotorite i fer i ganny enplimante e realize e ki zot pa reste zis parol ki'n dir dan Lasanble.

Nou annan *Defence and Security Committee* ki angaze avek sa 2 size ki dan zot non. E pareyman Komite pour Medya, Lazenés e Kiltir ki konsernen avek zot size respektif.

I annan osi group Madanm dan Lasanble, *Women's Caucus*, ki azir koman en Komite lo li menm. E li i konsernen avek plizyer size sosyal e lafanmir tel ki; vyolans domestik e diskriminasyon e ki abòrd osi bokou lezot size sosyal.

Sa semenn menm, sa Komite, sa group Madanm dan Lasanble avek sipò zot partner enternasyonal, pe fer en latelye lo Vyolans seksyèl e *Gender* dan

ki bann Manm i a ganny loportinite konn plis lo sa problem e egzamin zot rol dan lafason pou konbat li.

Nou annan en Komite lo *HIV/Aids* ki konsernen avek lenpak sa bann maladi e zot prevansyon.

Mon a osi mansyon *Environment Policy Implementation Committee* ki en group *staff* Sekretarya in met an plas pour organiz bann aktivite ki lye Lasanble avek bann lezot partner dan travay proteksyon lanvironnman.

Pandan lannen ki'n pase, zot in organiz bann levennman pou mark serten lokasyon. Par egzamp zot in donn mwan avek Deputy Speaker loner plant en pye kokodmer dan zarden Lasanble e zot annan plan pour anbelir nou zarden ankor plis.

Zot in komans en program resiklaz papye. *Staff* Sekretarya in osi pran lezot linisyativ tel ki form en *Social Committee* ki organiz enteraksyon ant *staff* e ant bann Manm.

Si mon'n mansyon tou sa bann komite se pou rekonnèt e remersye zot pou pran par dan sa bann responsabilite ki mon krwar i etal prezans Lasanble, i donn nou travay en lot dimansyon.

Me mon oule osi servi li pou fer piblik rapel, ki sa bann

komite i la e zot anmenn sa dimansyon travay, ki konsern bokou size ki piblik i konsernen avek.

Mon oule ki manm piblik i konnen ki zot annan sa eleman dan Lasanble, e si i annan size ki preokip zot, zot kapab rankontre an kontak.

Mon espere ki a lavenir nou a kapab elarzi e ranforsi travay komite Lasanble lo lezot size.

Travay Lasanble i osi enkli Mosyon anmennen par bann Manm kot zot kapab anmenn propozisyon pour travay ek Gouvernman.

Lannen pase Lasanble in resevwar Mosyon lo fasilite fer biznes, lo provizyon gratwit bann prodwi izyenik pour zenn fir, lo lozman ensidswit.

Sa bann Mosyon i permet bann Manm inisye bann lide dan zot kote e pa esper Legzekitiv pou komans tou keksoz.

Mon konnen ki i annan Manm ki enterese war Lasanble fer plis sa kalite travay, e byensir mon ankouraz zot. I demann zefor e travay pou anmenn bann lide konkret ki antre byen dan nou program devlopman.

Lo kote Manm Lasanble, en par dan zot rol se zot prezans dan zot distrik. Lekspektasyon i

for lo sa size. Mon kontan war ki bann Manm i reste an zeneral angaze avek bann dimoun ki zot reprezante, pour swiv zot konsern e pran par dan realiz bann proze dan zot distrik.

Lannen pase, nou'n fer en bon pa an avan dan ganny en fasilite biro dan distrik, souvan dan batiman Ladministrasyon Distrik anba Gouvernman Lokal.

Sa in permet bann manm elekte vin pli disponib pour zot zabitan. Sa ti en langazman ki Prezidan Larepiblik ti donnen dan son premye diskour dan Lasanble. E mon remersye Minister Gouvernman Lokal lo lapar bann Manm pour enplimant sa langazman.

Resaman mon'n vizit plizyer bann Manm kot zot biro dan distrik. Laplipar in ganny fasilite ase konvenab, me i annan serten ki bezwen ganny amelyore.

I annan 3 landrwa ki bezwen nouvo konstriksyon e 1 ki pe esper renovasyon lo en vye batiman. Dan lamazorite ka, sa bann bezwen in ganny idantifye e nou annan lasirans avek Minister Gouvernman Lokal, ki zot pou ganny fer osi vit ki mwayen finansyer e travay planifikasyon i permet.

Alor mon kapab asir piblik ki i annan en landrwa kot zot

kapab war zot *MNA*, e mon ankouraz zot pou pran loportinite pour al ver bann *MNA* ler zot annan en konsern. Kot zot biro i osi annan en *constituency clerk* ki la pou war zot ler *MNA* pa la.

Bann *MNA* i pran en gran lentere dan bann proze devlopman ki arive dan zot distrik. Sa lannen nou'n fer en gran pa dan lefe ki finans, pou bann proze distrik in ogmante pou vin R740 mil olye R200mil.

I enportan pour note ki se ladministrasyon Gouvernman Lokal ki ansarz lenplimantasyon sa bann proze, me bann Manm i annan en par dan swazir bann proze e en swivi dan zot realizasyon.

Sa logmantasyon dan Bidze i a permet zot al en pe pli lwen ki avan. Relasyon bann Manm avek ladministrasyon, avek bann *DA* osi byen ki Minister Gouvernman Lokal, in amelyore e mon ganny plito bann rapor pozitiv lo sa bann relasyon.

Mon'n ganny sa sorti lo tou lede kote Lasanble. I annan serten distrik ki annan serten difikilte pourtan, me i rasiran ki sa bann lenkyetid ki si *MNA* i annan en biro kot Ladministrasyon Distrik sa ti a kapab anmenn konfli dan rol sa 2 lenstitisyon.

Sa i pa'n le ka e i laprev ki nou kapab met diferans de kote e travay ansanm. Apard bann proze finanse par Gouvernman, plizyer *MNA* in osi antreprann bann pti proze kominoter lo zot menm, alor felisitasyon pou zot. Mon konnen zot depan lo sipor zot kominote pour fer sa.

Me zot in donn en legzanp, zot langazman pour zot distrik e osi relev sa lespri volontarya, ki enportan pour tou kominote. Ler mon pe pas an revi tou sa bann travay Lasanble, mon bezwen remersye medya ki kouver e raport lo Lasanble.

Sa ki zot fer pou anmenn nou travay devan piblik i enportan pour nou. Mon a remersye sirtou *SBC*, ki'n en partner pour bokou lannen pour anmenn travay Lasanble an piblik.

Deliberasyon dan lasal i ganny transmet an direk e i annan raportaz ase detaye dan nouvel. Bann aktivite Lasanble e osi aktivite bann Manm an deor Lasanble i ganny kouver.

Lannen pase nou'n pran responsabilite pour rikord e met anliny nou bann sesyon nou menm, e nou'n ranforsi nou seksyon medya pour sa.

Mon apresye ki *SBC* ki'n akonpany nou pour plizyer lannen e ed nou pour etabli nou prop kapasite pour fer sa, pour

nou menm in reste avek nou pou sa.

Lannen pase nou'n met nou rapor lo en nouvo baz avek en sinyatir en nouvo *memorandum* pour li kontinyen ed nou ek konsey e lasistans sirtou pour difikilte teknik ki nou kapab rankontre, osi byen ki kontinyen transmet nou bann travay.

Sa lannen, nou lekip i annan plan pour fer lezot program adisyonnèl pour anmenn plis konesans lo nou travay anver piblik. Me menm si keksoz in al ase byen pour nou, i annan kontrent e difikilte.

Mon a pas lo enn de sityasyon ki nou'n rankontre. In annan 2 lensidan ki'n deranz nou. Enn en *air conditioner* ti pran dife ki ti deklans sistenm *sprinkler* e okazyonn linondasyon dan batiman.

E en lot sete linondasyon dan en letan gro lapli par defayans bann sistenm dalo. Tou lede in montre ki nou batiman pe vye e nou pou bezwen met zefor e larzan dan *maintenance* e renovasyon.

Mon remersye nou bann *staff* ki'n reponn vit e avek efikasite pou remet nou annord e mon remersye osi Lapolis e Servis Dirzans ki'n ed nou dan sa bann sironstans.

Sa i anmenn mwan lo pwen ki nou bezwen regard nou batiman e lespas ki nou annan. Batiman Lasanble i ase enpresyonan an deor. Souvan nou war viziter pe tir porter.

Nou swete ki i reste touzour en reper pour bann viziter, me anndan nou annan en mank lespas ase serye. Nou napa ase biro travay, nou napa ase lasal pou rankont nou bann group Manm tou lede parti. I annan landrwa ase sere pour fer rankont.

Nou annan plan, in egziste dan Lasanble depi en pe lannen pour 2 batiman adisyonnèl, enn sak kote batiman orizinal, kot sa plan in la depi plizyer lannen.

La prezan nou'n tir zot dan tirwar e nou'n tap lapousyer lo la, nou pe repas lo zot avek nouvo Lazans Lenfrastriktir, pour fer sir ki i reponn byen nou bezwen e ki nou ganny valer pour larzan ki nou pou bezwen mete dan sa bann konstriksyon.

Byensir, tou i tourn lo kestyon finans. Bann restriksyon bidzeter i realite be nou bezwen met posibilite sa proze devan Minister e nou pe espere ki i a kapab ganny konsidere dan bann lannen ki pe vini.

Antretan nou pe apros Minister Finans, pour en pli pti proze e sa se enn pti younit an deryer batiman prensipal dan ki nou kapab dan ki nou kapab plas servis *maintenance, housekeeping e store*.

Koumsa nou a kapab liber en pe lespas dan biro dan batiman prensipal. Lasanble i bezwen grandi anmezir ki nou rol i elarzi. I osi annan bezwen pou regard bann fasilite travay. Sa lannen nou espere enstal en nouvo sistenm mikrofonn e raportaz dan lasal.

Zot in kapab remarke e piblik osi mon asire in remarke, ki sa sistenm ki nou annan konmela i ganase par ler, avek bann kriye konmsi i pe soufer. Sa i aköz son laz.

Nou'n ganny retar avek proze pou ranplas sa sistenm, me nou espere konklir sa pozitivman byento.

Nou osi annan en proze pou sanz laranzman *seating* dan lasal, ki olye en kare parey nou annan konmela, nou pou annan en ark oubyen en demi serk parey i tradisyonnèl dan lezot Parlman dan lemonn.

Sa i a fer ki tou Manm pou vir ver Speaker olye an fas ek kanmarad. Nou pou plas latab Speaker lo gran kote lasal, dan stil *landscape* plito ki *portrait*,

ki a fer ki bann Manm pou pli pre avek latab Speaker.

Sa laranzman pou pli byen reprezant linite nou Lasanble. Sa proze i an se moman avek Lazans Lenfrastriktir pour finalize e mon espere ki avek sipor finansyel, nou a kapab realiz li.

Pandan diskour Bidze, bokou bann lorganizasyon gouvènmantal in fer sorti ki napa ase larzan pou enplimant tou program e proze ki zot ti a kontan. Nou annan senpati pour zot aköz nou osi nou annan menm limitasyon.

Nou annan limitasyon *staff*, sirtou pou siport bann travay bann komite. Sa lannen nou pe ranforsi nou Biro Konseye Legal, fotespere avek 2 zofisyè ki pou donn nou plis sipor dan konesans legal.

Sa nou bezwen pou fer pli byen nou travay lo Lezislasyon. Nou annan lezot bezwen *staff* pou siport travay Lasanble, e nou pe met nou ka devan Minister Finans pour konsiderasyon pour prosen Bidze.

En kote travay Lasanble se rapor ki nou annan avek bann lorganizasyon enternasyonal, prensipalman bann lorganizasyon Parlmanter.

Mon mansyon an partikilye *SADC Parliamentary Forum*, ki rasanbleman bann Parlman dan sid kontinan Lafrik.

I annan *Pan African Parliament* ki groupman *African Union*, e *Commonwealth Parliamentary Association* asosye avek *Commonwealth*, e osi *International Parliamentary Union (IPU)* ki asosye avek *United Nations*.

Lasanble Sesel i angaze dan tou sa bann *forum* ki permet nou manm zwenn parلمانter lezot pei, diskit bann size e bann konsern ki nou annan an komen.

Enn, se ki mannyer pour travay pli byen koman en Parlman, me osi lo bann size devlopman ekonomik e sosyal.

Souvandfwa sa bann rankont i etabli Polisi ki zot rekomande lo serten size, ki nou Lasanble i servi koman en baz pou regard nou prop Lezislasyon.

Annandler i al ziskan formil bann *model laws* ki pei i kapab servi pou fason son Lalwa. Fodre dir ki nou Manm i partisip aktivman dan sa bann rankont e souvan zot ganny elekte lo bann komite travay dan sa bann lorganizasyon.

Nou apartenans i pa zis lo kote Lasanble, i osi aköz nou

pei i angaze avek zot lorganizasyon bann pei dan relasyon dan relasyon multilateral. Alor sa travay Lasanble i reflekte langazman nou pei dan relasyon enternasyonal.

Apard bann lorganizasyon, nou osi annan relasyon bilateral avek lezot Parlman, kot nou annan bann group lanmitye ki parfwa fer bann esanz vizit oubyen rankont.

Avek Parlman *La France* nou annan enn ki aktiv. Nou annan demann fer par plizyer pei pour annan bann group lanmitye, me sa ki limit nou se sirtou annan ase Manm e *staff* pour siport tou sa bann relasyon.

Prezan lo en not personnel; lannen pase i peryod ki'n permet mwan abitye avek mon rol koman Speaker. Vi ki mon pa'n fer bokou letan dan Lasanble avan sa, mon'n bezwen aprann bann protokol, koutim e metod Lasanble.

Erezman in annan akote mwan bann dimoun ki'n fer en kantite letan dan Lasanble e menm bann ki'n ede form sa Lasanble, pou fer li vin mannyer i ete ozordi.

Mon'n ganny en kantite gidans sorti kot bann Dirizan, bann Manm e lo kote

Sekretarya. Mersi pour zot pasyans e pour korperasyon ki mon'n gannyen sorti lo tou kote. Fotespere mon a vin pli abil dan metod Lasanble pandan sa lannen.

Mon repran en pwen ki'n ganny leve pandan lannen pase, e sa se nesessite pour enparsyalite Speaker Lasanble.

Mon repet lasirans ki mon'n donner ki mon rekonnèt sa nesessite e mon determinen pou obzerv li a tou moman, menm si mon reste asosye avek en parti politik ki dan Lasanble.

Mon le asir tou Manm ki mon a pran li tre byen si zot anmenn a mon latansyon, okenn pwen ki zot krwar i kapab fer nou Lasanble mars pli byen e ranpli son devwar koman reprezantasyon Lepep Seselwa.

Mon osi remersye Manm piblik, ki annandler i anvoy nou komanter lo Lasanble. Mon Parey mon'n deza eksprimen, mon preokipasyon prensipal pour travay Lasanble, se ki nou servi nou letan byen.

Avek sipor Biznes Lasanble pandan lannen ki'n pase nou'n adopte serten pratik lo regleman letan, ki'n permet nou avanse avek nou azanda.

Par ler, nou'n bezwen regle la kantite kestyon ki ganny demande, letan pour

deba, ensidswit. Mon krwar sa in permet annan en partisipasyon pli ekitab, e in fer nou konplet nou latas dan letan ki nou'n mete pour li.

Dezyenm preokipasyon se ki Lasanble, e pou mwan koman Speaker, se ki Lasanble i prosed annord, e i gard en ton respe e dinyite. Mon asire ki sa i ekspektasyon ki nou piblik i annan.

Pou nou travay byen e delivre lo ekspektasyon piblik, nou bezwen annan respe e tolerans pou kanmarad, lonnekte e senserite. An dot mo, nou donn legzanp e delivre parey ki nou demande ki lezot brans Gouvernman i delivre.

Mon apresye korperasyon ki mon'n gannyen dan sa de domenn. Mon espere ki nou rapel toultan nou rol koman reprezantan Lepep Seselwa.

Mon remersye tou Manm pour zot travay dan Lasanble, dan lannen ki'n pase e pour zot kontribisyon anver performans nou lenstitisyon.

Mon remersye Deputy Speaker ki'n ed mon souvan dan desarz sa rol Speaker. Mon remersye bann Manm e osi nou Sekretarya ki donn nou sipor e ki fer nou travay marse. San zot travay efikas e konpetan, nou pa ti pou kapab fer sa ki nou'n fer dan sa lannen ki'n

pase e osi dan sa lannen ki pe vini.

Finalman mon dir mersi tou manm piblik pou swiv nou travay avek lentere. Sa i osi permet nou reste relevan pou nou piblik. Mersi zot tou pou zot latansyon.

(APPLAUSE)

MR SPEAKER

Bon, an se moman ozordi i Lazournen Enternasyonal bann Madanm. Mon ti a kontan ki nou zwen lezot lenstitisyon, lezot lorganizasyon e endividi ki'n eksprim mesaz pou sa lokazyon.

E nou pou apresye osi, nou pou osi eksprim nou lapresyasyon Lasanble pou sa lokazyon. Me pou fer li pli byen, mon ava envit *Chairperson* Group Madanm dan Lasanble, pou pas en mesaz lo non Lasanble. Mon apel Onorab Regina Esparon.

HON REGINA ESPARON

Bonzour Mr Speaker e tou Manm Onorab, espesyalman bann madanm Seselwa ki a lekout isi Sesel e partou atraver lemonn.

I avek bokou lazwa ek lafyerte ki mon swet tou bann madanm isi Sesel e atraver

lemonn antye en Bonnfet Lazournen Madanm.

San bliy nou bann madanm Onorab isi dan Lasanble, tou bann madanm ki travay dan Sekretarya ek ladministrasyon, nou bann *cleaners* e tou bann *clerk* madanm ki travay dan bann lofis *MNA*, bonnfet.

Mr Speaker, sa lannen Nasyon-z Ini in komemor sa levennman anba tenm Egalite, ant Zonm ek Fanm pou en Lavenir ki Soutenab.

E sak lannen Nasyon-z Ini i swazir en tenm ki i dedye espesyalman pou nou bann madanm e pou promouvwar travay ki madanm pe fer en pe partou atraver lemonn.

E sa lannen 2022, i enn ki ekstrememan enportan pou nou kapab arive annan egalite ant zonm ek fanm, dan konteks bann topik tel ki ledikasyon, lo sanzman klima e rediksyon risk e dezaz dan lanvironnman.

E pou travay ansanm dan legalite, pou nou arive *attend* en lavenir ki pli soutenab, e protez nou lanvironnman, e sov nou plannet.

I enportan ki nou osi konsyantiz nou bann madanm e zenn fiy lo laspe sanzman klima, e son danze ki lemonn i riske fer fas avek e nesessite

protez nou lanvironnman e pou lavenir pli soutenab.

Mr Speaker Komite bann Madanm dan Lasanble Nasyonal, i siport sa tenm dan son totalite. Akoz mon santi ki lasosyete ozordi pa kapab frenm lizye lo lenportans e kontribisyon ki bann madanm i anmennen, pou fer dan desizyon ki ganny pran lo bann tel size.

Aprè tou, se nou menm bann madanm ki manman, e koman manman. Se nou bann premye edikater e bokou responsabilite i tonm lo nou zepol.

Alor i normal ki se nou ki devret premye pou sansibiliz nou zanfan lo bann diferan laspe lavi, enkli bann danze ki nou move konportman i kapab anmennen vizavi sanzman klima. E ki mannyer nou osi nou bezwen ganny menm sans ki bann zonn, pou ganny akse ek lenformasyon e ledikasyon, vizavi sa size sanzman klima.

Mr Speaker, lemonn i bezwen a tou pri rekonnèt nou drwa koman madanm e valoriz nou kontribisyon. E zefor ki nou pe fer pou donn en koudmen dan sa lalit kont sa defi mondyal ki pe afekte bann pti leta zil parey Sesel, Maldives e lezot zil *côtier*.

Lo plan Nasyonal, les mon sezi sa loportinite e pou demann Gouvernman, pou met ankor plis lanfaz lo devlopman nou Polisi ki ava ed nou bann madanm dan devlop zot potansyel o maksimonm e kot zot kapab kontinyen debout kot-a-kot avek bann zonn dan devlopman nou sosyete.

Ozordi nou kapab dir, i annan serten loportinite pou bann madanm avanse. Me bokou i mank serten konesans e motivasyon.

E mon santi ki en kantite madanm Seselwa ankor bezwen sa lankourazman, e i neser ki nou al ver zot e atrap zot lanmen pou ed zot fer san premye pa e avans, pou avanse dan zot lavi.

Nou bezwen kontinyen rode e met an plas bann mwayen ki ava permet en manman kit son lakour e al travay avek en lespri anpen.

Ki son zanfan i dan en landrwa profesyonnel, e ki kot son lakour, sa vye granmoun osi i an sekirite. Nou rekonnèt e apresye zefor Leta pou kontinyen donn bann sipor parey lasistans pou pey *Day Care* e sistenm *carer*.

Sa bann striktir i permet nou bann madanm kapab al travay, e dan ka bann *carer* i osi

en loportinite lanplwa pou bokou nou bann madanm.

Lo sa pwen mon osi demande ki bann demars pou formaliz lanplwa *carer* i akseler-pou ki zot a kapab ganny tou benefis ki anlwaye formel i gannyen.

Avek sa i osi vin en demann pou tou nou bann madanm, pou sezi loportinite ki nou gannyen pou devlope e pou fer progre. Nepli tan pou nou depan lo lezot.

Konmela i annan en kantite madanm ki fer plis ki 1 travay dan en zournen. I annan ki apre ki in ariv kot lakour, i fer en lot keksoz pou ki ganny 1 roupi ekstra pou kapab fer fas avek bezwen son fanmir.

Koman en madanm mon fyer ler mon war sa e mon felisit sa bann madanm ki'n swazir pou debrouye e pa pe depan lo leta. Isi Sesel nou ganny akse avek travay e nou vwar nou bann madanm dann tou pozisyon, depi Minis, pilot, peser, drayver ziska *carer*.

Me sa i pa vedir ki nou napa defi. Wi i annan serten nivo egalite. Me i ankor annan diskriminasyon dan serten laspe.

E i malere pou dir ki sirtou dan sekter prive, si en anlwayer i annan en swasantenn anploy en zonm

homme, ouswa en zenn madanm, i swazir sa zenn *homme*, akoz sa zenn madanm i kapab tonm ansent ouswa i annan zanfan ki ankor ptipti, e i bezwen latansyon.

Lo kote travay ankor, nou demande ki kestyon *sick leave* pou bann madanm avek zanfan ki i annan maladi kronik oubyen ki i ankor pti baba, i ganny trete diferaman avek lezot travayer.

Koman en sosyete nou bezwen toultan pe pran bann desizyon, lo ki mannyer pou amelyor sityasyon bann madanm lo en baz kontinyel.

Akoz tro bokou fwa bann plan e stratezi i reste zis rezilta bann konferans e letid, e i napa lenplimantasyon adekwat e kontinyel.

E i enportan ki nou toultan pe revwar bann stratezi e Polisi, vwar kwa ki bon e ki n ou kapab fer pou amelyore lo la e fer sir ki nou bann, nou enplimant zot.

Pli byennet nou bann madanm ki an retour i vedir byennet nou sosyete. Dan bann Komite lo nivo Nasyonal, nou ti a kontan vwar bann madanm pe rebran sa rol aktiv ki zot ti zwe dan lepase, dan bann diferan groupman.

Ki swa relizyon ou sosyal. Se ler nou zwenn ansanm e

partaz leksperyans, ki nou kapab reisi pou nou kapab anrиси nou lespri e avans ansanm.

Wi se Gouvernman ki tras semen devlopman. Me se nou tou ansanm ki bezwen fer sa traze e alor bann madanm annou atrap lanmen kanmarad akoz nou madanm se lafors nou sosyete.

E Mr Speaker, mon profit sa lokazyon pou felisit bann madanm ki pe fer byen dan lavi, e bann ki pe fer paviyon Sesel monte.

E la mon felisit nou 3 madanm Seselwa, dan weight *lifting*, pou zot sikse. Valentina, Ruby e Romanta, felisitasyon bann group madanm, parey *Virtuous Woman Seychelles* ki'n lans zot Minister pou bann madanm Sanmdi pase anba direksyon Paster Linda.

Kot zot bi se ede soutenir bann madanm ki'n tonbe pou releve. WASO ki fek relans son *helpline*, kontinyen lo sa bon semen.

Mr Speaker, nou bezwen transform nou sosyete, pou ki nou valoriz kontribisyon ki senp madanm e zenn fiy i fer, ki swa pti ou gran, pa devret annan okenn diskriminasyon.

E pli enportan, nou bezwen re enkilke dan nou bann madanm, sa kiltir kot

madanm i siport son koleg madanm pozitivman, pou ranfors son kapasite, olye kree bann baryer ki kapab anpes li avans devan.

E an terminan, mon ti a osi kontan dir bann madanm, ki i enportan ki nou pran ka ek nou lasante.

E la pandan sa mwan Mars, sezi sa loportinite ki bann klinik pe ofer, sa program *screening* pou al fer zot tes pou kanser matris, kolmatris e kanser tete.

Anvi ki sa 2 kanser pli komen parmi bann madanm. E si i ganny detekte boner i kapab sov lavi.

E pou fini Mr Speaker, mon ti a kontan fini avek en *quote* ki Stella Nyanzi en *gender activist Ugandan* ki ti kondann prizon akoz i ti pe lager pou drwa bann madanm.

I fek ganny large dan prizon lannen pase, ki dir "*woman can change the world*".

E mon senserman krwar ki wi si nou ini, fanm Seselwa i kapab ede dan sa transformasyon nou pti Sesel e transform lemonn *for the better*. Mersi Mr Speaker. Bonnfet tou bann madanm.

(APPLAUSE)

MR SPEAKER

Mersi Onorab Esparon. Mon a eksprim mon sipor personnel e sipor Lasanble pou mesaz ki Onorab Esparon in anmennen pou bann madanm.

E osi mon a felisit zot pou zot langazman dan Lasanble e dan lakominote anver lakaz ki in eksprimen. Mersi.

Mon'n ganny mesaz sorti kot Lopoziyon ki zot labsans dan komansman ti akoz obzeksyon avek mon ladres. Mon regret dir mon regret sa lokazyon.

Mon oule dir ki mon'n anmenn sa lide fer ladres lo travay Lasanble dan tou bann Komite ki konsernen, dan *Assembly Business Committee* e dan *House Committee*. E dan tou lede mon pa'n ganny okenn obzeksyon pou kont sa.

So mon regrete ki napa, e sa kominikasyon ki pou eksplike akoz zot in pran sa latitud. Mersi. Onorab Pillay mon pa pe pran okenn komanter lo la. Eski ou annan en *point of order*?

HON SEBASTIEN PILLAY

Mersi Mr Speaker. Mr Speaker mon pou demann ou dan lespri latolerans, lonnekte, fransiz pou permet mwan zis reakte lo sa komanter ki ou'n fer ...

MR SPEAKER

Eskize.

HON SEBASTIEN PILLAY

... vizavi ki ou'n ganny en mesaz sorti kot Lopoziyon. Mon ti a kontan konnen lekel ki'n anvoy sa mesaz pou ou?

MR SPEAKER

Non, mon'n enterpret zot labsans koman sa. Mersi bokou Onorab Pillay, se tou. Nou a prosede. Madanm Clerk mon ava envit ou pou fer prezantasyon Papye silvouple.

MADAM CLERK

Mersi Mr Speaker, bonzour Mr Speaker, bonzour tou bann Manm e tou dimoun ki a lekout. Bonnfet tou bann madanm dan Sesel. Bann Papye ki pe ganny prezante i konm swivan.

The National Tender Board – Annual Report 2020.

S.I. 23 of 2022 Customs Management (Passenger Allowance) (Amendment) Regulations, 2021.

S.I. 24 of 2022 Export of Fishery Products (Sanitary) (Amendment) Regulations, 2022.

And S.I. 25 of 2022 Seychelles Ports Authority (Stevedoring and Terminal Handling Charges) (Amendment

of Schedule) Regulation, 2022.
Mersi Mr Speaker.

MR SPEAKER

Mersi Madanm Clerk. Nou aprezan kontinyen aprezan avek *Private Notice Question* sorti kot *Leader* Lopozisyon. Madanm raporter mon a demann ou pou apel Vis-Prezidan Ahmed Afif silvouple.

Bonzour Vis-Prezidan Ahmed Afif e byenveni dan Lasanble pou pran *Private Notice Question*. Avan mon pas laparol *Leader* Lopozisyon, mon oule met en pwen a latansyon bann Manm.

Kestyon ki dan *Private Notice Question*, i konsern *allowance* pou bann Minis. Minis Derjacques ti dan Lasanble le 27 Oktob lannen pase pou reponn kestyon lo *allowance* ki bann Minis i gannyen.

E sa ti enkli *telephone allowance*. Mon dir sa, zis aköz *Standing Orders* i dir ki nou pa pran en kestyon lo en size ki'n ganny reponn dan *the preceding 6 months*.

Alor mon konnen ki *Leader* Lopozisyon i konn byen *Standing Orders*. E son kestyon i lo nouvo *allowance*. Alor mon port a latansyon bann Manm e pou Vis-Prezidan osi ki nou pe konsider *allowance* depi le 27

Oktob lannen pase. Avek sa *Leader* Lopozisyon, mon a demann ou pou poz ou kestyon.

HON SEBASTIEN PILLAY

Mon remersye ou Mr Speaker pou donn mwan loportinite pou reponn mon kestyon. Mon swet labyenveni Vis-Prezidan dan nou Lasanble.

E mon ti a kontan osi, si ou permet mwan Mr Speaker, avan mon demann, mon demann mon kestyon, zis pou fer en pti komanter ki demontre zisteman rezon aköz *Caucus United Seychelles* pa'n antre dan Lasanble pou ekout sa ladres ki ou ti pe fer bomaten.

Zisteman i aköz sa lesplikasyon ki ou, ou'n donner vizavi sa kestyon, ki en lesplikasyon ki Minis li menm li i ti'n kapab donner. E ki mon vwar ki ou lentansyon dan fer sa ladres ...

MR SPEAKER

Poz-poz ou kestyon silvouple. Onorab mon'n donn ou.

HON SEBASTIEN PILLAY

... se pou anmenn en kontravansyon nou Konstitisyon.

MR SPEAKER

Onorab mon'n donn ou ...

HON SEBASTIEN PILLAY

... se pou partisip dan deba Lasanble.

MR SPEAKER

Mon'n donn ou parol pou poz ou kestyon.

HON SEBASTIEN PILLAY

... e personn napa drwa anpes ou koze. Zis ou ki annan drwa anpes dimoun koze dan Lasanble.

(Mic switched off)

MR SPEAKER

Onorab, mon'n donn ou laparol pou poz ou kestyon. Mersi.

HON SEBASTIEN PILLAY

Mersi. Fotespere Lepep Seselwa i war ki kantite zwe mon bezwen zwe zis pou kapab koz lo zot *behalf* e ki mannyer dan sa Lasanble nou annan en mank tolerans pou kestyon, pou lafason ki travay Lasanble i devret ganny fer.

Mr Speaker mon kestyon i lir koumsa. E mon pou kontinyen, mon pou kontinyen sa lager pou montre i annan en mank tolerans dan sa pei. Mon kestyon i;

Swivan lanons, Mr Speaker mon ti a kontan ki Onorab Georges i les mwan

demann mon kestyon silvouple?

(Off-Mic)

MR SPEAKER

Onorab Pillay ou'n fer ase enteripsyon, poz ou kestyon silvouple!

HON SEBASTIEN PILLAY

Mersi Mr Speaker. Mon bezwen dir ou Mr Speaker, mon pa konnen si mon pe koz ek *Leader LDS*, Mr Speaker.

Swivan lanons lannen pase, swivan lanons lannen pase ki bann Manm *Cabinet* ti'n revwar zot bann *allowance* e sa in ogmante konsiderableman, eski Minis i kapab konfirm avek nou Lasanble si *Cabinet* in osi pran en nouvo *allowance* pou telefonn avek *internet*? Mersi bokou.

MR SPEAKER

Mersi. Vis-Prezidan ou repons silvouple.

THE VICE-PRESIDENT AHMED AFIF

Mersi bokou Mr Speaker. Bonzour tou bann Manm Lasanble. Bonzour *Leader* Lopoziyon.

E permet mon Mr Speaker tou dabor pou osi swet tou bann madanm dan Lasanble,

bann madanm a lekout, bann madanm dan Sesel en bonnfet zot lazournen ozordi.

Nou kontan zot, nou ador zot e kontinyen siport nou.

(APPLAUSE)

THE VICE-PRESIDENT AHMED AFIF

Mr Speaker larepons tre senp pou sa *PNQ*, eski mon kapab konfirman si *Cabinet* in pran en nouvo *allowance* pou telefonn ek *internet*, larepons senp, non. Mersi bokou.

(APPLAUSE)

HON SEBASTIEN PILLAY

(Off-Mic)

Zot in fini?

HON BERNARD GEORGES

(Off-Mic)

Be napa siplemanter.

MR SPEAKER

Bon Vis-Prezidan in donn son repons. Si napa en nouvo *allowance* parey Vis-Prezidan in dir, mon pa war ki manner nou pou kapab annan kestyon siplemanter lo sa kestyon. Mon pa war ki manner.

HON SANDY ARISSOL

(Off-Mic)

Nou a dir mersi Vis-Prezidan.

HON SEBASTIEN PILLAY

(Off-Mic)

MR SPEAKER

Onorab Pillay ou a ekout mwan silvouple. Onorab Pillay eski ou annan en kestyon siplemanter? Ale, mon a ekoute.

HON SEBASTIEN PILLAY

Wi Mr Speaker mon annan en kestyon siplemanter.

MR SPEAKER

Ok, koze.

HON SEBASTIEN PILLAY

Mersi Mr Speaker. Mon kestyon siplemanter i lir koumsa. Dan son larepons Vis-Prezidan in dir ek nou koumsa poudir ki *Cabinet* pa'n pran en nouvo *allowance*.

Mon kestyon orizinalman, i ti pe ganny demande par lefe ki ozordi en kantite travayer zot bann *allowances* in ganny koupe.

Long Service Allowance pou bann *teachers* pa'n ogmante. Bann travayer *LWMA* par egzanp pa'n ganny peye lafen dimwan e zot pe ganny peye le 5 le mwan. E i neser pou Gouvernman, pou *Cabinet* Minis eksplike.

Ler ou dir i napa en nouvo *allowance* pou *Internet*, e ski in annan en logmantasyon dan sa *current allowance* pou Telefonn ek *internet* ki bann Minis pe gannyen?

Ki deza la an tou ti ariv R35mil, par rapor *allowance* 2 mil ekek Roupie ki en *teacher* ti pe gannyen, par rapor a lezot bann *allowance* ki bann lezot dimoun ti pe gannyen. So eski i annan en logmantasyon dan sa *allowance*?

E eski Gouvernman, prenon kont ki Cabinet Minis ki fer desizyon lo bann *allowance*, pou pran desizyon sa lannen, pou asire ki bann travayer LWMA i ganny peye a ler.

(Mic switched off)

MR SPEAKER

Mersi. Onorab Pillay mon'n ekout ou kestasyon, i pa relevan, i napa nanryen pou fer avek ou kestasyon orizinal.

Alor mon tenir mon pozisyon ki si napa, si napa nouvo *allowance* i napa kestasyon siplemanter lo sa kestasyon.

(APPLAUSE)

MR SPEAKER

E nou ava, nou ava aret sa sesyon la, nou a terminen e nou a rebran travay 11er. Mersi.

(BREAK)

MR SPEAKER

Byen nou a kontinyen avek kestasyon bann Manm pou Minis pou Later e Lozman. Madanm raporter mon a demann ou pou apel Minis ek son delegasyon silvouple.

Bonzour e byenveni Minis Billy Rangasamy pou reponn kestasyon bann Manm. Bonzour e byenveni egalman Mr Denis Barbe Sekreter Prensipal pour Lozman. Mrs Muriel Morgan Sekreter Prensipal pou Later e Mr Steve Mussard *Deputy CEO Property Management Company*.

Pou premye kestasyon mon ava apel Onorab Desheila Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou Manm Onorab e en gran bonzour pou zabitan Perseverance.

Vi ki an se moman i annan biznessmenn serye ki pare pou investir e anmenn loportinite travay dan Perseverance, e ki i annan bokou kare later kot zoli devlopman i kapab ganny fer, me dapre dir sa bann kare later i pou bann propriyeter prive.

Eski Minis pou Later e Labita i kapab dir avek nou Lasanble, ki travay son Minister pe fer konsernan sa bann kare later dan Perseverance ki la annabondans?

E swivan dernyen larepons PS Later dan Lasanble lannen pase ki ou Minister pe reget bann kare later prive, abandonnen e osi bann ki lo *lease* e ki zot pe donn tou bann propriyeter en dele letan pou komans devlopman lo sa bann later,

Eski Minis i kapab konfirm avek sa Lasanble si sa legzersis in komanse, e ki desizyon son Minister pou pran avek bann propriyeter ki pa respekte sa bann tel kondisyon? Mersi.

MR SPEAKER

Mersi Onorab. Minis mon ava envit ou pou ou repons.

MINISTER BILLY RANGASAMY

Mersi bokou Mr Speaker. Mersi bokou pou ou kestyon Onorab. Mr Speaker, tou Manm Onorab, tou dimoun prezan, bann ki pe swiv lo radyo, lo televizyon e atraver *internet*, bonzour. Mersi ankor enn fwa pou resevwar mwan ek mon lekip dan Lasanble Nasyonal ozordi.

Mr Speaker avan mon demare ek reponn kestyon Onorab mon oule personnelman silvouple demann ou permisyon pou dir 2 pti mo avan mon reponn kestyon Onorab, silvouple. Mersi Mr Speaker.

Premyerman i en loportinite ozordi pou mon swet bonnfet Madanm tou bann madanm dan Lasanble, bann ki pe travay isi, dan Sesel e osi aletranze. Ki Bondye i beni zot tou.

Dezyenmman mon oule osi remerisi ou Mr Speaker e tou bann Manm Lasanble ki'n priy pou mwan e donn mon zot sipor pandan peryod difisil resaman konsernan maladi mon pti garson Liam.

Mersi pou tou zot sipor ki zot in osi donn VP e mon lekip kot mon Minister dan diferan deliberasyon dan Lasanble kot mon pa'n prezan. Ki Bondye i beni zot tou e ranpli zot leker plen ek lanmour.

Mr Speaker mon a pran kestyon Onorab prezan, mon ava fer mon mye pou reponn son kestyon dan en fason ki byen konplet e *hopefully* donn tou leklersisman lo sa zafer Perseverance.

Zil Perseverance i deza annan en plan devlopman e Minister in fini enplimant plis ki

90poursan sistenm lenfrastruktir. Provizyon in ganny fer dan sa plan pou diferan aktivite konponan *land use* tel ki komersyal, sant administrative, lopital, lekol, *zone* spor, rekreasyonnel e lwazir pou deservi kominote.

Wi, bokou bann kare later i paret abandonnen, me mon oule reasir Onorab Bastienne ki i annan en plan devlopman pou sa bann kare later. Anliny avek sa plan devlopman, Minister pe kontinyen avek son program avek bann later ki ti'n ganny dezinyen pou laspe rezidansyel.

Nou annan gran plezir pou anonse ki mon Minister pe al lans en 'lekspresyon lentere' sa ki nou apel '*Expression of Interest*' pou teste lapeti sekter prive dan devlopman lakaz abordab, mon repete lakaz abordab atraver bann proze *PPP*.

Mon oule profit sa lokazyon, pou ankouraz sekter prive pou donn Gouvernman en koudmen lo sa size devlopman proze lakaz. Mr Speaker baze lo diskisyon avek *GICC* ki nou'n fer agresivman sa lannen, avek lagras Bondye nou pe re demar tre byento Proze *Condominium* lo Zil Perseverance.

Mr Speaker avek larive nouvo ladministrasyon, mon Minister pe fer en legzersis pou

revwar sa plan devlopman. Spesifikman bann landrwa ki pa ankor ganny devlope anliny avek direksyon e nouvo stratezi Gouvernman.

Mon Gouvernman i enn ki krwar bokou dan konsiltasyon e travay pros avek tou zabitan, tou *DAs*, tou *MNAs*. E koman parti sa legzersis, a moman apropiye nou pou seryezman angaz Lotorite Distrik ek lezot Minister Konsernen, pou konplet revi sa plan redevlopman, eskiz mwan sa plan devlopman.

Swivan sa revi nou pou demar e akseler lenplimantasyon devlopman, sa bann later dapre nou kapasite finansyer, afen ki Zil Perseverance i ava vin model en kominote enklisiv e vibran. Mon osi envit tou zabitan Perseverance, pou transform Perseverance dan en lanvironnman egzanpler ranpli ek lanmour e responsabilite.

Mr Speaker pou reponn dezyenm parti kestyon Onorab, mon konfirman ki sa legzersis pou idantifye e repran bann kare later ki lo *lease* oubyen sa ki nou dir in '*pass bay*' e ki pa'n ganny devlope in deza komanse.

Mon konfirman sa legzersis in deza komanse. Tout an prenon kont

konsiderasyon COVID, apre konsiltasyon avek sa bann devloper ki pa'n fer zot devlopman, Minister pe kennsel zot *lease*.

Apre ki tou prose legal i konplete sa bann kare later pou ganny remet lo tender atraver SIB, *Seychelles Investment Bureau* avek lenvestiser serye ki enterese pou investir e anmenn loportinite travay dan Perseverance.

Par kont bann ki'n zis ganny en pe retar me zot in fini komans zot staz *design* ek *Planning Authority* eksetera, Minister pe konsider seryezman e in donn zot 6 mwan apartir Zanvye 2022, pou komans zot devlopman.

Mr Speaker nou pe osi kontiny nou zefor pou rebran tou bann kare later ki pou le moman pe ganny okipe san en lagreman ofisyel e sa i osi aplik nasyonalman.

Nou later i enn nou resours presye e nou determinen, Minister, Departman Later, tou mon lekip, pou nou maksimiz sa potansyel nou later ki'n ganny met a nou dispozisyon pou nou *manage*.

An prensip a sa pwen, mon ti ava kontan fer rapel bann manm piblik ek bann investiser an zeneral, ki si zot

pa'n devlop zot bann kare later dan sa dele letan ki'n ganny agree, dapre zot lavant ouswa dokiman *lease*, Minister pou bezwen pran aksyon apropiye. I annan bokou dimoun pe asize pe espere. Mersi Mr Speaker.

MR SPEAKER

Mersi Minis. Onorab Bastienne ou an kestyon siplemanter? I, kestyon i konsern prensipalman Perseverance, me akoz i annan en laspe nasyonal ladan nou a regard letan nou a sey pran enn de kestyon siplemanter lezot Manm. Yes Onorab Bastienne.

HON DESHEILA BASTIENNE

Wi Mr Speaker. Mon annan en pti leklersisman. Mersi. Minis vi ki dan ou repons, wi ou'n aksepte poudir i annan bokou later abandonnen, me nou dan Perseverance nou annan en pti konsern.

Vi ki i annan bann later ki'n *lease* ki nou apel sa *prime land* ki bord avek semen piblik e pour nou, nou konsern se ki, ki zot pozisyon Gouvernman vizavi sa bann later *lease* ki ozordi i bord ek semen i bwaze, ki pe soutir bokou salte e osi bann aktivite anti-sosyal.

So vi ki sa bann later *lease* i propriyete prive, se mon ti a kontan demann ou ki ot

pozisyon akote sa bann morso later e dan ki fason ki ou kapab antretenir zot? Mersi.

MR SPEAKER

Mersi Onorab. Minis.

MINISTER **BILLY**
RANGASAMY

Mersi Onorab pou ou kestyon. Parey mon'n fer resorti sa legzersis in demare. Nou'n idantifye sa bann later kot i annan en plan devlopman e sa bann lenvestiser i pe serye, e zot pe demar zot proze e sa nou pou bezwen met sa dan zot lanmen, nou'n donn zot 6 mwan pou demar zot proze.

Me par kont bann lezot ki petet i tonm en pe parey sa ki ou'n eksplike pou le moman zot get abandonnen e i napa okenn konfyans ki sa bann devloper pou fer sa travay. Nou bezwen sivre proses legal, akoz sa ti'n deza annan en *lease* lo la pou nou kapab reganny sa bann later *back* dan son proses normal e fer le nesese.

E par kont si i annan landrwa spesifik kot ou annan konsern Onorab, parske nou komans sa Minister nou annan en responsabilite pou elimin bann aktivite anti-sosyal, donn koudmen dan sa legzersis avek bann lafors nesese.

Alors nou a bezwen pran aksyon nesese pou nou tir sa bann netway sa bann landrwa si i nesese.

MR SPEAKER

Mersi Minis. Onorab Loizeau ti'n lev lanmen. Siplemanter, wi.

HON NORBERT LOIZEAU

Mersi Mr Speaker. Bonzour Minis ak ou delegasyon. Mr Speaker mon anvi demann en pti kestyon koman *Vice-Chair COGA* dan en vizit ki nou ti fer ansanm ek *IEA* ek serten zofisye dan ou Minister, nou ti ganny dir ki i annan en *moratorium* ki'n ganny mete lo plizyer morso later dan rezyon Ile Du Port Perseverance.

Alors mom anvi demann Minis konbyen sa bann later ki annan *moratorium* ki'n ganny mete lo la dan Perseverance ? E konbyen ki napa *moratorium* ki'n ganny mete lo la me ki pa ankor ganny devlope? Mersi.

MR SPEAKER

Mersi Onorab. Minis si ou annan repons.

MINISTER **BILLY**
RANGASAMY

Mersi Onorab. I en bon kestyon Onorab. E avek ou permisyon Mr Speaker mon ava demann

mon lekip Later pou donn mwan sa lenformasyon, parske mon napa la devan mwan avek mwan prezantman. Mersi Mr Speaker.

MR SPEAKER

So ou ava kominik sa avek Manm Onorab pli tar en. Mersi. Onorab Sandy Arissol.

HON SANDY ARISSOL

Mersi Mr Speaker. Bonzour Minis avek ou delegasyon. Mon ti a kontan demann Minis Mr Speaker an vi ki nou pe koz later Perseverance, mon ti a kontan demann Minis an vi ki later i an demann en nou tou nou konnen poudir later i en keksoz ki eksite dimoun.

Mon ti a kontan zisteman an relasyon avek Perseverance, konbyen sa bann morso later ki nou pe koz lo la, ki la *available* ki'n ganny *allocate* e ki pa ankor devlope?

Dezyenmman konbyen lezot morso bout dan Perseverance ki annan, ki aksesib, ki lib e ki pa ankor ganny met? Mersi bokou Mr Speaker.

MR SPEAKER

Mersi Onorab. Minis

MINISTER
RANGASAMY

BILLY

Mersi Onorab pou ou kestyon. Konsiltasyon pou mon *PS* Later mon aprann ki i annan anviron 7 kare later ki pe al ganny zot, an Angle nou dir sa *rescind lease*, oubyen nou pe al kennsel *lease* later. E an prensip tou bann later laba in fini ganny *assign* bann ki ti sipoze lo *lease*. E 7 pe al ganny dan sa prosesis *rescinding*. Mersi Mr Speaker.

MR SPEAKER

Mersi Minis. Onorab Lemiel.

HON SYLVANNE LEMIEL

Mersi Mr Speaker. Bonzour Minis avek ou delegasyon. Minis mon ti a kontan konnen par egzanp ou'n eksplik en pti pe avek Onorab Bastienne, me ou'n koz lo later ki pe *lease meaning* prive. Gouvernman pe *lease* avek en prive. Mwan mon oule tous sa bout ki konsern later Gouvernman.

Obor Lopital Anse Royale i annan 3 kare later, sa later i dan en leta kot mon konpran ki i pou *Ministry of Health*, so lekel ki responsab? Akoz ozordi nou pe vwar, bann droger zot profit kot later i sal menm zot pou zot antre pou zot al fer zot bann diferan trafik ki annan pou fer.

So lekel ki responsab pou netway s propriyete? Par egzanp pou *Ministry of Health*, eski in fini transfer ek li? I

annakor pou *MLUH* i zis ankor anba Gouvernman Sesel? Lekel ki responsab pou al fer sa bann netwayaz pou netwaye? Akoz sa bann later i obor semen, e i en *eyesore* i vilenn.

Lot kote ankor par devan Gard Nasyonal kote kot *ice plant*, i annan en lot bout ankor i *lease* ek en prive li osi in dir fer netway zis en fwa, apre devlopman pa ankor arive in sot 3an ou war later zis i reste abandonnen sal.

E sa i demande ki mon pa konnen si i annan en *Clause somewhere* ki kapab mete ki dir zot si pandan tel lannen ou pa ankor devlope, me ou later i sal ou bezwen netwaye.

Akoz sa i vin en problem pou nou dan distrik prezan nou pe war ou bezwen rod volonter kot pou al antre pou al netway later prive dimoun; pou al netway bout later Gouvernman, kan i merit annan serten keksoz ki kapab ganny fer. Mersi.

MR SPEAKER

Mersi Onorab. Minis

MINISTER BILLY RANGASAMY

Mersi Mr Speaker. Mersi Onorab. En bon kestyon. Mwan osi mon'n fer sa lobzervasyon dan diferan distrik kot mon'n

vizite. E bann later Gouvernman ki pou Leta me selman in ganny *assign* avek en Minister, tel ki Minister Lasante oubyen son *use* i pou rezon medikal.

Responsabilite i avek sa Minister, akoz zot deza annan tou Lotorite pou zot fer zot travay redevlopman lo la. Bann later prive i annan bokou bann later ki prive ki napa naryen pou fer ek Gouvernman, me selman i prive ki dan ban leta abandonnen, kot nou vwar ban aktivite osi i annan bokou aktivite ki pa akseptab ki pe pase.

Sa petet i en keksoz nou bezwen revwar mannyer nou pou atak sa. I pa later Gouvernman pou sir. I prive me selman atraver petet lo mon kote mon a sey koz ek Lotorite *Planning* pou vwar, eski nou kapab zwe en rol la pou donn en koudmen avek lenformasyon ki nou gannyen avek Lotorite Distrik, pou nou sey adres sa problem.

Akoz vremen sa problem i la e ou en pti pe anpaye aköz ennler sa ban propriyete pa ni dan pei zot aletranze oubyen i annan en problem zeritye. I pa vin tro fasil.

Me selman si i en *eyesore* dan nou bann landrwa piblik i pe anmenn en menas bann

problemm anti-sosyal, mon krwar Gouvernman a bezwen sey fer mannyer posibil ek Lotorite Konsernen, pou war en mekanizm mannyer nou pou adres sa bann sityasyon.

Me par kont bann later ki pou Leta *MLH* koman *eventually* nou ki pe responsab bann later Gouvernman, later Leta, nou bezwen sey adres sa avek sa bann Minister kot in ganny, oubyen Departman kot sa later in ganny *allocate* avek. Mersi Mr Speaker.

MR SPEAKER

Mersi Minis. Mon annan lezot Manm ki pe atann Onorab Lemiel, vitman silvouple si oule en klarifikasyon.

HON SYLVANNE LEMIEL

Mr Speaker Mersi. En pti keksoz ki Minis petet pa'n ganny en konpran mwan. Par egzanzp later prive i *ok* sa, mon *issue* pa ti later prive. Me selman mersi pou reponn sa Minis mon kestyon se ki later Gouvernman ki *lease* par egzanzp Kannus, i *lease* en bout later Anse Royale obor semen.

Eski Kannus toultan - napa en *Clause* ki kapab ganny mete dan *lease agreement* sa bann dimoun pou dir li poudir be ou pa kapab kit ou later pa devlope pou tan letan? Ou

bezwen tanzantan pe pase pou netwaye aköz i obor semen, i en *eyesore*. Mersi.

MR SPEAKER

Thank you. Minis.

MINISTER

BILLY

RANGASAMY

Ok. Onorab mon'n sezi ou kestyon. Sa bout i enportan i vremen enportan bann later ki nou'n *lease* i responsabilite sa *leaseholder there's no question about that*.

Me selman ou annan en bon pwèn, i posibil ki nou bezwen ranforsi nou *lease agreement*, la ki nou pe revwar ne pe nou bann Polisi pou nou met en pe plis lanfaz, pa met en pe plis lanfaz met lanfaz lo la. I pa zis, nou pa kapab zis abandonn landrwa dan en leta abandonnen, i vin en problemm pou kominote.

Mon toutafe dakor avek ou Onorab. Mersi bokou.

MR SPEAKER

Mersi Minis. Mon annan 2 Manm ki'n lev lanmen mon a termin avek sa 2. Onorab Romain.

HON GEORGE ROMAIN

Mersi Mr Speaker. Bonzour Minis ek ou delegasyon. Minis an vi ki nou pe koz lo

Perseverance, i en semen ki mon servi toulezour pou mon al dan mon distrik, mon vwar ki i annan bokou konstriksyon ki pe ganny fer, bann batiman e bann batiman ki vreman gro ki pe ganny fer lo sa zil.

Alors mon kestyon, an vi ki nou annan en batiman *Airtel* ki'n fini fer, nou war zot annan *parking* zot bann kliyan pe alinyen tou dilon semen. E an vi ki *Planning* atraver Gouvernman i toultan pe ankouraz ban *building* ki ganny fer pou fer *parking*, kekfwa *underground* dan sa batiman.

Be ki nou pe vwar nou pe vwar bann batiman ki pe ganny fer, nou pa pe war sa fasilite *parking* ki ou a dir ki pe ganny fer pou sa bann batiman.

Ki mon anvi demann Minis, eski Minis i kapab dir sa Lasanble ki garanti ki i pou donn nou ki sa semen pa pou vin en, ki mannyer mon kapab dir sa, ki pou fer plis konzasyon trafik? Parey i annan *already* dan bomaten ki menm pli tar dan apre midi nou kapab gannyen? Alors ki mon ti a kontan, ki ou vizyon lo la Minis? Mon ti a kontan ganny ou pwennvi lo la. Mersi.

MR SPEAKER

Mersi Onorab. Minis

MINISTER

BILLY

RANGASAMY

Mersi Mr Speaker. Mersi Onorab. Ankor enn fwa en bon kestyon. E wi sa semen i pa mal okipe dan bomaten e bann ler *peak hours*. E pou sir Lotorite *Planning* i travay etrwatman avek Departman Transpor ler zot analiz tou sa bann soumisyon sa bann aplikasyon.

E bokou zefor i ganny fer pou ensiste ki *parking* i pa vin lo semen, me ou enkorpor ou *parking* dan pou proze ennlér i annan bann serten sit kot i posib zot fer bann *basement parking*.

Me pli spesifikman Perseverance mon ava revwar en pti pe avek mon lekip Lotorite *Planning*, pou vwar si i annan bann defayans ki'n kapab arive. Me mon plis ki sir ki i annan provizyon dan zot *design* e dan zot aprouvasyon, pou fer sir ki semen i reste lib e *parking* ki lo zot teren li menm.

Me par kont vi ki ou'n fer sa lobzervasyon, mwan osi mon ava pran mon rol, mon ava al demann sa kestyon pou mwan annan sa konfor ki sa i leka. Mersi Onorab.

MR SPEAKER

Thank you, Minis. Onorab Larue.

HON FLORY LARUE

Bonzour tou dimoun. Mersi Mr Speaker. Mr Speaker anliny avek sa ki Minis osi fek reponn, mon kestasyon ti al dan direksyon lefe ki in mansyonnen ki Zil Perseverance i pe ganny devlope baze lo en *developer plan*, sa *developer plan* ti ganny fer boner dan lannen 2000.

E lefe ki bokou letan in pase depi ler ti ganny inisyé, eski sa plan pe ganny regete ki i vin azour avek bann nouvo proze ki pe ganny fer? E sirtou get bann problem ki nou pe rankontre la 20an apre ki i ti ganny konsevwar espesyalman lo kote konzesyon?

E mon dezyenm kestasyon ti baze lo si zot pe donn serten kriter Gouvernman ki letan zot pe met lo *lease* zot pe demann dimoun pou degaze annan en *timeline* pou kapab devlop sa later? Eski zot annan nide fer parey avek bann Minister?

Akoz i annan gran, gran later ki ganny *allocate* avek bann *Ministries* parey dan sa ka La Digue nou ti war sa later kot lopital pe al fer depi 1999, lannen 2000 ki ti ganny donner ek Minister Lasante, me 20an naryen pa'n ganny fer lo sa later.

Alor ki zot pe far anliny avek later Gouvernman ek bann ki'n ganny *allocate* ek

bann Minister pou bokou lannen me naryen pa ganny fer? Mersi.

MR SPEAKER

Mersi Onorab. Minis

MINISTER**BILLY****RANGASAMY**

Mersi bokou Mr Speaker. Mersi Onorab Larue. Ankor enn fwa ozordi i annan bann bon kestasyon.

E mon santi i enteresan akoz i en pe bann size ki nou pran bann letan nou apel sa bann *brainstorming*, bann *think tank moments* ki nou fer kot Minister ek lekip.

E i bokou bann kestasyon ki pe leve i bann keksoz ki nou osi nou trakase pou nou vwar. Be ki mannyer nou kapab regle sa?

Lo premye pwen Onorab Larue kot i konsern sa plan devlopman - wi i ti ganny konsevwar dan bann letan 2000, lannen 2000 e la nou 2022 nou'n vwar en pe bann *challenges* petet parey ou'n fer resorti. Konzesyon i enn, e petet bann landrwa kot nou ti'n idantifye pou serten *land use* e ou war li i pa pe vreman aliny byen.

So parey tou keksoz nou annan en sans, en bon loportinite la, e parey mon'n fer resorti dan mon repons nou pe

fer sa revni sa plan, en fason nou pran tou sa bann eleman konsiderasyon bann pwen konsern pou nou fer sir ki nou aranz keksoz kekfw kot i pa'n telman annord. E travay pros avek Lotorite Distrik ganny zot pwennvi e re devlop, re aziste sa plan kot i nesaser.

Lo dezyenm laspe ou kestyon Onorab nou pe met bokou lanfaz pou sir lo nou *lease agreement* konsernan *development covenant*, bann dele letan ki nou pe donn bann *leaseholders* pou zot enplimant zot proze. E plis zefor pe ganny fer pou nou sivre sa bann zafer bokou pli etrwatman, servi teknolozi tel ki *drone mapping*.

E i annan en sistenm kot nou enterkonnekte ek sistenm *Planning* kot nou sivre kan zot plan i soumet, kan i met *commencement notice*. Konmsi Departman Later avek Departman GIS tousala i ava annan en sistenm antere. I pe pran en pti pe letan pou nou demar sa. Me sa nou plan kot nou a kapab sivre sa e travay etrwatman ek distrik osi, pou nou fer sir ki sa bann proze pe respekte zot dele letan ki zot in gannyen, sa bann later *lease*.

Me par kont nou osi annan nou bann Minister ki pou osi parler i kler ki petet atraver rezon bidzeter, zot pa'n

kapab, zot pa pe kapab egzekit zot proze, oubyen i pa zot priyorite.

Sa nou pe seryezman parey mon ti fer resorti dan mon larepons travay bokou pli etrwatman tou sa bann Minister ki nou'n fini idantifye par egzanp dizon Perseverance e lezot landrwa, pou nou etrwatman annan en bon relasyon travay. Pa travay an *silo*.

E sa ki pou pli enportan prezan se an plis nou Lazans Lenfrastriktir *ok*, ki pe okip diferan Minister.

Par egzanp i pe kouver Minister Gouvernman Lokal, Minister Lasante, Ledikasyon, Lanvironnman, Lagrikiltir, Lakaz i annan en rol ki kapab re get sa bann devlopman e dapre plan stratezi Gouvernman, dapre Finans, kot i annan resours pou nou zet en koudey lo sa bann later. Fer sir ki zot ganny egzekite e ki zot ganny devlope dan sa dele letan ki zot gannyen.

So mon santi nou annan detrwa laport ki nou pe kapab pli kapab *follow* sa bann zafer, *Planning*, *GIS*, lo teren, Departman Later, osi Lazans lenfrastriktir pou nou kapab pli *on top of* sa bann zafer.

E i dan zot *lease agreement* osi, an prensip bann

lease se nou ki fer, me nou bezwen met en lanfaz, en lagreman ki pou annan serten travay nou pa pou, zot ki pou *maintain* sa landrwa, zot pou met li dan en pe parey kestyon Onorab osi. Ki annan en lantretyen pou sa landrwa e zot annan en plan pou devlop sa dan en dele letan ki rezonnab. Mersi Mr Speaker.

MR SPEAKER

Mersi Minis. Nou a pas lo kestyon swivan Onorab Egbert Aglae. Onorab Aglae.

HON EGBERT AGLAE

Mersi Mr Speaker. Bonzour Minis avek ou *panel*. Mr Speaker dabor, mon ti a kontan swet tou bann madanm sorti Port Glaud e an zeneral, en bonnfet ozordi.

Eski Minis i kapab dir ek sa Lasanble kan eski dezyenm faz proze 24/24 pou komanse e konbyen kou sa proze? Konbyen *unit* sa pou konpri? Eski proze *STP* atase ek sa devlopman i ankor lo zot program? Mersi.

MR SPEAKER

Onorab eksplik en *STP*, nou piblik tanzantan i demande ki savedir sa bann akronim?

HON EGBERT AGLAE

STP, Sewage Treatment Plant.

MR SPEAKER

Thank you. Minis.

MINISTER

BILLY

RANGASAMY

Mersi Mr Speaker. E ou kestyon i enteresan Onorab. I kler ki sa proze, son bann *challenges* ki nou gannyen, parey ou osi ou konnen Onorab, son bann defi, se sa ki nou apel bann *sitting tenants*. In fer sa proze en pe *challenging*.

Me mon le fer resorti e mon kontan poudir ki dezyenm faz sa proze, ki nou apel kot Foret Noire, Port Glaud, pou komanse ler sa kat lokater ki dan sa vye blok, pli o bor semen i kapab ganny *relocate*.

E nou determinen pou nou fer sa arive, avek lagras Bondye ankor enn fwa komansman dezyenm kar 2022. Savedir nou pe koz an Avril, mon pe pous tou pou tou Pou nou fer sa arive an Avril, pli tar. E nou plan se, *PS* Later in fini rankontre sa bann dimoun.

E sa bann zabitan, eskiz mwan. E plan se pou nou *relocate* zot dan distrik, anba Barbarons dan *Transit Home*, ki a ed nou, dan sa peryod pou kapab ganny akse ek sa later e nou kapab al konstrir sa dezyenm faz.

E ou kestyon osi ti pe dir konbyen pou koute. Sa pou kout R7.8milyon, e kou proze total ek premye faz ek dezyenm faz an tou, i estimen pou ariv R32.1milyon.

Dezyenm i konpri 6 younit, 3 lasanm. E ler proze pou'n konplete, nou pou ganny enn an plis ki sa 24/24. Nou pou ganny 25 younit. Proze *STP* li menm li in fini ganny enstale, parey ou konnen Onorab. E bann blok ki dan premye faz in fini ganny konekte. I reste zis pou konekte dezyenm faz, ler konstriksyon i fini.

Son *design* in fini ganny analize, e konsevwar pour deservi total 25 *units*. Sa son proze o konple. Mersi Mr Speaker.

MR SPEAKER

Thank you Minister. Ou annan siplemanter Onorab?

HON EGBERT AGLAE

Minis mon a dir ou mersi pou ou larepons. Minis mon ti a kontan zis met dan ou latansyon. Ou'n nonm 4 lokater ki bezwen sorti, mon krwar i annan plis ki sa, ki 4. Akoz i annan 2 blok ki ankor egziste.

I annan enn anler, enn anba ki pa ankor kraze. Eski ou pe dir mwan ki, zis enn ki pou kraze, ouswa tou lede pou

kraze, an vi ki nou annan sa sityasyon re-lokasyon ki bezwen ganny fer. Minis.

Apre Minis, mon ti a kontan petet met en lanfaz ki an konversasyon avek *PS*, ti konpri ti pou annan 8 younit. E nou'n dir i annan 6 younit. So petet si ou kapab eksplik nou en pti gin Minis, anvi ki lakaz in deza donnen Port Glaud.

E i annan *sitting tenants*, ki'n pa'n neseserman ganny alokasyon dan sa premye faz donnen. Eski zot anvizaze ki priyorite i merit vin pou sa bann *sitting tenants* ki pa'n ganny *allocate*, pou zot kapab retournen apre ler zot ganny *relocate*? Mersi.

MR SPEAKER

Mersi. Minis.

MINISTER

BILLY

RANGASAMY

Mr Speaker, anvi ki mon Sekreter Prensipal Mr Barbe i pli ofe lo teren ek tou bann detay. E eski ou kapab permet mwan pour demann li en koudmen, pou ed mwan ek sa kestyon silvouple?

MR SPEAKER

Wi, *PS*.

MINISTER

BILLY

RANGASAMY

Mersi Mr Speaker.

PS HOUSING DENIS BARBE

Thank you, Mr Speaker. Onorab mersi pou ou kestyon. Baze lo travay ki nou'n fer lo, lo sit. I annan en blok ki nou ti'n fini bouz dimoun. Me selman i ankor pe debout. Sa kontrakter ti pe servi.

Ler nou pou bouze kontrakter pou bezwen demoli. E sa 4 dimoun prensipal, i tonm dan sa blok par anba. So ler ki zot in fini bouze, nou osi nou pou bezwen fer demoli lakaz pou fer lespas pou konstriksyon antye.

Wi petet dan mon kominikasyon avek, kominikasyon verbal, mon'n dir ou 8 younit, sa i en *mistake* lo mon par. Me selman sif final ki nou'n gannyen nou de Departman Lenfrastriktir i 6 younit 3 lasanm. Sa in konfirman.

E baze lo diskisyon ki nou'n fer, dan preparasyon pou alokasyon, nou komitman i *still* reste pou nou *allocate* nou bann dimoun ki ti la, an premye lye. A kondisyon ki zot pe pey, zot bann repeyman lakaz. E parey ou konnen i annan enn de ka ki nou pe egzamin enn pti pe pri baze lo sirkonstans spesifik. *Thank you*.

MR SPEAKER

Thank you. Siplemanter wi, vitman. Onorab Aglae.

HON EGBERT AGLAE

Yes, Minis. Mr Speaker mersi. Minis. *PS* mersi pou ou larepons. Petet Minis mon ti a demande, vi ki ou pa'n la dan serten bann diskisyon ki'n ganny fer ki akord Port Glaud, en lodyans avek ou pou nou diskrit en pe avek ou *PS*, lo sa dezyenm faz. Mersi.

MR SPEAKER

Mersi. Mon asire Minis i a *note* sa. Mersi bokou. Sa i kestyon ankor, i spesifik lo en distrik. Me mon a pran de siplemanter. Manm ki'n lev lanmen silvouple. *Ah!* I fer trwa, Onorab Cosgrow.

HON WALLACE COSGROW

Mersi Mr Speaker. Bonzour Minis, avek ou tim devan. Mr Speaker anvii ki nou lo 24/24. Si mon konpran byen, koman en zabitan Plaisance, Plaisance son 24/24 ti redevlopman an Kangard. Eski Minis i kapab dir nou kan, eski sa redevlopman pou konplete?

Akoz nou konnen i annan serten bann lakaz ki'n deza ganny fer. Kan eski sa redevlopman pou konplete? E eski pou annan lezot

devlopman dan *style 24/24* dan distrik Plaisance. La mon pe mazin later Murray e osi petet *Société du Logement Belvedere*?

Mersi Mr Speaker.

MR SPEAKER

Mersi Minis. Plaisance 24/24. Ale annord silvouple. Yes, PS.

MINISTER **BILLY RANGASAMY**

Mr Speaker, mon a les PS reponn sa. Apre si i annan lezot pti bout mon ava azoute. Avek ou permisyon.

MR SPEAKER

Ale PS. Ou adrese.

PS HOUSING DENIS BARBE

Mersi Mr Speaker. Onorab redevlopman Corgate, Kangard Plaisance i kontinyen. Nou stratezi se firamezir nou tir dimoun, nou fer lespas pou nouvo konstriksyon.

Lotorite Distrik i konn enn pti pe nou plan ki mannyer nou pou bouz de lavan. An realite, *timeframe* pou nou enplimant konplisyon redevlopman Kangard Plaisance, i tou depan lo portfolyo bidzeter. Tou prenon kont sityasyon ekonomik ki nou ladan. So nou pe sey get enn pti pe *outlook* 2023, 2024 ki mannyer i ete. Pou nou kapab vin ek en

program travay, pou devlopman Kangard.

Nou annan bann lezot proze *Société du Logement Belvedere* ki nou'n fini si oule annan en plan stratezik ki mannyer nou bouze. Li osi i depan lo finansman avek lespas pou nou bouz dimoun. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Bonzour Minis ek ou delegasyon. Mr Speaker mon ti a kontan demann Minis, dan sa lespri transformasyon, e dan anba sa nouvo Polisi li menm li, kwa ki pou, kwa ki pou ganny mete, kwa ki pe ganny oubyen ki mannyer zot pou adres bann sityasyon parey letan Gouvernman pe aste en bout later.

Les dir parey Glacis, pou fer 24/24 en pe parey Port Glaud osi, pou fer sir ki bann lenfrastruktir, i ganny mete? E i annan sa konsiltasyon ek bann lezot, lezot *stakeholders*.

Parske dan miting *regional team* mwan pase, PUC, SPTC osi ti dir ki letan ki Minister pe fer en proze lakaz, i napa sa konsiltasyon, pou regarde si kot zot pe fer sa proze i annan fasilite pou bis arive. E PUC osi,

i annan fasilité pou pas bann tiyo bann zafer.

Kwa ki pe ganny fer pou adres bann size koumsa? Mersi.

MR SPEAKER

Tre byen. Minis.

MINISTER

BILLY

RANGASAMY

Mersi Onorab pou ou kestasyon. Mersi Mr Speaker. Stratezi ki mon'n met an plas se atraver, Lazans Lenfrastriktir, ki ler nou bann proze i lo faz, parey nou apel sa *pre-planning*, konmsi nou ankor, parey nou dir sa lo *drawing board*, pe met lide ansanm.

Ki i annan sa konsiltasyon etrwat, avek bann Lazans konsernen. Menm *PMC* par egzanp ki bezwen antretyen lo sa bann batiman pou nou angaz avek zot.

E sa ki enteresan se ki lo *Inter-ministerial Committee* ki sa Lazans i annan. I annan tou sa bann proze pou bezwen prezant ek zot. En fason zot bezwen *convince* sa komite ki nou annan sa konsiltasyon avek, zisteman avek *PUC* par egzanp, ek *SPTC* konsernan bis.

So dan lavenir mon santi ki nou pou bezwen adres sa seryezman. Parske wi, nou pa kapab, konmsi negliz sa. I kler,

in annan serten devlopman sa konsiltasyon i manke. So nou pou travay dir.

Lenfrastriktir parey zot in ganny prezante Lazans Lenfrastriktir i annan en rol primordyal pou fer, ki nou bann proze i ganny byen planifye. I ganny byen konsevwar.

E an menm tan la ki nou annan sa pti restriksyon finansyer, i donn nou letan pou nou pran plis letan pou nou planifye nou bann proze.

E mwan koman sa *Chair* pou sa Komite, i mon responsabilite osi pou met plis lanfaz lo la Onorab. E mon asir ou ki i mon devwar e mon annan tou, tou mon konvenki ki nou bezwen kapab, nou kapab adres sa. E nou pa fer keksoz *piecemeal*, nou fer keksoz dan en fason ki annan en bon planifikasyon.

Me selman ki mon le fer resorti, stratezi Gouvernman en pe anba nouvo Polisi se, maksimiz nou resours ekonomik. Maksimiz sa larzan *tax payers*. So kot i annan bann teren ki telman agresiv e kout bokou larzan, nou pou eliminen. E redwir sa bann kalite konstriksyon e *focus* lo bann teren kot i pli vyab pou nou konstrir.

En fason ki nou kapab fer bann proze ki soutenab. Sa nou

stratezi dan nou Polisi. E mersi Mr Speaker.

MR SPEAKER

Mersi Minis. Kantmenm nou depas Port Glaud annou sey reste lo 24/24. Onorab Gabriel. Mikro Minis. Ou'n gannyen.

HON CONRAD GABRIEL

Mersi Mr Speaker. *Welcome* Minis ek ou delegasyon. En bonzour spesyal zabitan la Pointe La Rue. Vitman, parey lezot koleg mon a zis swet, bann madanm *Happy Women's Day*.

Dezyenm pwen lo kestyon Mr Aglae, i lo *STP*. Minis vitman, ou konnen poudir i annan proze *ex-Albert*. Anonyme View Estate ki de proze 24/24 dan distrik Pointe La Rue.

Zis koman nou lo sa size *STB*. Si ou kapab donn ou en pe detay, lo ki zistans ou Minister i arive pou konekte *ex-Albert* avek Anonyme View, pou kapab soulaz en pe sityasyon anler dan Pointe La Rue? Mersi.

MR SPEAKER

Thank you, Onorab. Minis wi.

MINISTER **BILLY RANGASAMY**

Mersi Mr Speaker. Mersi pou ou bon kestyon Onorab. E zeneralman, sa ki nou apel *topo survey* in fini ganny fer pou nou

analiz teren. Akoz i kler ki kot pozisyon, *ex-Albert* i ete, avek kot *STP* i ete i annan en teren en pti pe agresiv.

So nou'n bezwen annan en eleman *topo* pou nou fer sir nou *design* i konplet. E sa in fini ganny fe. So nou plito dan en staz konplet nou *design*. En fason ki nou kapab al met sa propozisyon lo *tender*. Epi ganny aprouvasyon *Planning*.

So nou dan sa staz pou lemoman. E i en stratezi. Nou'n fini fer sa *STP* alors i dan nou lentere o pli vit posib pou nou fer sa koneksyon ek sa sistenm. Mersi.

MR SPEAKER

Mersi Minis. Nou a pas lo kestyon swivan Onorab John Hoareau.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun a lekout. Bonzour bann Onorab. Mon kestyon i lir koumsa: -

Eski Minis i kapab eksplik nou Lasanble akoz ki bokou lakaz *duplex e flat* dan plizyer distrik, enkli Nouvelle Vallee, Beau Vallon i ankor pe ganny problem twil ki'n sorti e lakaz koule? E osi problem asosye avek basen dan plafon, menm si Minis ti'n donn son

langazman pou remedye sa bann problemn?

MR SPEAKER

Mersi. Minis.

MINISTER **BILLY**
RANGASAMY

Mersi Mr Speaker. Mersi Onorab pou kestyon Onorab. Wi mon ti donn mon langazman, e mon ankor senserman determinen pour oner mon langazman.

I pa en keksoz ki, ki'n ariv dan mon letan dan lofis. I en keksoz ki la en pe letan pase. Ankor enn fwa, Mr Speaker sa *Scheme*, zis mon oule fer resorti ki sa *Scheme* pou asiste bann fanmir pou dekouver tou sa bann lakaz - 756 lakaz, ki annan sa twil, sa *concrete tiles* dan bann *housing estate* ti ganny aprouve par Konsey Minis, ansyen Gouvernman an 2018.

Mr Speaker ankor enn fwa mon pou fer resorti i annan 756 lakaz dan bann diferan *housing estate*. E zis 13poursan sa bann lakaz, bann zabitan in aste. Eskiz mwan, zis 13poursan pe ganny lwe. Larestan, larestan bann zabitan in deza aste zot lakaz. So 87poursan in fini ganny aste. E 13 poursan pe ganny lwe.

PMC ti komans ek 9 proze an 2020, e in reisir konplet zis 2 proze. 12 younit Grand Anse, *STC* plat. E 8 younit Arkanz Misel, Anse Aux Pins. Malerezman larestan proze, zot ti'n fini *tender*, e zwenn bann kliyan.

Me *PMC*, in rankontre pa mal difikilte, pou fer progre. Akoz bann kliyan pa'n aksepte sa bann pri. An 2020, estimasyon pou ranplas sa bann *roofing tiles*, avek tol ti anviron R70milyon.

Sa ti apepre anviron R100mil par lakaz. Onorab, pou proze Nouvelle Vallée, *tender* in fek ganny fer. E nou dan staz evalyasyon. *PMC* ek Minister i konsernen avek bann pri ki nou'n gannyen.

Alors prenon kont istorik sa zafer, mon'n donn direktiv mon lekip teknik ansanm ek *PMC*, pou reget bann opsyon. Parey nou dir, *think outside the box and be smart*. E vin avek bann solisyon ki pli abordab.

E mon fyer poudir ou, ki sa legzersis pe ganny fer osi. E Mr Speaker mon konvenki ki nou ava dan en pli bon kondisyon, pou re-apros bann kontrakter avek bann posibleman bann nouvo teknik apros sa problemn.

E posibleman bann nouvo teknik *procurement*. Mon ava al

an pe plis detay dan lavenir, *once* ki mon'n ganny, nou'n kapab adres sa bann revi a lantenn.

Be Mr Speaker konsernan sa bann tenk delo ki Onorab in demande, ki dan plafon dan sa bann lakaz, *PMC* pe enkorpor zot, sa bann tenk delo dan zot proze pou refer twatir. Zot pe enstal bann *fiberglass tray*, anba sa bann tenk pou protez plafon an ka i annan en *overflow*.

Zot osi pe ranplas bol *valve* e *fittings* avek sa bann tenk. E fer sir ki tou tenk, i annan son sistenm tiyo *overflow* apropiye. Sa i bann aktivite ki'n ganny fer, sirtou lo sa de proze ki nou'n fini konplete.

E nou stratezi se pou fer, menm zafer. Me par kont kot i konsern son twil li menm, nou pe regard bann posibilite koup kou, regard bann solisyon, pli enteresan, pli apropiye, pli abordab. Mersi Mr Speaker.

MR SPEAKER

Mersi. Minis. Mon annan trwa Manm. Wi ou annan en siplemanter Onorab Hoareau. Mikro.

HON JOHN HOAREAU

Mersi Mr Speaker. Mr Speaker, vi ki sa travay i en travay ki

parey Minis in dir, i kout bokou larzan. E i kout R70milyon pou fer, dapre son odit, eski sa larzan i en larzan ki'n ganny bidzete pou sa *specific purpose*? Oubyen se sa larzan ki ganny anmase par *PMC* ki servi pou fer sa kalite travay?

Akoz mannyer mon konpran, *PMC* i anmas apepre R60milyon par lannen. E ladan 40milyon i ganny servi pou fer mentenans lo bann lakaz. Sa i mon premye.

Dezyenm kestyon, Mr Speaker, bokou dimoun in eksprimen ki sa bann basen delo, i devret ganny mete an deor lakaz. Menm si zot met sa *tray*, petet si *tray* aprezan i plen anba la, i rekoul ankor dan lakaz.

So pour evit sa problemn, Minis si ou ti kapab dir nou si zot pe konsider opsyon, pou met bann tenk an deor lakaz lo bann striktir silvouple. Mersi.

MR SPEAKER

Mersi. Minis.

MINISTER **BILLY** **RANGASAMY**

Mr Speaker avek ou permisyon mon a demann *Deputy CEO PMC* pou ed reponn kestyon Onorab. E mwan mon ava azout lezot pwen, si i nesaser.

MR SPEAKER

CEO wi.

DEPUTY CEO PMC STEVE MUSSARD

Mersi Mr Speaker. Bonzour tou Onorab. Mon premye kestyon Onorab Hoareau, konsernan sa finansman. Sa finansman i vin atraver Bidze Gouvernman.

Nou ganny nou an 2020, Gouvernman ti donn *PMC* R10milyon pou komans sa proze. E ladan parey Minis in fer resorti ki nou'n reisi fer zis de proze. E si ou get sa balans ki reste nou la, apepre R8milyon keksoz ki reste dan sa Fon, dan sa finansman ki nou'n gannyen.

Konsernan ou dezyenm kestyon konsernan bann *tray*, wi nou met bann *tray*. Wi nou met bann *tray* me selman nou pa kit *tray*, zis en *tray* dan vid. Sa *tray* i vin ek en pti tiyo, pa enn pti tiyo, en tiyo apropiye, ki i vin en *overflow* dan sa *tray*.

Sa an ka i annan *overflow* dan sa tenk, i annan en keksoz en problemm avek, i pa zis *overflow* lo tenk menm. Me selman lo son *tray* osi i annan en pti *overflow*. Sa ki adres sa problemm ki nou pa zanmen ganny ankor sa problemm dan plafon. Mersi Mr Speaker.

MR SPEAKER

Mersi Minis. Ou ti pou azout keksoz. Oubyen nou a kontinyen.

MINISTER BILLY RANGASAMY

Mon kapab azout en lot pi pwen Mr Speaker avek ou permisyon. Se ki, i pou osi ki nou annan enn de bann *challenges*, ki bann defi ki nou e rankontre. Ek sa problemm, twil e parey mon pe dir, i annan legzanp, dan Sesel kot bann dimoun, ki ti'n fini ase zot lakaz, zot in pran zot linisyativ, e zot in fer zot proze l o zot menm. Par egzantp dan distrik Roche Caiman i enn.

Me nou konpran ki sa i en sityasyon istorik. Me selman kot dimoun i kapab fer, mon pe dir be, pa ezite be pa zis totalman depan lo Gouvernman.

Alors sa ki kapab, nou konnen pa tou dimoun petet i kapab, fer li deswit ek sa kou ki i vin avek.

Me sa ki kapab pa les son sityasyon kontinyelman vin deplorab. E parey mon'n dir boner, *PMC* i annan sa Bidze ki gannyen. Me i pa zis sa problemm twatir ki i pe koz problemm, i annan detrwa lezot keksoz ki i pe adrese.

E alors nou annan en, plan nasyonalm, mon pe

travay pros ek zot. Mon Departman Lenfrastriktir, ti pe travay pros ek *PMC* pou donn lasistans teknik pou nou idantifye sa bann problem e travay le mye posib, pou nou fer bann regle sa bann problem, lo en nivo nasyonal dan en fason organize. Mersi Mr Speaker.

MR SPEAKER

Mersi Minis. Mon a pran sa trwa Manm ki'n lev, e pa bliye nou lo sa keston twil lo lakaz. Onorab Roucou.

HON MICHEL ROUCOU

Mersi Mr Chair. Bonzour Minis ek ou lekip. Mr Chair mon osi tou mon oule, swet tou bann madanm dan mon distrik en bon lazournen. E tou bann ki dan Sesel osi.

Minis *regarding*, sa bann *tiles* ki lo lakaz ki nou pe koz lo la, la en, ou'n dir poudir se ki zot pe rankontre pa mal problemm avek bann zabitan. Akoz zot pa pe dakor ek bann kondisyon ki zot pe vin avek.

Si ou kapab dir nou kalite bann kondisyon ki zot pe vin avek ki bann zabitan pa pe tonm dakor avek?

Apré osi, sak fwa bann *housing estate* i ganny *allocate*, i annan en *retention*, lan ki ganny donnen, kot la sa

kontrakter ki'n ganny, ki'n ganny sa louvraz pou *Bill sa housing estate*. Li i retournen i repar okenn bann *defect* ki annan avek sa lakaz.

Mon vwar poudir souvandfwa sa i vin ek pa mal problemm. Swa kontrakter pa vin rezourd, pa vin ditou pou *sort out* sa bann problemm. Swa kontrakter ki vini zot pa ganny en konpran ditou Angle, ki bann dimoun pa kapab kominik avek zot.

Apré osi in annan bann problemm, sirtou parey Corgate Estate osi tou, dan bann problemm ki annan an tou, se bann *tiles* ki leve ki zot mete. Mersi.

MR SPEAKER

Mersi. Onorab, Minis.

MINISTER

BILLY

RANGASAMY

Mersi bokou Mr Speaker, mersi Onorab. Onorab i kler ki i neser pou ranforsi sa sipervizyon, e analiz e swiv pros bann proze letan in fini ganny *allocate*, dan sa peryod *retention*.

Sa mon pa pou kasyet ou, nou annan en pe defayans ladan. E nou bezwen ranforsi sa. Ankor enn fwa sa lespri travay ki mon pe ankouraze ek *PMC*, se zot ki pe zer sa bann

lakaz letan in fini *allocate* pou alert nou, o pli vit posibil pandan sa peryod lan ki annan sa *retention period*, parey ou'n dir pou nou *pitch* lo sa bann kontrakter.

E fer sir kantmenm zot pa konpran Angle, oubyen pa konpran Franse *whatever*, ki zot pou kapab konpran i annan en problem ek zot lakaz ki zot in konstrir.

So nou pa pe les sa *drag*, apre zot fini sa lan apre nou de lanmen i tonbe. Mon pe demande, ki e mon pe asir ou ki, sa i annan plis sa. Sa zefor pou nou travay etrwatman pou nou kapab regle sa problem. E mon krwar mon'n reponn ou kestyon Onorab.

Tiles dan proze Corgate, wi. Wi ane se sa. *Tiles* dan proze Corgate nou pe repas lo sa bann landrwa aköz sa bann proze, ankor enn fwa, nou bezwen analiz nivo kritik ki nivo leta, ki degenn i ladan pou nou kapab sey akseler sa bann kalite travay o pli vit posibil.

Mon krwar ki mon pou bezwen fer Onorab, parey nou'n enn de bann pwen nou'n fer resorti, i neser parey nou'n planifye pou mwan al vizit en pe pou mwan menm, sa bann landrwa pou mwan kapab konpran, kot kefwa ki ou konnen pou alert mwan.

Pou mwan travay ek mon lekip, pou nou regle sa bann zafer en. Mersi bokou.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Mr Speaker mon ti a kontan demann Minis letan nou pe koz lo twil, lo lakaz Nouvelle Vallée. Letan Minis pe dir koup kou pri, zot pe negosye en pri pli abordab nou bezwen pran kont poudir, sityasyon i vin pli deteryore.

E bann fanmir i annan en kantite lannen espere e zot sityasyon i vin pli pir. Alor mon ti a kontan demann Minis, aköz ki Gouvernman pa revwar avek sa lakonpanyen ki ti *provide*, Minister Lakaz sa letan avek sa bann twil, ki pa lo standar.

Ki pa'n ariv son letan pou li osi met son lanmen dan son lakonpanyen e fer en kontribisyon anver Gouvernman. E bann dimoun ki pe anmas le konsekans avek son twil pa lo estándar? Mon premye kestyon.

Mon dezyenm kestyon mon ti a kontan demann Minis se an relasyon avek bann basen dan plafon. Kan eski *PMC*, *Planning*, *PUC*, Gouvernman pou aret fer bann konstriksyon.

Sirtou bann proze blok flat avek bann basen dan plafon?

Parske nou tou nou konnen ki son konsekans. Kanmenm zot sey eksplik nou en desarz deor, en desarz akote pa marse. Plizyer lakaz in inonde. E dezyenmman Minis, an relasyon avek sa se ki i *provide* en dimoun pou rantre dan ou lakaz atraver sa lespas ki zot mete dan koridor.

En dimoun i otomatikman antre dan ou lakaz. I kapab ganny akse ek ou lakaz, par defons ou plafon. E antre anndan kot ou.

Kan eski zot pou arete, ek sa sistenm met basen dan plafon? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi bokou Mr Speaker. Mersi Onorab ankor enn fwa de bon kestyon. Mon a komans ek dezyenm kestyon kot i konsern bann tenk dan plafon. Lo tou bann nouvo *design* ki nou pe fer pou bann, aprezan nou pe fer plis bann blok flat.

Nou pe ensiste ki bann tenk delo, i dan bann *zone* ki nou apel sa bann *common areas*. Savedir par lao leskalye, kot i deza annan en slab beton,

dan sa *border*. E sa slab beton i annan en sistenm, anler dan plafon i *surrounded*, dan son bann kat kote i annan en pti ranze blok ki kapab konteni sa delo si i *overflow*.

E akse pou al laba anler osi i *from* leskalye. So ou pa bezwen antre dan okenn lakaz, vwazen. So sa stratezi mannyer nou pe, tou nou bann *design* ki pe sorti. E i en pti eleman lafebles, ki nou'n vwar dan lepase.

Manrmay in fer zot mye, e zot in aziste sa. Lo sa lot pwen i en eleman en pe delika, parski kontra aktyelman, nou pou bezwen al reget bann kontra. Ki mannyer Lagreman ti ete ek UCPS, parske sa ti atraver en kontrakter, pour sir.

So i annan en pti pe, konplikasyon, i enn pti pe delika. Be toudmenm ou'n fer rapor sorti, nou ava sey analiz sa, nou regarde ki nou kapab fer. Mersi bokou.

MR SPEAKER

Mersi. Onorab Vidot.

HON AUDREY VIDOT

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm Onorab. E tou Manm piblik ki a lekout. Mon profite osi e mon a dir bonnfet madanm a tou bann

madanm e bann zenn fiy dan Sesel. E espesyalman dan mon distrik Roche Caiman.

Minis ler ou pe koz lo bann *roofing tiles*, mon rapel dan sizyenm Lasanble, i ti annan en lager kot distrik Roche Caiman, Port Glaud, Takamaka, sa letan ek English River, ti demann avek Gouvernman pou vin avek en *Scheme*.

Se pou ed bann fanmir akse avek en *loan*, pou zot kapab repar sa bann *roofing tiles*. Akoz finansyerman sa bann dimoun ki reste dan sa bann younit. Zot mwayen pa permet zot. Lamazorite zot, pey dan zot pos, oubyen ganny akse ek en Labank Komersyal pou zot kapab repar sa bann twatir.

Se pour sa rezon atraver, *PMC* zot ti ganny sa serten sipor. Me kontrent ki vini, ki legzanp mon donn lo mon distrik Roche Caiman, se ki bann *semi-detached*, mazorite zot ki atase ansanm i annan serten younit, ki zot twatir i kole ek kanmarad.

Petet ou a ganny enn ki nobou kapab aranze lo li menm. Ki li i pa konekte avek lezot, i enn pti pe pli o. Me par kont i vin kontrent se ki ler enn i pare pou li antre lo program, lot li i dir ou son lakaz pa ankor koule. Li i pe esper li koule li.

I pa ankor koule, prezan i vin en kontrent, pou li antre lo sa *Scheme*, pou fer en sel sanze. Eski i annan, mon pa konnen si petet bann teknisyen in aprofondir, pou vwar. Si vremen i annan en keksoz ki kabab ganny fer, ki omwen otan sa bann dimoun i nobou kapab, aranze repar zot younit.

Menm si enn i dir, i pa ankor pare. Me annan kek, akoz mon konnen i annan en bon pe zot Roche Caiman, ki *still* zot pa ankor aste zot lakaz. Zot ankor pe peye akoz zot annan aryeraz. Se pou sa rezon ki zot pa ankor al lo *purchase*, oubyen tou sa lannen menm si zot in ganny loportinite pou peye, pou aste pou vin pou zot, zot pa ankor.

Me annan en fason ki zot kapab ed sa bann dimoun repare. Akoz i vin en lenkonvenyans, en kantite. Akoz apre osi i afekte, sa lot ki li in pare pou li aranz pou li, i pa kapab. Sa i enn.

Apre, an term *response PMC*, nou santi i ankor annan en konsern, lo sa size kot serten bann tenk delo ki swa i dan blok flat oubyen dan sa, pou kapab adres bann konsern ki bann piblik, i fer rapor avek zofisye.

Petet pa les li vin tro agrave, ki apre Gouvernman i

vwar li, i bezwen al pey domaz, bann lekiman, bann keksoz sa endividi. Akoz in en problem, teknik dan bann konstriksyon ki'n ganny fer.

La parey mon get nouvo blok, sa dernyen blok flat Roche Caiman, i annan serten konsern, ki dimoun in raporte ki apre i vin en lenpak lo zot bil delo pou peye.

Me *response* pou *PMC*, petet rod kontrakter pou kontrakter fer en bon travay. E *assess* osi travay ki bann kontrakter i fer. Mersi.

MR SPEAKER

Mersi Onorab. Minis. Ou annan repons?

MINISTER

BILLY

RANGASAMY

Mersi Mr Speaker. Mersi Onorab pou ankor enn fwa ou bann bon keston. Mon lo size *PMC response*, mon ti ava swete si ou ti ava les mwan Mr Speaker pou demann *Deputy CEO PMC* pou adres sa keston.

E osi bann *Scheme*, ki nou pe petet konsidere pou tir sa presyon kou. Mon a les *PMC* eksplike si non mon ava azoute mon osi apre. Mersi Mr Speaker.

MR SPEAKER

Mersi ale *CEO*. Pran laparol.

DEPUTY CEO PMC STEVE MUSSARD

Mersi pou ou keston Onorab. Konsernan sa, *issue* ki bann lakaz *terrace* ki mon prezimen ou pe koz lo la. Ki enn in pare, enn pa ankor pare. Sa i enn bann defi ki nou pe rankontre, sa. I vre, i pa manti.

E nou bezwen re-angaz nou lekor, *PMC* pou nou annan sa dyalog enn pti pe pli aprofon avek tou sa bann kliyan. *Be it* i pe lwe parey ou pe dir, e swa in aste. Sa i en legzersis, osi ki nou pe diskite parmi sa revi ki nou pe fer avek Minister avek Lazans Lenfrastriktir, pou nou regarde, ki mannyer nou kapab fer sa proze mars enn pti pe pli byen.

Pa zis abordab, be enn pti pe pli efektiv. Pli vit, e ki nou kapab adres sa problem dan en pti dele letan pli kourt posib.

E si mon pou reponn zot lo term, lo *response time* ki *PMC* i donnen, i annan en konsern, i annan en konsern, mon pa dir ou non. I annan en konsern, in la depi en bon pe letan. E nou pe revwar nou striktir, nou pe revwar lafason ki nou travay, nou pe revwar nou fason, nou lapros avek nou bann kliyan dan nou *housing estate*.

How do we, ki mannyer nou kapab *respond* pli vit. Ki

manner nou kapab angaz nou, pli meyer avek kliyan. Ou pou remarke sa lannen ki, *PMC* pou annan bokou bann miting *estate* ki nou fer lo *estate*. Nou'n deza komanse aktyelman.

E kot nou pou, kot nou pe sey angaz nou pou nou - konmsi annan sa, maryaz, sa lantant ki nou, montre poudir *PMC*, i la, i *care* pou dimoun, pou deservi sa bann kliyan lo *estate*.

So mon prezimen ki, mon pa prezimen, mon *hope* ki sa lannen ki la nou pou vwar en *PMC* en pti pe pli reformen, pli alaoter problem nou bann kliyan lo *estate*. E sa ki ou pe dir la, petet i ava i pa en konsern. I pa en tro en gro konsern. I pou touzour en konsern aktyelman. I pou annan i pou touzour annan sa, sa difikilte kot, aköz *PMC* i bezwen rod kontrakter, pou fer sa bann travay.

So avek nou fason ki nou pe restriktiriz nou lekor, nou pou vwar ki nou annan en lapros pli vit ki nou donn sa bann zabitan. E sa mon kapab, konmsi mon kapab donn ou lasirans pou dir pou annan en pe amelyorasyon dan nou fason ki nou reponn nou bann kliyan.

Lo kote sa nouvo blok ki ou pe dir. Sa wi, nou gannyen konplent, me vi ki i ankor anba

retention, nou *refer* sa bann konplent avek Minister. E la kot petet i annan sa pti dezagreman - sa pti parey Minis in eksplike ki nou bezwen travay enn pti pe pli for. Aköz *retention* i annan sa bann problem. I annan problem pa kapab dir ou non ki kontrakter kot Minister ki'n fer sa bann lakaz, i pa pe reponn lapel.

Pa zis kot Roche Caiman, ki annan sa. Dan bann lezot *estate* osi nou ganny sa problem.

Selman sa nou pe revwar nou lekor avek Lazans Lenfrastriktir ki manner nou kapab reponn pli vit pou sa bann konplent ki vini pandan sa letan *retention*. Mersi Mr Speaker.

MR SPEAKER

Mersi Minis. Ou ti pou terminen lo sa pwen.

MINISTER

BILLY

RANGASAMY

Wi-wi. Mersi Mr Speaker. Mwan mon anvi zis fer resorti, ki dan sa peryod transformasyon, nou pe seryezman - *PMC* anba bokou presyon, sorti kot mon Minister osi.

E mon konpran zot *challenge* ki zot annan. I annan bokou limitasyon kapasite. Sa nou pa kapab konmsi kasyet

pou nou dir zot *fully sharp*, tou dimoun i koste. Sa ki pe fer zot zefor.

Selman i kler ki nou annan, serten defayans nou bezwen adrese, Onorab. E nou pe donn li tou - parey mon pe dir Lazans Lenfrastriktir pe travay, bokou pli pros pou donn *PMC* tou koudmen.

E tou lede kote i annan lafebles, so nou pe travay ansanm ranforsi lekip, pou nou kapab pli *sharp* lo nou bann *response time*. E annan plis, profesyonnel konmsi, parey nou pe *run* sa bann landrwa koman nou prop biznes.

Dan en fason ki fer, konmsi i vo lapenn pour sa kliyan i santi li, annan sa latansyon ki i merite. Me lo pwen, lo pwen ki ou ti fer resorti, mon anvi zis adres sa.

Letan ti annan sa *Scheme*, dizon en legzanp apepre R100mil, i pe koute pou refer sa travay ki pa zis twil par kont i annan louvraz, twatir li menm son dibwa, son *flasher board* son dalo, son tenk delo. So, letan nou pe dir sa en legzanp ; e i ariv anviron R100mil, sa *Scheme* li i ti en *Scheme*, nou pa ti pe al met sa fardo lo deswit lo sa kliyan.

I ti parey en *loan*, parey ou ti'n fer resorti ki, pou annan en peryod 10an, kot sak mwan i pe

pey pa plis ki en R1000 par egzanp. So sa lo li menm, ti pou tir sa presyon en sel kou, *spread* sa *cost*.

Me par kont menm ek sa *Scheme* bokou kliyan pa'n tonm dakor. So i en pe bann defi ki zot in rankontre. Me firamezir ki nou, nou vin devan nou'n montre, nou'n fer tou mye posib, nou'n rod tou solisyon ki pli, bann alternativ ki pli efikas, ki pli - ki petet koup lo kou, Sa kliyan a realize nou pe fer tou nou mye posib. E i a donn nou en koudmen nou a travay ansanm.

Ek sa Bidze ki nou annan, nou a kapab lans sa bann proze, e nou a fini avek. Nou a kapab amelyor zot sityasyon avan ki koule. Lot landrwa i, tonm plis dan, dan bann leta deplorab. Mersi Onorab.

MR SPEAKER

Mersi Minis. Noua pas lo kestyon swivan. Onorab Andy Labonte.

HON ANDY LABONTE

Mersi Mr Speaker. Bonn apre midi Minis avek *panel*. Bonn apre midi tou dimoun a lekout. E mon pran sa lokazyon pou mwan, swet tou bann madanm dan Sesel en bonnfet, ozordi.

Mr Speaker mon kestyon i lir koumsa Minis: -

Aprè plizyer konsèrn sorti kot bann kliyan *HFC*, an relasyon avek *part-rental*, an vi ki sa servis i nepli anba Minister Lanplwa ek Zafer Sosyal e in bouz avek Minister responsab pour Later ek Lakaz, eski Minis i kapab donn nou sa bann lenformasyon swivan;

Premyèman, lekel bann diferan Minister ou Departman ki asiz lo sa komite ki aprouv bann laplikasyon pour sa lasistans?

Dezyèmman ki bann kriter de baz pou kalifye en tel lasistans?

Trwazyèmman konbyen laplikasyon zot in resevwar ziska prezan?

MR SPEAKER

Mersi Onorab. Wi Minis.

MINISTER BILLY RANGASAMY

Mersi Mr Speaker. Mersi Onorab en bon kestyon. En kestyon ki preokip bokou dimoun. E permet mwan Mr Speaker zis, pou fer en pti koreksyon.

Mon konpran ki *part-rental* ti ganny transfer sorti Minister Later ek Lakaz pou al *ASP* an Mars 2020, aprè sityasyon *COVID* dan pei.

Sa servis ti retourn kot Minister Later ek Lakaz an Zanvye 2021 anba nouvo administrasyon. E aprè aprouvasyon Bidze, Minister ti komans ofer sa servis an Me sa menm lannen. Gide par en nouvo Polisi, avek bi pou met en pe lord, elimin labi, ki posib pou arive, e ed bann ki byen merite.

Ler mon dir labi, labi i annan diferan sityasyon. Kot ou vwar i annan kolizyon, par egzant bann propriyeter ek bann lokater. Epi zot vin kot Gouvernman zot dir sa, sa pri, epi zot kas anba zot de.

So an prensip mon pe sey servi bann mo en pe brit la. Me selman zis pou mwan alert tou Manm, e nou'n met en pti pe lord ladan. En bon mannyer lord nou'n mete.

Sa servis in retourn kot Minister Later ek Lakaz an Zanvye 2021, parey mon'n fer resorti. E pou reponn ou kestyon, Onorab, mon le fer resorti ki tou laplikasyon, *part-rental* ki zwenn kriter de baz, i pas devan en Komite Evalyasyon, ki konpri sa bann manm swivan ;

Sa ti enn ou kestyon, i konpri reprezantan Minister Finans e zot ki Chair sa Komite. Departman Lakaz, Lazans Proteksyon Sosyal, Departman Lanplwa, Departman Zafer

Sosyal, Gouvernman Lokal, Minister Lafanmir.

Minis Rangasamy, Minis Lakaz ek Later i pa lo sa Komite. Sa pou fer sir ki politik pa antre dan sa enplimantasyon, sa *Scheme*. Sa i tre enportan. E Mr Speaker, pou reponn dezyenm parti kestyon Onorab, lo bann kriter de baz pou kalifye, pou en tel lasistans. Sa i *comme swivan*: -

Enn bann aplikan i bezwen annan en aplikasyon lakaz kot Minister. E pe kontribye aktivman zot *Home Savings Scheme*.

Dezyenmman zot bezwen dan lanplwa, sa nou pe ankouraze, parske sa i tre enportan sirtou si zot bezwen al lwe prive.

E trwazyenmman, zot annan en lagreman an ekri ek propriyeter lakaz.

Ankor enn fwa pou nou fer sir, napa manboulouk, i annan *commitment*, i annan en dokiman ki nou kapab *link up* ek *SRC* eksetera, ki annan tou keksoz i transparan.

Les mwan azoute ki Polisi, i osi fer provizyon, pou sa servis vin aksesib pou bann dimoun ki pe fer renovasyon zot lakaz ase sibstansyel, oubyen rekonstriksyon zot lakaz ki dan en leta deplorab.

Dan sa sirkonstans kliyan i bezwen vin avek zot lagreman, lwe e osi zot kontra sinyen avek zot kontrakter. Enn fwa ki kliyan, i pas sa bann kriter de baz, zot ka i ganny evalye kot zot reveni le mwan, i ganny konpare ek zot depans.

I tre enportan, mon repete i tre enportan Mr Speaker pou note ki depans tel ki depans lopital prive, lekol prive, okenn form Lasirans Lavi, *loan* personnel, *loan* loto, eksetera, *package* televizyon peye, pa ganny konsidere koman depans dan nou evalyasyon.

E finalman Mr Speaker, pou trwazyenm pwen parti kestyon Onorab lo size konbyen, aplikasyon ki'n ganny konsidere. Mon konfirmen ki depi Me ziska Desanm 2021, nou'n travay lo 274 aplikasyon *part-rental*. E sa lannen 2022, sa de mwan ki'n pase, nou annan 50 ka ki nou pe travay lo la.

I annan bann ka ki deza bann ka lannen pase, i annan en trez, ou katorz nouvo ka. Mr Speaker, mon le soulinyen, ki Gouvernman atraver sa Komite Evalyasyon in vreman, strik dan legzekisyon sa Polisi.

Mon satisfte pou anonse ki Gouvernman pe akonplir lobzektiv pou koup labi, e fer sir ki nou depans larzan *tax* ki nou

travayer i kontribye, dan en fason responsab. Mersi Mr Speaker.

MR SPEAKER

Mersi. Siplemanter Onorab Labonte?

HON ANDY LABONTE

Mersi Minis pou ou larepons. Zis en pti klarifikasyon, petet si ou ti annan sa lenformasyon. Konbyen total ki zot in gannyen? Konbyen ki'n rezete? Konbyen ki'n ganny aprouve? Minis si ou ti kapab donn nou sa lenformasyon. Mersi.

MR SPEAKER

Mersi Minis. Ou annan sa lenformasyon?

MINISTER BILLY RANGASAMY

Dan sa 274 ka. 145 ka ki anviron 53,54 pousan ti ganny aprouve. 112 ka ki pa ti ganny aprouve, e i annan 16 ka ki pe fini ganny determinen la an Desanm 2021. Mersi Mr Speaker.

MR SPEAKER

Mersi Minis. Onorab Pillay siplemanter?

HON SEBASTIEN PILLAY

Mersi Mr Speaker. E mersi. Bonn apre midi Minis ek ou

delegasyon dan Lasanble. E mon le swet en labyenveni spesyal ou *PS* ki en madanm. E byensir swet tou madanm ki pe debourye, pe travay dir en bonn fet madanm.

E mon demande ki zot kontinyen zot zefor, pou kontinyen fer nou pei vin en pli meyer landrwa pou nou viv.

Mr Speaker, mon kestyon pou Minis sa size *part-rental*, i en size, ki'n monte dan plizyer diskour e mwan menm mwan personnelman mon'n koz lo la.

E si in ariv devan Lasanble, i bezwen annan en *issue*, en konsern. Premyerman kestyon pou Minis se akoz ki i Minister Finans, ki pe *Chair* sa Komite, e non pa Minister responsab pou, oubyen Departman responsab pou Labita?

E an relasyon avek sa size *part-rental*, bann depans ki ou'n mansyonnen, i bann diferan depans. Eski i par egzanp lannen pase par egzanp, bokou dimoun ti pe bezwen servi depans *internet* pou ed zot zanfan avek ledikasyon.

Eski sa depans, ti osi ganny *factored-in*, dan bann laplikasyon ki bann dimoun ti fer pou ganny en *part-rental*? E eski i posib alors, ki serten dimoun ki pa'n kalifye pou *part rental* zisteman, i akoz serten

depans ki zot ti pe fer ki ti neser, pandan sa letan, zot ti bezwen fer an plis. E sa pa'n permet zot kalifye pou en *part rental*?

E eski i annan posibilite, pou zot revwar e revizit serten aplikasyon ki'n ganny fer, lo baz kondisyon aktyel ki bann dimoun pe fer fas avek? Zisteman pri lavi, e bann lezot size ki pe afekte dimoun an zeneral.

E spesifikman lo English River, nou okouran ki i sipoze annan reparasyon ki sipoze ganny fer avek, bann flat English River. Eski par egzanp, dan bann landrwa kot ou annan bann zabitan ki pe reste dan bann landrwa.

Par egzanp la nou pe koz bann flat Union Vale, ki ler zot pou al rod en lot landrwa alternatif, sa osi i ganny *factored-in*, dan bann aplikasyon *part-rental* ki sa kategori dimoun ki tonm dan bann landrwa kot i annan bann redevlopman pe ganny fer, ler zot pe fer bann, bann analiz lo bann aplikasyon?

MR SPEAKER

Mersi Minis. Ou repons.

MINISTER **BILLY**
RANGASAMY

Mr Speaker.

MR SPEAKER

PS pou pran.

MINISTER **BILLY**
RANGASAMY

Wi mon pou donn PS pou reponn en bon parti sa kestyon. Epi mon azoute mon osi a lafen.

MR SPEAKER

Tre byen. PS ou annan laparol.

MINISTER **BILLY**
RANGASAMY

Mersi.

PS HOUSING DENIS BARBE

Thank you. Mr Speaker Onorab, mersi pou ou kestyon. Mon pou pran li lo sa enn dernyen. Onorab lo bann *repairs* lo bann flat.

Ler ou pou get Polisi, nou'n pran konsiderasyon bann ka parey, kot si i annan serten *repairs and maintenance*, ki bann dimoun i bezwen fer sirtou lo bann flat ki pou Gouvernman, pe *lease* avek zot, si zot lo en *rental*.

Nou akonpany zot, e nou donn zot lasistans pou *part-rental*, si nou pe vwar poudir bann renovasyon i *minor*.

Dan ka kot bann renovasyon i ase *extensive*, la nou servi en pti pe bann fasilite ki Gouvernman i annan, pou

nou kapab donn zot lozman, pou sa peryod letan ler nou pe fer sa bann renovasyon.

A sa ki konsern, akoz ki Minister Finans ki Chair sa komite? Nou ti anvi, si oule annan en disiplin ki vin avek, lo en nivo laspe finans. Akoz parey ou kapab vwar, nou pe fer li baze lo en *assessment socio-economic*.

Savedir nou pe get enn pti pe sa laspe sosyal. Wi akoz sa kliyan i bezwen sa lasistans. Me selman, lasistans *in terms of assessment* si pou donner *or not*. I pirman en legzersis ekonomik kot nou get depans konpare avek *income*, ki sa dimoun i anmennen.

E ler ou annan bann partener ki lo la, an menm tan ki ganny *Chair* par Minister Finans, e zot konnen ki lanvlop Bidze. E ki vin avek, e zot annan akse avek bann diferan lenformasyon koman *Chairman* zot kapab, si oule servi en pti pe plis zot *muscle* pou zot ganny akse avek sa bann lenformasyon pou nou bann kliyan respektif.

Wi depans *internet* i enkli, *as part of* bann ki nou *allow* bann kliyan *submit*. Si ou pou get dan *Policy document* li menm li, nou'n met en *capping* lo la *maximum*. Kot nou *facilitate* en pti pe bann paran

kouver en pti pe depans ki zot bezwen fer pou ankouraz ledikasyon zot bann zanfan, pou servi *internet*. Sirtou dan sa bann laspe ki zot ti pe travay, zot ti pe lekol dan lakour.

An sa ki konsern, baze lo sityasyon aktyel, nou pe fer revi. Nou'n ariv enn pti pe dan 9mwan lenplimantasyon program. E nou'n frenm, nou'n frenm, kalandriye travay lo lannen pase. Nou pou vwar kantite pe kout nou, e le mwan.

E an menm tan li avek nou Bidze, nou pe gete egzaktman an relasyon avek bann sityasyon ki pe devlope, ki mannyer nou kapab, si oule *slack* enn pti pe.

Si Bidze i permet e si, sa lapros ki nou pe pran si pou soutenab dan en peryod letan. So nou pe fer sa legzersis, nou pe swete kekfwa dan mwan Avril nou pou kapab *come back* avek en serten rezilta, baze lo sa. *Thank you*.

MR SPEAKER

Mersi. Minis ou ti pou azout keksoz la oubyen a pli tar.

MINISTER **BILLY** **RANGASAMY**

Mr Speaker mon ava azoute mon osi. E mersi bokou. Mersi PS ou'n fer byen ou leksplikasyon. I en legzersis ki

mon'n demann komite pou revwar osi, mon le zis refer sa pwen. Sirtou bann *borderline cases* ki nou ti pe gannnen.

E prenon kont, *challenges* ki nou annan deor lo sityasyon ekonomik eksetera. E parey *PS* in fer resorti, mon'n donn zot en *delay* letan pou zot *tackle* sa pou nou vwar.

E si nou annan serten lazistaz pou fer, nou ava fer li, dan en fason ki responsab osi. Selman nou pou bezwen fer li, pou nou soulaz presyon kot nou kapab. Mersi Mr Speaker.

MR SPEAKER

Mersi mon annan ankor de Manm ki'n lev lanmen, mon pou regard letan. Mon a regarde, Onorab Cosgrow.

HON WALLACE COSGROW

Mersi Mr Speaker. Minis mon kestyon, vi ki nou lo *part-rental*. Mon kestyon i, konbyen zot in bidzete pou sa lannen pou asiste pep avek *part-rental*?

Konbyen ki *maximum amount* ki en kliyan, en dimoun ki vin kot Minister i kapab ganny *allocate* ek *part-rental*?

Mon dir sa aköz zot ava rapel ki, lannen pase Gouvernman ti *allocate* enn pti pe plis ki 3.5milyon, pou sa lannen, sa lannen ki nou ladan

pou ki bann Minis i kapab lwe en lakaz. E, sa i 3.5milyon.

So mon ti a kontan konnen konbyen ki bann Minis pe gannnen, nou konnen konbyen bann Minis pe gannnen.

Me konbyen ki'n ganny met a kote, pou Seselwa kapab ganny asiste avek *part rental*. Aköz i en pti pe dir la deor pou Seselwa. Mersi.

MR SPEAKER

Mersi Minis. Nou a reponn ou kestyon lo *part-rental* silvouple. Ale. Minis.

MINISTER

BILLY

RANGASAMY

Mersi Mr Speaker. Lo size Bidze pou *part-rental* pou sa lannen. I 12miyon, R12milyon ekivalan anviron 1milyon tou le mwan. Polisi ti vreman, parey mon pe dir ti annan en, ti kler ti annan, pa mal labi. E nou'n *tightened up* sa parey mon ti fer resorti.

Sirtou bann, kolizyon kontrakter eskiz mwan, lokater ek propriyeter. So nou'n pli anfersi lo la. Nou pe, reget keksoz byen. Me selman i en Bidze R12milyon, ki anviron 1milyon par mwan.

Mon a les *PS* Barbe adres lezot pwen, Onorab. *Thank you*.

MR SPEAKER

Fer vit. *PS*.

PS HOUSING DENIS BARBE

Mersi Mr Speaker. O maksimonm Onorab. Maksimonm ki nou asiste en dimoun, i R7000 par mwan.

Nou bezwen osi en pti pe pridan dan nou lapros kot nou bezwen mazinen sa benefis ki pe donn sa kliyan, nou pou anvi ki i soulaz li.

Me selman i pa neserman toultan sa i leka. Nou bezwen osi fer sir poudir ler nou pe donn en asistans sekter prive, pe osi fer son pri monte. So se pour sa ki sa bann, mezir avek lentansyon e i ed nou si oule get enn pti pe ki mannyer nou fer sa lentervansyon.

E si i annan nesosite parey nou'n dir kot nou pou fer serten revi. Nou bezwen get lenpak. Menm si Minister Finans in met sa 12milyon a kote. I kler ki dan milye lannen nou bezwen fer en pti pe revi, baze lo sa ki nou pe anmase. Pou nou kapab gete egzaktman si nou pou kontinyen lo sa, lo sa *trajectoire*.

E mon anvi zis *remind* Lasanble atraver ou Mr Speaker, poudir sif 12milyon, ti en *safety net* ki baze lo, lakantite ki ASP ti pe peye an parlan Desanm 2021. Ler program ti avek zot, *sorry* 2020.

So sa in koman en gidans. Me i pa neserman ki nou pou reste lo sa *trajectoire* 1milyon par mwan, ki i enn pti pe pa soutenab. *Thank you*.

MR SPEAKER

Mersi. Onorab Uranie.

HON ROCKY URANIE

Mersi Mr Speaker. Bonnfet bann madanm isi dan Lasanble. Bonn fet madanm travayer Lasanble, bonnfet tou Seselwa e prensipalman bann madanm Zil Pros.

Mon kestyon *Minister*, konbyen letan ki *part-rental* i ganny donneren? Ki kriter e prosedir termin *part-rental*.

E vi ki zot dir i annan bokou ka, i annan ka depi lannen pase, konbyen fwa ki Komite i zwenn, si i annan en kalandriye spesyal ki zwenn, oubyen si zot ki bezwen sinyal komite poudir la zot bezwen zwenn akoz i annan bokou *case pending*? Mersi.

MR SPEAKER

Mersi. Minis si mon pa tronpe, kriter in deza ganny kouper alor annou pas lo la. Me ou a pran son lezot pwen silvouple. Akoz nou'n ariv apepre, ler pou terminen. Minis.

Mr Speaker, wi. I byen parey ou'n fer dir, tou bann

kriter mon eksplike oparavan. Me parey mon dir, mon personnelman mon asize lo sa komite pou rezon prensipal ki mon pa le, lenfliyans sa komite dan nenport fason, i pa neserer.

Me selman PS Barbe i asiz lo sa Komite. E mon santi i dan en bon pozisyon, pou li eksplik en pe ki bann frekans kan nou zwenn eksetera. PS Barbe, *over to you*.

MR SPEAKER

PS ou a eksplike *please*.

PS HOUSING DENIS BARBE

Mr Speaker Komite i sey son mye pou li zwenn tou le de semenn. Savedir, dan en mwan nou zwenn *at least* de fwa. E Onorab, ler ou get kantite ka ki'n vin kot nou, nou annan zis 16 ka *from* lannen pas ki ankor *still pending*.

Sa i annan plizyer rezon ki vin avek. *Either* kliyan pa'n donn tou zot lenformasyon, detaye. Ouswa i annan bann ka siplemanter ki Komite i demande, pou kliyan *provide* sa lenformasyon ki toultan, pa toultan kekfwa ki kliyan i *get back to* nou.

So sa i zis sa 16 ka. Solman tou larestan ka, nou trete, nou pran en desizyon e nou enform kliyan. Anliny avek

bann kriter ki nou'n soulinyen ozordi.

MR SPEAKER

Mersi. Wi pwen klarifikasyon Onorab.

HON ROCKY URANIE

Mersi Mr Speaker. Mon ti pe demann kriter pou plito pou termin lasistans. Mersi.

PS HOUSING DENIS BARBE

Avek ou permisyon Mr Speaker. Sa lasistans i en lakonpanyman ziska ler sa bann dimoun i ganny solisyon permanan.

Me selman si zot sityasyon finansyel, i *improve* e nou vwar poudir zot kapab soutenir zot *rent* ouswa zot bouz dan en *cheaper rent*.

La Komite ler i fer son evalyasyon baze lo sa evalyasyon finansyel. Si nou vwar poudir zot kapab. La nou terminen. Selman ler nou aprouv, *part-rental* i pou en peryod 6mwan. E apre sa 6 mwan nou fer en revi lo sa ka. I pa vin en otomatik, en *renewal* otomatik. Mersi.

MR SPEAKER

Mersi PS. Nou a termin sa sesyon kestyon la. Nou remersye, Minis ek son *panel* pou zot repos. Mon remersi bann Manm pou zot kestyon.

Mon zis ti a kontan anons bann Manm, ki nou'n planifye en rankont travay avek Minis pou demen apre midi 4er.

Si nou kapab *hopefully* termin nou program pou demen. E sa i pou en diskisyon enteraktif avek bann Manm lo serten pwen, ki Minis i anvi konsilte zot.

E sa pou ganny fer dan *Members Lounge*. Minis ek delegasyon mon a swet zot bonn apre midi, e bonn kontinyasyon. Nou a rebran travay 2er. Mersi.

(BREAK)

MR SPEAKER

Bonn apre midi tou Manm Onorab. Manm *staff* e nou piblik ki pe swiv nou.

Bon nou'n, Lasanble pou ekout en *Statement* par Minister Finans Naadir Hassan. Madanm raporter mon ava demann ou pou apel Minis.

Bon, bonn apre midi e byenveni Minis Naadir Hassan, Minis pou Finans, Plan Ekonomik e Komers.

Mr Patrick Payet Sekreter Deta dan sa Minister. E Ms Caroline Abel, Gouverner Labank Santral Sesel.

Minis e son delegasyon i avek nou pou li prezant en *Statement* lo lenplikasyon lager

Ikrenn lo nou pei. E sirtou lo nou lekonomi.

Minis mon ava donn ou laparol.

MINISTER NAADIR HASSAN

Mersi Mr Speaker. Mr Speaker, Onorab Dirizan Lopozisyon, Onorab Dirizan Zafer Gouvernman dan Lasanble, Tou bann Manm Onorab, Tou bann dimoun a lekout, bonn apre midi.

Mr Speaker pou komanse mon oule dir tou bann madanm dan Sesel, e sirtou bann dan mon Minister, en bonnfet madanm ozordi.

Nou rekonnèt e apresye bokou zot kontribisyon ki zot fer dan nou sosyete. Mon dir zot en gro mersi.

Mr Speaker, apre 2an ki lemonn in fer fas avek pandemik *COVID-19*, kot lekonomi mondyal enkli Sesel ti'n vremen ganny afekte. Nou ti pe komans war amelyorasyon remarkab dan nou lekonomi e sityasyon finansyel.

Zis pou donn en de sif pou sa 2 premye mwan lannen, an sa ki konsern larive touris, e kantite deviz etranzer ki'n pas dan nou sistenm.

A lafen Fevriye, Biro Statistik Nasyonal ti'n rikord 48 mil 508 touris ki ti'n vin Sesel. En tre gran logmantasyon

konpare avek menm peryod an 2021 ler ti annan zis 1551 touris ki ti'n vin Sesel.

Lakantite deviz ki ti'n ganny esanze lo marse domestik pou sa 2 premye mwan sa lannen, Zanvye e Fevriye ti en total \$130 milyon.

Sa i en logmantasyon konsiderab konpare avek selman \$68milyon ki ti ganny rikorde pou menm peryod lannen pase.

Sa devlopman in ede pou fer valer Roupi reste stab konpare avek bann lezot lanmonnen enternasyonal.

Annefe pou sa lannen 2022 ziska prezan valer Roupi konpar avek Dolar in vin pli bon marse par R2.49 an mwayenn konpare avek valer mwayenn pou lannen 2021.

Mr Speaker, parey zot in kapab konstata, lekonomi Sesel ti lo sa bon larout kot i ti'n komans rebran. E i ti pe menm komans akselere. Kot tou endikater ti pe montre ki nou ti pou depas nou bann prozeksyon pou lannen 2022.

Me Mr Speaker, tou sa bann bon endikater ti avan le 24 fevriye 2022. Ki'n arive le 24 Fevriye 2022? Ki'n fer pa zis nou, me lemonn re plonz dan lensertitid ekonomik e finansyel?

Sa i zour ki Larisi ti anvair son vwazen Ikrenn. Depi menm sa lager i deklare Prezidan Ramkalawan dan son mesaz lo Leta Lanasyon ki i ti delivre le 22 Fevriye, ti'n deza eksprim son lenkyetid lo sa kriz.

Akoz sa lensertitid Mr Speaker? Larisi i onzyenm pli gran lekonomi dan lemonn. I dezyenm pli gran prodikter karbiran dan lemonn. E i katriyenm pli gran prodikter dible dan lemonn.

Larisi i dezyenm pli gran eksportater lagrenn *Sunflower* ki servi pou prodwir delwil.

Parkont Ikrenn i senkyenm pli gran prodikter dible dan lemonn. I katriyenm pli gran eksportater mai dan lemonn. E sa pei osi i pli gran eksportater lagrenn *Sunflower* dan lemonn.

Ikrenn ek Larisi i osi de oli gran prodikter langre dan lemonn. Sa bann fe i ava ede met an konteks sa lenpak ki sa lager pe annan lo lekonomi mondyal ki ankor tre frazil aköz pandemik *COVID-19*.

Mr Speaker, dan sa 12 zour ki sa lager pe deroule, bann gran lekonomi mondyal, bann pei ki nou kapab dir i kontrol lekonomi lemonn, in enpoz plizyer sanksyon ekonomik tre sever kont Larisi.

Vwala en pe sa bann sanksyon. Zot in blok bann kont Labank Santral Ris. Ki fer ki Gouvernman pa pe kapab fer bann tranzaksyon an deviz etranzer.

Serten labank Ris in nepli kapab servi sistenm peyman enternasyonal 'swift' pou fer peyman nimerik. Ki vedir bann endividi e lakonpanyen Ris pou ganny difikilte pou fer peyman.

Lakonpanyen VISA ek Master Card in sispann zot loperasyon dan sa pei. Ki vedir bann Ris pa pou kapab fer tranzaksyon peyman an traver sa de sistenm.

Byen bann Ris enkli sa ki pou son Prezidan, serten bann Minis, e endividi ki ganny vwar koman zot annan lyen pros avek Gouvernman Larisi, pe ganny sezi.

Linyon Eropeen, Canada ek Leta Ini, in ferm son lespas aeryen avek Larisi. Lakonpanyen aeryen Ris Aeroflot, in depi ozordi le 8 Mars, sispann tou son vol enternasyonal. Aeroflot ti fer 3 vol direk isi par semenn.

Mr Speaker, nou espekte pou annan ankor plizyer lezot sanksyon lo Larisi, si sa lager i kontinyen deteryore.

Mr Speaker, ki reperkisyon sa kriz ek sanksyon lo lekonomi Sesel?

Minister Finans, Planifikasyon Ekonomik ek Komers in deza komans zwenn avek bann partner kle pou evalye e sirvey sa sityasyon de tre pros.

Mardi le 01 Mars mon ti diriz en rankont ki ti reprezantan Departman Tourizm, Labank Santral Sesel, SEYPEC, STC, SIB ek mon Minister.

En premye papye ti ganny prepare pou prezant avek Cabinet Merkredi le 2 Mars. Kot la sak bann partner ti prezant diferan senaryo e nouvo prozeksyon, prenon kont lenpak ki sa kriz ant Ikrenn ek Larisi pou anmennen.

Vwala serten senaryo ek konklizyon ki nou pe antisipe.

Pri komodite ki swa manze, karbiran e menm langre pou Sekter Lagrikiltir lo nivo mondyal pou monte. Ki an retour pou pous pri tou komodite isi pli o. Lenflasyon pou ogmante.

Pri transportasyon ki depi COVID in monte, i riske mont ankor.

Lensertitid aköz sa kriz i kapab dekouraz dimoun pou vwayaze. Pou annan lenteripsyon dan vwayaz, aköz

pri tiket avyon pou osi ogmante anvi pri karbiran ki li osi pe monte, pe monte menm.

Serten lenvestisman Ris isi i kapab ganny afekte an vi sanksyon ekonomik ek finansyel.

Akoz sa *ban* enpoze lo serten labank, serten labank Ris pou servi sistenm nimerik *SWIFT*, peyman par *card* par bann Ris ki isi pou kapab ganny bloke.

Sa sityasyon i agrav plis ankor la vi *VISA* ek *Master Card* in kennsel zot operasyon Larisi.

E lorganizasyon ki regroup bann pei ki prodwir karbiran, *OPEC*, ti anonse le 2 Mars ki pou lemoman i napa okenn plan pou ogmant prodiksyon, zis aköz sa kriz Ikrenn, Larisi.

Zis pou fer remarke ki yer Lendi le 7 Mars. Pri karbiran lo marse mondyal ti'n ariv \$139 en barik.

Mr Speaker sa bann senaryo pou anmenn bann lenpak negativ lo nou lekonomi. Parey mon'n fer sorti pli o lefe ki pri komodite lo nivo mondyal pe ogmante, depi son karbiran, manze e prodwir pou Sekter Lagrikiltir isi pou osi ogmante. Sa pou afekte lenflasyon.

Pou annan en bes dan serten stok komodite lo nivo

mondyal ki li osi pou enfliyans pri an vi demann.

Pri komodite pou osi ganny enfliyans par kou transportasyon ki li osi pe kontinyelman ogmante.

Sa vedit la i annan 2 faktor kle ki pe pou pri pli o ankor. Kou transportasyon e bes dan prodiksyon.

Larive tourizm ki ti tre prometan komansman lannen, pou desann.

Reveni ki Gouvernman i anmase atraver *tax* pou desann.

Dividend ki serten lakonpanyen paraetatik i pey Gouvernman, pou desann.

Pou annan en logmantasyon dan Lasistans Benefis Sosyal.

Serten lakonpanyen paraetatik pou kapab bezwen sipor finansyel.

Alor Mr Speaker, ki aksyon ki nou pe pran pou minimiz lenpak sa kriz sirtou lo nou popilasyon?

Nou rekonnèt ki sa kous popilasyon ki zot saler i pli ba, pou ganny tape plis.

Parey mon ti anonse dan Diskour Bidze 2022, i annan en travay pou anmenn reform dan Servis Lasistans Sosyal ki ti'n komanse. La aprezan Gouvernman pe akseler sa travay, avek bi pou fer sir ki

bann ki vremen bezwen sa lasistans ki gannyen.

Bann mezir pou pli byen targete. Gouvernman pe diskite e evalye bann diferan mezir ki'n ganny anonse.

Sirtou konsernan reform dan Fon Pansyon. Pli tar nou ava fer en deklarasyon lo sa size.

Gouvernman pe osi evalye sityasyon pou vwar posibilite en logmantasyon saler. Parey ti'n anonse dan Diskour Bidze.

Me sa mezir pou bezwen pran kont kontrent bidzeter ki nou ladan. An vi ki nou dan en reform ekonomik siporte par Fon Monnetter Enternasyonal.

Alors avek sa nouvo realite, Minister Finans, Planifikasyon Ekonomik ek Komers ansanm avek Labank Santral pe al komans diskisyon avek *IMF*, pou ki bann paramet ki nou'n tonm dakor dan lagreman inisyal pou sipor *IMF* pou program reform i elarzi.

Gouvernman pou bezwen li osi revwar son depans an vi ki son prozeksyon reveni i espekte redwir.

Depandan lo kantite letan ki sa kriz i ale. Nou pou bezwen pran en desizyon si pou servi nou rezerv pou ede sirtou pou aste komodite esansyel pou pei.

E Labank Santral Sesel ek mon Minister pou kontinyen

zwenn pou sirvey sityasyon lo nivo enternasyonal e nasyonal.

Pou konklir Mr Speaker, Sesel i form parti sa vilaz global. Menm si nou en pti zil dan milye en losean, nou depan antyerman lo lenportasyon.

Alor sa ki arive dan en lot pei sirtou ler bann gran pwisans mondyal i enplike, i annan en lenpak direk lo nou.

Si sa kriz pa terminen tre byento. E lemond pa retourn normal, kot sanksyon osi i ganny retire, nou pti pei Sesel pou ganny tape.

Dan sa moman difisil ki ranpli avek lensertitid, annou priyoritiz nou depan.

Nou konnen ki i annan en kous nou popilasyon ki zot sityasyon pou vin pli difisil ankor.

Pou sa Gouvernman pe al met bann mezir an plas pou donn zot sa sipor ki zot bezwen. Nou pou kontinyen reste a ler e pridan. E aksyon apropiye ava ganny pran ler i nesaser.

Nou pou reste angaze avek tou sektor pou donn lenformasyon kredib a sak letap letan i annan nouvo devlopman ki devlope dan nou pei.

Pou konklir Mr Speaker, parey pandemik *COVID-19* in montre nou, lensertitid dan lemond i vedir koman en pei,

nou bezwen pare pou depan plis lo nou lekòr.

Pou nou pti pei Sesel linite ek stabilite i primordyal. Alor mon oule fer en lapel avek tou Seselwa pou nou ini dan sa moman ki nou pei e lemonn pe pas atraver.

E annou kontinyen viv dan lespwar ki en zour sityasyon lemonn e dan nou lavi personnel ava retourn normal.

Mersi Mr Speaker.

MR SPEAKER

Mersi Minis. Nou pou pran en pe kestyon pou Minis pou eklersi pozisyon ki in met devan.

Mon remarke anba *Order* 38 (2), ki si nou le lezot manm *panel* partisip dan reponn kestyon nou bezwen *resolve* Lasanble dan en Komite.

E mon ti ava demann bann Manm si zot anvi ki lezot *panel* i partisipe, pou nou pran en Mosyon pou pas dan Staz Komite.

Okenn Manm? Okenn Manm ki ava met sa Mosyon? Onorab Georges.

HON BERNARD GEORGES

Mersi Mr Speaker. Bonn apre midi Minis. Bonn apre midi Gouverner. Bonn apre midi SS. Bonn apre midi tou bann dimoun ki pe ekout nou.

Mr Speaker, an vi ki mon sir ki serten Manm apre midi pou anvi poz kestyon pa selman avek Minis, me kekfwa avek Gouverner Labank Santral e avek Sekreter Deta ki la avek nou ozordi, mon *move* anba *Order* 38 (2) ki sa Lasanble i *resolve* pou antre dan en Staz Komite pou permet ki sa i arive silvouple. Mersi.

MR SPEAKER

Mersi. Mon ava ganny segonnman pou sa. Onorab Arissol.

HON SANDY ARISSOL

Mersi Mr Speaker. Bonn apre midi Minis avek bann envite. E bonn apre midi tou Manm.

Mr Speaker mon ti ava kontan segonn tou bann propozisyon fer par Onorab Georges *in regards to move* dan *Committee Stage*. Mersi.

MR SPEAKER

Mersi. Manm ki an faver sa Mosyon lev lanmen silvouple. Ok. Manm ki kont? Madanm Clerk.

Lo Mosyon pou Lasanble pas dan Staz Komite. 16 Manm in vot pour, 0 kont, e 10 in *abstain*.

Alor sa Mosyon in aprouve par Lasanble. E

Sergeant-at-Arms ou ava pas dan Staz Komite.

Bon mon ava kapab prezan pran kestyon bann Manm pou Minis ek son delegasyon. Onorab Gill i kapab komanse.

HON CHURCHILL GILL

Mersi Mr Chair. Bonn apre midi Minis ek ou delegasyon. Mon premye kestyon se Minis in fer nou konpran ki pou annan serten group dimoun ki pou bezwen ganny sipor. E Gouvernman i rekonnet sa.

Mon kestyon se eski Minis baze lo lenformasyon ki ou annan. Ki ou fek eksplik nou, ou kapab dir nou ki *timeframe* ki ou pe mazin, ou dir bann travay in ganny akselere lo kote bann lasistans.

Ki *timeframe* zot in donn zot lekore pou kapab pare baze lo lenformasyon ki ou annan? Sa premye.

Dezyenm ou'n dir nou poudir bann serten paramet pou bezwen revize. Mon kestyon eski paramet pou ganny revize selman avek *IMF*? Sa negosyasyon pou ganny fer selman ek *IMF* oubyen avek nou bann krediter osi?

Mon trwazyenm kestyon pou *Governor*. Eski *Governor* i kapab dir nou la, la ozordi *as we speak*, nou rezerv pou

konbyen letan i kapab tenir nou ozordi la? Mersi.

MR SPEAKER

Mersi Onorab Gill. Minis mon ava pas ou laparol premye. Apre Gouverner i ava kapab pran.

MINISTER NAADIR HASSAN

Mersi Mr Speaker. Mersi Onorab pou kestyon. Pou ou premye kestyon lo *timeframe*. Ler mon ti fer *Speech Bidze*, nou *timeframe* ti milye lannen. Savedir Zen.

Me definitivman avek bann sityasyon ki pe vin pli serye, nou pa pou kapab esper eskan Zen. So, la nou deza Mars. E sa, i annan en *working group* ki annan Minister Finans, *Central Bank*, Lazans Proteksyon Sosyal, Departman *Social Affairs, Statistics Bureau*.

Diferan Lazans Gouvernman ki'n fini deza la pe fer sa louvraz. E zot in ganny demande pou zot akseler sa *timeframe*. Ki ti parey mon pe dir Zen.

So, mon antisipe *by* Avril, lafen Avril ki zot ava kapab fini fer sa louvraz e vin avek en rekomandasyon avek Gouvernman pou ki bann *proposal* ki pou met lo latab.

Proposal pou nou regard bann *weights*. Ok? Akoz ler pri komodite i monte ou bezwen

regard bann *weights*. E ki kantite soutyen ki ou anmenn pou dimoun.

Me osi regard osi en pe sa *process of applying* pou lasistans. Ki sa osi ou bezwen fer li en pe pli vit. *Ok?* Sa i bann keksoz pe regarde.

Konsernan paramet ki mon'n masyonnen pou revize. Si ou rapel, nou dan en Program *IMF* e *one* bann fondamantal dan en Program *IMF*, se pou sak lannen ou annan en *maximum* defisit. Ouswa *minimum* sirplis ki ou bezwen fer. *Ok?*

So pou sa lannen nou ti'n prozekte *still* pou fer en sirplis, en defisit. Me en defisit ki ti redwir konpare ek lannen pase. Me ki diskisyon ou bezwen al fer la, se vi ki reveni pou desann. Me depans li i riske ogmante, akoz ou bezwen donn plis lasistans dimoun. Ki prezan zot donn ou en lespas pou ou kapab fer en defisit ki en pe pli larz.

Me sa i en diskisyon ki osi annan en lenpak lo nou det. Akoz tou Program *IMF* son lobzektif *ultimate* se pou ou redwir ou det soutenableman.

Me la i en *issue of whether* ou kapab fer li dan sa dele letan, lannen ki zot in donn ou. Ouswa ou bezwen fer li *over* en letan en pe pli sa.

Me en keksoz ki nou, nou pou bezwen met lo latap se ki, sa kriz Larisi ek Ikrenn pa ti en *variable* ki ti dan *initial discussion*. I pa'n ti'n prozekte ki ti pou annan sa. Savedir sa i enpakte lo ou bann *forecast*.

Me sa i napa okenn lenpak lo bann lezot krediter. Akoz nou pa pe fer okenn *rescheduling of debt* sa. I zis senpleman pou donn nou lespas dan Bidze, pou nou kapab fer en pe bann mezir ki nou bezwen fer dan en letan kot i annan en lager.

Trwazyenm kestyon mon ava pas avek Gouverner. Mersi.

MR SPEAKER

Gouverner silvouple ou annan laparol.

GOVERNOR OF CENTRAL BANK CAROLINE ABEL

Bon apre midi tou Onorab. Mersi Mr Chair. Mersi Onorab pou ou kestyon. An term rezerv. Si pei i le enport tou sa ki i oule, ozordi avek sa rezerv ki nou annan, i pou fer nou 4 mwan.

Me nou Labank Santral parey zot okouran 2020 nou ti pran en lot lapros ki an vi lensertitid dan lemonn, pei i bezwen enport sa ki enportan.

E la nou koz sirtou karbiran, akoz i tous tou

keksoz. Manze e osi sa ki konsern lasante.

E si nou pran zis sa bann komodite parey, nou estimasyon an se moman i 15 mwan. Sa rezerv ki nou annan la, zis pou sa 3 kategori.

Me sa i an se moman. Akoz en konponan enportan ki nou bezwen pran kont, se sa pri karbiran ki pe monte preske toulezour.

So toulezour nou bezwen fer nouvo analiz pou regarde si nou ti pou servi sa rezerv kantite letan pou pran nou.

Se pran kont si i monte lakantite letan pou nou servi sa rezerv i redwir. So- Me an se moman i 15 mwan.

MR SPEAKER

Mersi. Wi Onorab ou ti ava kontan *follow-up* avek klarifikasyon. Onorab Gill.

HON CHURCHILL GILL

Mersi Minis. Mersi *Governor* pou ou larepons. Minis prezan baze lo larepons ki Gouverner in dir nou, e nou Lagreman avek *IMF*, si keksoz i deteryore, eski ou santi ki sa lespas ki ou pou sey al negosye ek *IMF*, i pou sel rekour petet ki i pou kapab redres keksoz?

Oubyen ou vwar poudir si keksoz devlop dan en fason ase alarman, pei pou vwar li i pou

bezwen andet son lekor plis? Mersi.

MR SPEAKER

Mersi Onorab Gill. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Sa sityasyon i enn ki mon kapab dir i *unprecedented*. In terms of, son *skill in terms of* lenpak en lager. *Ok*.

In deza annan plizyer lager dan lepase. Be sa enn i *involve* enn bann *superpower* dan lemonn. E i osi enn bann pei ki prodwir bokou, *in terms of supplies* pou lemonn. Si i *fuel*, i manze.

So son lenpak i ase sever. E osi bann sanksyon prezan ki'n ganny mete. I fer li vin pli sever lo lekonomi mondyal.

So sa diskisyon ki nou pe al fer, li i enn pou donn nou en pe *breathing space* mon kapab dir. Me si sityasyon i deteryore, konnen keksoz i vreman *fluid*. Eski i pou vin en lager antye Lerop? I pou reste Ikrenn?

Tou sa i bann faktor ki nou pa konnen ki mannyer pou devlope. Me selman nou, nou bezwen sirveye. E *as* keksoz i devlope pran bann mezir apropiye baze lo bann nouvo fe ki vin devan.

Me pou lemoman nou santi ki sa ki nou pe propoze dan sa sityasyon i ase. Me nou pa konnen ki arive pli devan. Mersi.

MR SPEAKER

Mersi Minis. Mon ava pran kestyon Onorab Philip Monthy.

HON PHILIP MONTHY

Mersi Mr Chair. Bonn apre midi Minis ek ou delegasyon. Bonn apre midi tou dimoun. E bonn fet tou bann madanm.

Minis bann desizyon ki'n ganny pran apre ki *COVID* ti tap nou, in ede pou lekonomi *bounce back*. *Ok?*

E la nou war nou, nou'n antre dan en lot kriz. So ki kantite ede ki sa bann reform in ede, pou nou kapab abzorbe sa enn kriz ki nou pe pas ladan la?

Dezyenm kestyon petet pou Gouverner, ki konsey ou annan pou donn nou pep la deor an ski konsern disiplin bidzeter kot lakour? Ki i ava ede kefwaw sowlaz en pe lenpak sa enn kriz ki nou ladan. Mersi.

MR SPEAKER

Mersi. Minis mon ava pas ou laparol premye.

MINISTER NAADIR HASSAN

Mersi Mr Speaker. Mersi Onorab pou ou kestyon.

Konnen, ler ou ganny tape ek en kriz ou abilite pou *sustain* ou lekor i baze lo ki ou lafors ki ou'n antre lo sa kriz ladan. *Ok.*

E si ou war poudir ki nou'n sorti dan en kriz *COVID*, ki ti enn bann kriz pli serye, e pou antre dan en lot kriz serye.

Bann mezir ki nou, nou'n pran ki mwan mon santi ozordi i met nou dan en sityasyon en pe pli for. Me pa *as for as* ki nou ti kapab akoz ou'n sorti dan en kriz pou al dan en lot.

The fact ki nou'n kapab stabiliz nou lekonomi, Re ouver li. Rekomans *build up* rezerv pei. Tousala i ozordi donn nou en pti pe plis sowlazman pou nou kapab *sustain* en lot kriz.

So mwan mon santi poudir *the fact* ki nou'n kapab bouz vit, re ouver pei lannen pase, e nou lekonomi in komans marse.

E bann reform fiskal ki'n ganny fer e monneter, sa osi in ede redwir det pei. Me osi grosi nou rezerv ki ozordi i donn nou en *buffer* pou nou kapab *sustain* en nouvo kriz.

Me sa i pa vedir ki nou dan sa pozisyon pli for. Akoz nou'n sorti dan en kriz pou al dan en lot. Mersi.

MR SPEAKER

Mersi. Gouverner Abel.

GOVERNOR OF CENTRAL BANK CAROLINE ABEL

Mersi Mr Chair. Mersi Onorab pou ou kestyon. Mesaz pou lapopilasyon i senp. Mon krwar ki ozordi nou la devan Lasanble se pou nou dir ek popilasyon poudir, i annan en realite en levennman enternasyonal ki serye.

E sa levennman pe annan konsekans lo nou lekonomi e nou finans. E an vi sa, nou bezwen et pridan lo resours ki nou annan koman en pei, koman en lakonpanyen, koman Gouvernman e koman en endividi.

E i osi enportan ki an vi sa realite pe tap, i pou tap pei for, e sirtou lo kote pri komodite. Nou rekonnèt poudir bann dimoun ki pli ba lo saler i bezwen en soutyen.

Me malgre sa soutyen i vini, nou *still* bezwen annan disiplin ki mannyer nou servi sa resours ki nou pe donner. Akoz sa resours ki nou annan i limite.

So disiplin, et pridan. E osi kontinyen swiv bann lenformasyon ki pe ganny donner. Akoz sa ki nou pou fer se ki piblik i ganny ase lenformasyon pou zot reste a zour.

E avek sa lenformasyon ki zot kapab pran bann

desizyon personnel. So i enportan ki pei an se moman i limit servi sa resours ki i annan. Ki kapab ed li dan sa traze ki nou pa konnen kan i pou fini.

E anmezir ki nou rod bann lezot sipor avek bann lezot partner e bann travay ki nou bezwen fer avek bann lenstitisyon enternasyonal.

MR SPEAKER

Mersi Gouverner Abel. Nou ava pran kestyon. Dan sa kote eskiz mon se Onorab Cosgrow ki ti'n lev lanmen? Wi.

HON WALLACE COSGROW

Mersi Mr Speaker. Bonn apre midi Minis, Gouverner and SS. Mr Speaker dan mon reponn lo *speech* Leta Lanasyon ki Prezidan ti fer.

Mon ti koz fortman lo 3 keksoz. Lo kou lavi, lo lapovrete, e lo 2, lorganizasyon ki mon santi i santral dan tousala. E ki zot devret petet pe fer plis pou pez en pti pe lo sok ki tou sa bann keksoz pe anmennen lo popilasyon.

E ozordi mon ti ava kontan - Minis in dir nou bann fakter eksteryer petet ki pe afekte kou lavi. E petet ki pe enpakte lo lapovrete.

Mon ti a kontan konnen ki egzaktaman zot pe fer, par egzanz pou donn lenportans

plis sa lalis komodite esansyel ki *STC* in toultan annan. E ki zot in mentenir bann pri.

Eski dan zot bann plan zot anvizaze reget sa lalis? Akoz ozordi *as we speak*, menm avan le 24, komodite esansyel pri in monte, i *fluctuate*.

E nou ganny leskiz ki komodite i vin par avyon. Ozordi nou pe trouv zonnyon R50 ekek. Disel R10. Lafarin menm si sa lafarin napa. So ki lanfaz zot pe mete lo sa lalis komodite esansyel ki dan sa bor i enportan stabiliz en pti pe lavi pep Seselwa?

Dezyenm Minis in koz lo *STC*. *Sorry* pa *STC*, lo *ASP*. Kot *ASP* mon santi i annan bann, mon konpran sa bi pou koup labi. Me solman mon santi i annan tro bokou birokrasi. E mon konnen zot konnen. I annan serten demars ki zot pe fer pou vwar, akoz pa pe ganny sitan kantite dimoun ki pe pran, ki pe vin rod lasistans sosyal.

Sa bann demann ki dimoun pe ganny demande la, i vin en fardo lo zot. Zot bezwen al labank al rod en isi, en laba. En pake zafer zot bezwen al rode.

So si nou pe anvizaze ki riske annan problemm lo nou sitwayen. Ki plan zot pe fer pou

soulaz en pti pe sa prosedir laplikasyon.

Pou ki si en dimoun avek tou sa bann problemm ekonomik ki nou pe anvizaze pe vini ou war li dan problemm, i kapab ganny ede a en dele letan pli kourt silvouple, silvouple. Mersi Mr Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Sa *issue* ki ou'n leve lo *essential commodities*, mon krwar i en size enteresan.

E i en size ki ase konpleks. Akoz *STC* li i bezwen get enn, se ki *ensure the available of those products*. Me osi son *affordability*. *Ok?*

Now, i annan en kantite fakter ki a zwe. Enn, ozordi i annan bato akoz i annan *shortages of containers*, bato i *bypass* Sesel. I pa vini Sesel li.

I kapab vin lo son retour ki pas Sesel. Savedir komodite i kapab fer al Moris, al lo bout Lafrik, Sid Afrik apre retournen.

Sa i kree sa *shortages* ki nou war. Me i osi annan problemm pou ganny *container*. Pou ganny marsandiz.

Dezyenm, avek lager ki'n deklare. E tou dimoun i le *stock*

up la. Tou dimoun pe le *stock up*. E an se moman *even availability* i vin en problemn.

So tou sa bann konplikasyon i vin ladan. So i pa en *issue* fasil pou dil avek. Lot *issue* ki *STC in fail* se *storage* pou *essential commodities*.

Nou pa'n investir ase larzan dan *storage for dry goods* e *cold storage*. Ozordi, ou pa kapab fer vini 6 mwan 8 mwan lafarin. Akoz ou pou met li dan en *store*, lapli pou, delo pou koule dan *roof*. I pou gat tou ou lafarin.

Ou pa kapab fer vini zonnyon, ponmdeter pou 6 mwan, 8 mwan, akoz *cold storage facility* pa bon.

Annefe la nou pe fek pe diskite pou *set up* en nouvo *cold storage facility* pou *STC*. Nou ti'n komans sa diskisyon even avan kriz ti'n deklare.

Me pou *set up* en *whole cold storage facility*, i pran apepre 18 mwan. Problemn se ki nou napa ase *storage* pou donn sa sekirite.

So, nou bezwen fer lezot demars avek bann *suppliers* ki kapab *supply* nou *frequently*. So, *the issue* i pa zis en *issue* of *pri*. Me en *issue of availability*. Ki pli enpotan ankor.

So lo kote *STC* mon pe zwenn ek zot tou le semenn.

Pou nou ganny bann Lagreman ek bann *supplier*. E regarde lo kote *shipping* sirtou avek *Dubai*, ki mannyer zot kapab *supply* nou pli *frequently*. Akoz nou pa kapab *store*. Napa *storage facility*. Pou gate keksoz.

Dezyenm keksoz ki mon anvi mansyonnen, annou get sa sistenm *subsidies* ki egziste ozordi. Ler nou *subsidize* zonnyon, delwil, i *subsidize* tou dimoun. *Ok*.

Savedir en lotel ki li i pe fer profi i pe aste *at a subsidize rate*. E lekel ki pe pey sa *subsidies*? Se *tax payers ultimately*.

So sa metod *of subsidy* nou bezwen regarde. Akoz *subsidies* i sipoze *targeted* ant sa dimoun ki li i pa kapab *afford*.

En lot legzanp annou get *pri gas*. *Pri gas* tou dimoun i ganny *subsidize* *pri gas* ki *SEYPEC* i donnen. Menm en lotel i ganny *subsidize*.

Eski i normal? Mwan mon santi poudir *subsidy* i devret *targeted at those* ki bezwen. Akoz sansan ou pe *subsidize* en antite ki li i pe fer gro profi lo sa *subsidies*.

Gouvernman i pou sey *as much as possible* pou *buffer* sa bann *price increases*. Me ler ou get *pri* ki kantite pe monte, *there is only so much subsidies*

ki Gouvernman ki kapab *sustain*.

Savedir nou bezwen ed sa bann *through the Welfare* ki li i pli bezwen sa led. Sanmenm sa nou dir sa *targeted welfare*. Ki li i ganny asiste. *Ok?*

Ou dezyenm kestyon lo kote *ASP*. Wi parey mon ti'n mansyonnen nou pe regard plizyer laspe lo kote *weights*, lo kote prosedir.

Me prosedir, menm prosedir ki pe ganny enplimante ozordi? I *the same* prosedir ki'n la li. Napa naryen ki'n sanze dan prosedir.

E mon dakor avek ou. Nou bezwen senplifye sa bann prosedir. Me i pa bann prosedir nouvo ki sa ladministrasyon in mete. Prosedir ti *still* la li. *Ok*.

Napa. Mon konfirman ek ou, napa prosedir adisyonnèl ki'n ganny mete. *So*, mon *full* dakor avek ou Onorab ki nou bezwen senplifye bann prosedir.

E sa i enn bann keksoz ki mon'n demann bann teknisyen ki pe travay lo sa legzersis pou zot adrese. Mersi.

MR SPEAKER

Wi vitman klarifikasyon silvouple. Nou annan plizyer Manm ki pe atann Onorab Cosgrow.

HON WALLACE COSGROW

Wi mon dakor Mr Speaker. Mersi pou *allow* mwan Mr Speaker. Mr Speaker mon ti zis anvi dir Minis. Dan bann demars ki zot pe fer, si zot kapab silvouple, akoz in dir zot le siport bann *SOEs*.

STC en *SOE*, si zot kapab silvouple met serten kantite larzan akote. Larzan dabor ki nou dir nou'n anmas en kantite.

Met serten kantite larzan akote pou en peryod letan. Pa pe dir pou eternite, pou en peryod letan akoz nou rekonnèt i annan en sityasyon difisil pou *anchor* en pti pe sa pri komodite debaz.

Se tou. Pou en peryod letan fer serten kalkilasyon. Pa pou mwan, pa pou dimoun ki annan larzan. Me selman pou dimoun ki pa kapab *afford*. Mersi bokou Mr Speaker.

MR SPEAKER

Ok Onorab Cosgrow Mersi. Minis ou anvi *respond*. Wi.

MINISTER NAADIR HASSAN

Wi. Mersi Mr Speaker. Wi Onorab kekfwa mon pa antyerman dakor. Parey mon'n dir ou. Mwan mon krwar led i bezwen al avek sa bann ki napa.

Nou pa kapab donn led en lotel, en *shiphandler* ki li i pe fer *massive profit* lo *subsidies tax payers money*. Mersi.

MR SPEAKER

Mersi. Mon ava pran kestyon Onorab Woodcock.

HON WAVEL WOODCOCK

Mersi Mr Speaker. Mr Chair. Minis mon kestyon i kot i konsern an vi sa lager Lerop avek Larisi, pandan letan COVID in *Eastern Europe* in vin en marse vremen enportan pou Sesel.

Annefe an Fevriye mon krwar lamazorite bann viziter ki sorti, pli gran kantite viziter ki nou gannyen i sorti Larisi.

E nou annan bann viziter ki sorti *Ukraine* e bann lezot pei dan *Eastern Europe*. Parey *Ukraine, Hungary, Poland* avek *Romania*.

Avek sa *influx* bann *refugees* ki pe sorti *Ukraine* pe antre dan sa bann pei, e an vi Larisi in fini perdi sa, in ganny tire lo sa *swift banking messaging system* -

e definitivman i pou annan en serten lenpak lo *arrival* ki nou pou gannyen lo avek bann *Russian* ki pe vin Sesel, ki pou annan en rediksyon.

E mon prezimen bann *Ukraine* osi nou pa pou ganny sa kantite *arrival* parey nou ti pe gannyen avan.

Eski zot pe espekte ouswa zot in fer *analysis*, ouswa zot in antre dan en konversasyon avek osi Minis pou *Tourism*, pou regarde en pti pe lenpak ki i pou annan *from the eastern block*.

E si zot pe espekte en gran nonm rediksyon. Pa neserman *Ukraine* ouswa *Russia*. Me osi avek lezot pei dan la rezyon parey *Poland, Ukraine, Hungary* eksetera.

Mon lot kestyon kot i konsern LNG. Larisi i katriyenm pli gran prodikter LNG *worldwide*. 40.4bilyon *cubic meters* i pe prodwir LNG.

E *fuel barrel* in monte in ariv \$130. Avek tou sa lenpak. *Obviously* tou prodiksyon pou monte. Leve i pa pou zis lokal, i pou enternasyonal.

Eski zot pe espekte en *rise* dan kou komodite ankor konmsi ki, *obviously* nou enport lamazorite keksoz selman nou pe espekte en *rise* ankor dan kou komodite Sesel? Enkli *cooking gas obviously LNG*.

Aprè finalman mon pou koz en pti pe lo *subsidy*. Mwan mon ti ava kontan ou eksplik nou *how far is it sustainable?*

Akoz mon konnen Gouvernman pe *subsidize* dan

plizyer landrwa, kou bis, *flight, fuel*, serten *basic commodities*, karbiran pou brile pou fer elektrisite.

Konmsi *how far is it sustainable?* Eski zot pe konsider tir en serten *subsidy?* Ouswa azout dan en lot fason. Ouswa pou fer dan en fason *means testing*. Konmsi si ou kapab donn nou en pti pe detay ki bann desizyon ki zot pe al pran? Mersi bokou.

MR SPEAKER

Mersi. Bann mank silvouple annou pa sey mobiliz, monopoliz tou kestyon. Mon annan plizyer Manm ki pe atann pou soz lo la.

Minis ou ava adres kestyon Onorab Woodcock.

MINISTER NAADIR HASSAN

Mersi Mr Speaker. Mersi Onorab pou ou kestyon. Lo ou premye kestyon *regarding* lenpak lo *arrival tourism*. Wi nou espekte i posibleman annan en lenpak.

Marse Ris i en marse ase enportan. Sirtou lannen pase e komansman sa lannen. E sa parey mon'n dir baze lo bann *events* ki'n arive, nou espekte poudir *numbers will go down significantly* pou marse Ris.

Me osi nouvo varyab ki nou annan la se pri karbiran. Ki

prezan enpakte lo pri avyon. E ler ou fer *long haul flight* Sesel, sa in en lenpak lo afordabilite dimoun pou vin Sesel.

Me ki Departman Tourizm pe regarde. Pou nou kontinyelman sa legzersis diversifye nou bann marse. E sa i en keksoz ki nou'n diskite semenn pase. E zot deza pe travay lo la.

Lo kote lenerzi, si mon'n konpran ou kestyon byen, ki son lenpak lo kou prodiksyon? Lenerzi i enn bann baz tou lezot kou ki vini.

So ler ou kou lenerzi i monte, tou lezot kou i *escalate from* sa. So definitivman nou antisipe poudir lezot keksoz pou annan *increase* ladan. Akoz ou labaz se tousala i servi en konponan lenerzi.

Ou dernyen kestyon lo kote *sustainability of subsidies*. Sa i en keksoz ase kompleks. Gouvernman i sey *subsidize* lo kantite ki i kapab *through* Bidze.

Annou get parey SPTC ki *still* ankor ganny *subsidies* avek Gouvernman pou *subsidize* bann pri tiket.

E STC pou lemoman ti pe *cross subsidize*. Serten prodwir i *subsidize* lezot. E sa i pou kontinyen.

Me i annan en pwen kot *even* sa i pa ase. E la kot li

Gouvernman i bezwen regarde si i pou kapab antre, e ed sa *subsidies* ki arive.

Be selman parey mon pe dir ou, pli nou *target subsidies*, pli i fer nou resours al pli lwen. Si ou pe *subsidize* antite ki li i pa *deserve* en *subsidy*. Then sa i kapab donn ou lespas pou ou kontinyen sa *subsidies* lo kote bann dimoun ki zot, zot vreman bezwen.

E la mon krwar osi sa reform *welfare*. Si ou ganny ou bout *welfare* byen. Sa bann dimoun ki *targeted* ladan zot kapab gannyen.

Be mwan mon pa an faver bann *broad subsidies* ki bann ki pa merite i gannyen. Mersi.

MR SPEAKER

Mersi. Nou a pran kestyon Onorab Ernesta.

HON PAUL ERNESTA

Mersi Mr Speaker. Mr Speaker, Minis, delegasyon, bann koleg Onorab, bonn apre midi, e tou dimoun a lekout.

Mr Speaker, Minis koriz mwan, mon'n tann li ou a krwar in dir pou annan serten lasistans osi pou bann Departman Paraetatik kote finansyel.

Koriz mwan si sa i korek lo la. E si sa i leka, lekel sa bann Departman ki pou neserman

ganny serten lasistans finansyel?

Apre in koz osi lo pou revwar bann depans ki Gouvernman i annan. Eski sa i pe koz lo kote *capital project* ki petet *now* an referans avek sa ki mon koleg Onorab in dir? Ki petet a permet anmenn plis lasistans pou nou bann dimoun ki en pe pli vilnerab, ki en pe pli dan bezwen? Mersi Me Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab. Onorab ou premye kestyon. Zis repet ou premye kestyon. Mon pa'n ganny li byen.

Arr *ok Ok*.

Lo kote *SOE's* parey mon pe dir nou bezwen get sa bann ki pe ganny *subsidies*. E la mon pe mazine *SPTC*. Sa i enn nou pe gete.

Akoz vi ki pri karbiran in mont signifikan e kou *SPTC* pou monte, *so obviously SPTC* i enn ki nou pou bezwen regarde lo kote *subsidies*.

Lo ou dezyenm kestyon revi Bidze, nou pe get li dan son totalite. *Ok*. Pa zis lo en serten laspe.

Parey nou kontan koz lo koman nou ganny en problem nou dir be annou koup *capital expenditure*. Me *capital expenditure* i *mean* nou pe koup lakaz. Nou pe koup semen. Nou pe koup bann keksoz ki ase enportan pou pei.

So nou bezwen balans byen. Savedir nou bezwen get li dan son totalite. Pa zis en konponan Bidze. Mersi.

MR SPEAKER

Mersi. Kestyon Onorab Larue.

HON FLORY LARUE

Bonn apre midi Minis ek ou delegasyon. Mr Chair, mon ti ava kontan demann mon premye kestyon avek Mrs Gouverner.

Lefe ki nou bann rezerv i an Dolar, e letan nou pe get mouvman la i pe arive, nou war Larisi pou servi sistenm ki Lasin pe servi pou fer bann *card payment*, pou servi bann sistenm peyman kart.

Sa i an relasyon avek bann sanksyon ki ganny mete. Kot ou war ki bann *swift sanctions* in pran plas. E zot pa pe kapab servi sa.

Nou vwar ki *India* osi pe mazin pou zwenn sa servis ki Lasin i donnen. E eski nou, nou annan okenn plan pou nou diversifye nou rezerv? Akoz nou

rezerv i an Dolar pou enkli bann lezot *currencies*. Ouswa bann *precious metals*?

Eski nou, nou annan okenn nide pou fer okenn sa bann keksoz?

E pou Minis mon ti ava kontan demann li, ki lefe dan mwens ki 2 semenn depi ler sa in komanse, nou vwar ki *fuel* in ariv \$139 en barik.

The highest ki i ti arive avan sa ti an 2008. Letan i ti tonm zis par anba sa \$50. Ki prozeksyon pei si sa pri i kontinyen monte at sa *rate* ki in monte la pou en barik?

Akoz nou konnen en letan ti annan en peryod napa. Kot nou ti napa larzan pou aste komodite. Ki lefe reel i kapab annan lo pei si en barik i mont \$150 la?

Konbyen tan nou pou kapab soutenir nou lekor? Mannyer, eksplik Seselwa ki mannyer nou lekonomi pou ete silvouple? Mersi.

MR SPEAKER

Mersi. Premye kestyon ti pou Gouverner Abel, alors nou ava komans avek li. Gouverner.

GOVERNOR OF CENTRAL BANK CAROLINE ABEL

Mersi Mr Chair. E mersi Onorab pou ou kestyon. Dan sa kestyon ki ou'n demande i annan de

laspe. Si mon kapab komans avek diversifikasyon rezerv.

Menm si ler nou pronons rezerv an Dolar an total, rezerv li menm i napa zis Dolar ladan. Nou annan *Euro*, en porsyon *Euro*. En porsyon Liv Sterlen. E nou osi annan en porsyon Larzan Sinwan.

Ler nou, tou le lannen nou bezwen asize evalye det pei, dan ki lanmonnen det pei i ganny peye. E osi komers.

So baze lo sa bann lenformasyon, nou bezwen annan bann diferan porsyon rezerv ki kouven sa bann depans ki pei i annan. So deza nou rezerv i dan diferan lamonnen.

Lo sa lot laspe ou kestyon kot bann Larisi pe komans mazin al servi sistenm Sinwan. Sa i *Union Pay*. Sa i zot sistenm kart.

Akoz parey Minis in dir dan son *Statement*. Avek *VISA* ek *Master Card* ki bezwen enplimant sanksyon ki'n ganny prononse, bann sitwayen Larisi ki annan *Card Master Card* oubyen *VISA*, Si zot an deor Larisi, zot pa kapab servi zot kart.

Parey en touris Ris ozordi Sesel i ti pou pey son lotel i annan en kart *VISA* oubyen *Master Card*, i pa kapab peye.

Akoz sa bann fasilite in ganny bloke.

So Larisi pe mazin zwenn sistenm Sinwan ki apel *Union Pay*, ki bann Ris si zot al an deor Larisi zot kapab servi sa sistenm Sinwan pou zot servi zot kart pou fer peyman aletranze.

Me sa i ankor en demars ki pa ankor abouti. Akoz Lasin osi i bezwen asize evalye ki sa i pou annan pou li. Akoz ki mannyer lemonn pou get li pe ed Larisi an vi sa lager *Ukraine*.

Me selman si demen en Ris i vin avek en kart *Union Pay* Sesel, i annan fasilite pou zot kapab servi sa kart Sesel. So nou deza pe servi sa kalite kart Sesel.

MR SPEAKER

Mersi Gouverner. Minis mon a pas kot ou.

MINISTER NAADIR HASSAN

Mersi Mr Speaker. Mersi Onorab pou ou kestyon. Zis mon i ava kontan azout e n bout lo sa ki Gouverner in dir konsernan *Union Pay*.

Even though zot kapab servi sa kart *Union Pay*, deryer sa tranzaksyon i annan en transfer banker ki bezwen arive.

Sa osi i pou vin en problemn. Akoz ki, sa labank

Sesel li ler in servi sa kart, i bezwen ganny en transfer larzan ler i annan en *settlement* lo sa kart.

Me i pa neserman fasil ozordi pou en labank Larisi fer sa transfer. *So even if you can use*, ou kapab servi *Union Pay*, i pou annan en difikilte lo kote *settlement* apre ki sa kart i ganny servi.

Me lo kestyon ki ou'n demann mwan *regarding* pri *fuel*. Mon krwar sa i en keksoz ki vremen fatig latet sa. Akoz si ou gete *from* Vandredi pou Lendi pou annan en *increase* \$20 en sel kou.

E kwa ki'n *spur* sa *increase*. Se ki in komans annan diskisyon sirtou lo kote Lanmerik pou li met en *export ban* lo *fuel*.

Mon konnen poudir Lerop i pa tro an faver, akoz sa i enpakte li. Me zis sa koze pou met en *export ban* lo *fuel supply* sorti Larisi, in vremen koz en panik. E fer ki pri in mont par \$20 dan en zour.

E si nou kontinyen war poudir i annan restriksyon lo *supply of fuel* sorti Larisi. E *OPEC* li i pa ogmant kapasite. Mon krwar poudir ki nou pou war pri i al dan en teritwar ki nou pa'n zanmen war dan listwar pri *fuel*.

E ki son lenpak lo Sesel? Enn, son lenpak direk lo kote pri ki nou pou war lo laponp. Pou sa prodwir ki pou mot vremen o.

Dezyenm, se kantite rezerv *foreign exchange* ki nou pou bezwen pou aste sa *fuel*. Akoz zis mazine *12 months ago* pri ti apepre \$60 en barik. La ozordi in ariv preski 140.

Be si i mont ziskan 200, nou bezwen plis Dolar. *So*, la mon krwar kot parey Gouverner in mansyonnen, nou bezwen vremen priyoritiz keksoz. Pou nou kapab ganny *basic supply* lo kote *fuel*.

E mwan mon zis priye ki sa kriz pa deteryore plis. Akoz sa i pou annan reperkisyon vremen serye lo pei. E bann reperkisyon ki totalman an deor kontrol en pei. Mersi.

MR SPEAKER

Mersi Minis. Nou ava pran kestyon Onorab Loze.

HON JOHAN LOZE

Mersi Mr Speaker. Mr Speaker, Minis dan son prezantasyon in koz lo bann paramet ki nou'n tonm dakor dan Lagreman inisyal avek *IMF*.

Minis ozordi i vin devan nou, i pe eksplik nou en sityasyon ki pe enpakte nou lekonomi. Be Lagreman inisyal

ki Minis in koz lo la avek *IMF*, i egalman enpakte nou lekonomi.

E Minis pa'n zanmen vin *brief* nou lo kwa ki li in tonm dakor avek *IMF* lo la. Sa i en sekre Deta.

So, mon ti le konnen si evantyeleman dan sa lapel pou linite ki Minis in lanse pou anmenn Lepep Seselwa ansanm, ki i ti kapab vini kominik klerman. Ki nou tou nou ti ava konnen kwa ki li ek *IMF* zot in tonm dakor lo la. Sa ti mon premye kestyon Mr Speaker.

Mon dezyenm kestyon. Mon anvi konnen si Gouvernman dizour, pou kapab sey anmenn en kanpany kominikasyon ase agresiv lo kestyon proteksyon sosya, l e lafason ki zot pe *move forward*?

Akoz Minis pou dir ou laverite. Ou Gouvernman napa en bon repitasyon lo kestyon proteksyon sosyal. Deza la ou pe dir nou poudir napa okenn bann nouvo soz ki'n ganny mete pou-

Be avan la, bann dimoun ki ti al demann lasistans sosyal, pa ti ganny demande pou zot al rod *Birth Certificate* tou dimoun ki reste dan zot *household*. Pou zot al tir enn anmennen. Pa ti egziste sa.

So klerman i annan nouvo demann ki pe ganny mete lo

dimoun. Mwan, *I want you to succeed going forward*. Alors mon ti ava kontan konnen si zot ti kapab kominik klerman.

E sa ki mon pe dir ou la, mon pa'n envante sa. Vis-Prezidan Afif ki ti dir nou sa an 2008, ki i pou enstal konfidans bezwen kominike. Bezwen dir dimoun, pou zot reganny konfyans dan sa ki ou, ou pe fer letan ou dan en prose reform.

So eski ou pou kapab fer sa. Akoz deza la ou'n mal komanse. Ou'n dir li poudir zonnyon, *tax payers* ki *subsidize*. Apre ou'n retournen ou'n koriz ou lekor ou. Ou'n realiz ou fot, ou'n dir *cross subsidization*.

Be *STC* pa'n zanmen *subsidize* marsandiz avek larzan *tax payers*. *I simply does not exist Minister*. Mon pa konnen kwa ki'n tant ou pou dir sa.

E finalman lo kestyon *capital projects*. Sa ki nou, nou pe sey dir *Minister*, si ou annan *capital projects*, se nou konnen ou annan.

Si ou annan *capital projects* ki kout *around* 70 milyon. Ou'n ganny ou en *pledge* \$2.7milyon avek *UAE*. Ou pa ankor ganny \$2.7 milyon. Ou pa kapab *make up* sa *shortfall*. Ou bezwen al kot

en *SOE* pou enn son *subsidy* fer sa pou ou.

Be zis dir li pa fer sa la pou lemoman. Pey mwan mon *dividend* avek sa larzan ki ou ti pe al met dan sa proze. Donn Gouvernman son *dividend*, i a *take care of* son sitwayen.

Dan plas fer en *capital project* ki ou napa larzan pou fer *Minister!* *Thank you very much.*

MR SPEAKER

Mersi Onorab Loze. Selman mon a *advise* bann Manm. Nou pe konsider lenpak lager *Ukraine* lo lekonomi Sesel.

Mon pa anvi ki nou antre dan lezot teritwar parey ki ti lagreman avek *IMF*. I annan en kantite keksoz ki nou kapab antre ladan.

So mon respekte kestyon Onorab Loze. Selman mon pe dir mon pou konpran si Minis i gard son larepons lo size ki konsern lager *Ukraine*. Mersi.

Mersi Minis ou annan laparol.

MINISTER NAADIR HASSAN

Mersi Mr Speaker. Nou ti pe al lo en bon laliny. Bann kestyon serye ti pe ganny demande. Me la mon war nou pe al en pe dan zonnyon, dan sa.

Me mon ti ava kontan reponn enn de kestyon - Enn de kestyon ki'n ganny - lo sa

program *IMF* kekfwa mon ava *remind* Onorab.

Mon ti vini dan Lasanble pou *brief*, me sa zour mon krwar lo zot kote zot ti pe *work from home* si mon rapel byen. So kekfwa sanmenm sa ou pa'n ganny sa *brief*.

(laughter)

MINISTER NAADIR HASSAN

Me mon kapab enform ou sa lagreman i lo *website IMF* tou. Mon kapab fer mon *PA* anvoy ou sa *link* ki ou ava ganny sa *whole* lagreman *IMF*. Akoz Gouvernman i transparan e in *allow IMF* pou *publish* sa lagreman lo son *website*.

Me parey Onorab i kontan dir, mwan mon koz lalang. Kekfwa Gouverner i la, SS Payet i la. Ou kapab menm demann zot, kekfwa ou krwar mon pe koz lalang.

Lo dezyenm kestyon lo kote *communication campaign* pou *ASP*. Wi mon krwar i en bon nide. E sa i osi keksoz ki mon'n met a laporte bann teknisyen ki pe travay lo sa reform.

Me ler ou mansyonnen ki sa Gouvernman i annan en move repitasyon. Sa Ladministrasyon. Mon krwar ou'n *mistake* lekel ladministrasyon ou pe koz lo la.

Akoz se ou ladministrasyon ler ou ti dan Gouvernman ki mon krwar i annan en move repitasyon lo kote *welfare*. Mersi.

(APPLAUSE)

MINISTER NAADIR HASSAN

Mon krwar mon'n adres en pe bann kestyon. Mersi.

MR SPEAKER

Mersi.

HON JOHAN LOZE

(Off-Mic)

MR SPEAKER

Onorab Loze eski ou annan en kestyon ki lo sityasyon lager *Ukraine* ek pei? Si ou annan – (Onorab Larue ou'n fini demann ou kestyon.)

HON JOHAN LOZE

(Off-Mic)

MR SPEAKER

Onorab Loze mon pe zis dir ou. *Statement* par en Minis i pa lokazyon pou angaz li dan en deba ki sa ki ti'n devret fer pou Lazans Proteksyon Sosyal oubyen lot keksoz.

Nou la pou ekout sa leksplikasyon. Byen? Ou annan en kestyon lo sa size?

Silvouple wi. Fer li vitman klarifikasyon.

HON JOHAN LOZE

Mersi pou ou gidans Mr Speaker. Mr Speaker mon rol i la koman reprezantatif anba la demokrasi Sesel, pou reprezant Lepep Seselwa. Mon pa pou reprezant *Ukraine*. Mr Speaker mon kestyon.....

MR SPEAKER

Mersi. Pa argimant avek mwan.

HON JOHAN LOZE

Non, non Mr Speaker mon pa pou zanmen reve fer en tel keksoz mwan.

MR SPEAKER

Ale.

HON JOHAN LOZE

Mr Speaker, mon kestyon. Minis in konpletman *avoid* sa bout kot mon'n dir li *ASP*. I pa'n adres sa bout poudir zot pe met bann nouvo demann lo dimoun.

E li in dir nou tou bann demann ti la oparavan. I annan ki nouvo. E Minis pe klerman koz lalang. I pe fer bann keksoz ki ...

(Mic switched off)

MR SPEAKER

Onorab mon pe demann ou
retract sa statement.

HON JOHAN LOZE

Mon *retract* 'lalang.'

MR SPEAKER

Mersi.

HON JOHAN LOZE

Minis in koz 'mansonz' Mr
Speaker. 'Mansonz', pa lalang.

MR SPEAKER

Tou lede Onorab.

HON JOHAN LOZE

Wi i.....

MR SPEAKER

Si ou pou *retract, retract*. Si ou
pa pou *retract* reste trankil.

HON JOHAN LOZE

I pa'n dir laverite. I pa'n dir
laverite Mr Speaker. Mon
retract.

MR SPEAKER

Mersi. Nou a pas lo lot.

(Off-Mic)

MR SPEAKER

Mon repet ankor Onorab Loze
in dir poudir i la pou
reprezantan. Koman
reprezantan lepep. Me selman
nou bezwen swiv regilasyon ki

nou menm nou'n mete ki
mannyer en sesyon Lasanble
pou deroule.

E *Standing Orders* i dir,
Statement par en Minis i pa en
lokazyon pou antre dan en deba
pou argimant lo en program.
Nou la pou ekout sa *Statement*
e konpran li. Mersi.

Onorab Mondon nou ava
ekout ou kestyon silvouple.

HON TERENCE MONDON

Mersi Mr Speaker. Mon kestyon
i al koumsa. I pa fer premye fwa
ki nou'n vwar ki i annan lager
dan sa rezyon. Mon krwar an
2014 ti deza annan en
lenvazyon ki Larisi ti fer.

Eski, kwa ki diferan sa
voyaz? Eski zot in fer en
konparezon avek sityasyon
2014 avek 2020, ki fer nou
ozordi pli dan en sityasyon pli
difisil?

Mon dezyenm kestyon i al
lo bann lezot alternativ ki zot
kapab eksplore, pou ed nou
popilasyon sirmont pli byen sa
lenpak lenflasyon.

Ou'n koz lo - ou'n donn
legzanp *subsidy*, eski i annan
ankor lezot mezir ki zot pe
analize ouswa pe reflexir lo la ki
kapab fer sa diferans pou nou
pep, sirtou nou bann dimoun ki
pli vilnerab dan sosyete? Mersi
Mr Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Lo kwa ki diferan sa voyaz se reaksyon lemonn. An 2014 ler Larisi ti *annexed Crimea*, reaksyon lemonn pa ti parey sa voyaz. E i sa reaksyon ki fer son konsekans vin pli grav. *Ok?*

Lo kote ki bann mezir pran. Parey mon'n mansyonnen dan mon *Statement*, ki bann landrwa ki nou bezwen kapab donn *subsidies*.

Sa revizyon lo kote *welfare* pou nou ogmant bann lasistans pou bann *different weights* dan alokasyon *welfare*, lo prosedir pou kapab *apply welfare*, sa i bann premye keksoz ki nou'n komans met an plas. Me parey mon pe dir, lenportans osi se lo kote *availability of essential item*. Sa osi i enportan.

E sa osi i en keksoz ki parey mon'n dir, i vin pli difisil. *Given* ki pe arive dan lemonn. E sa diskisyon ki pe arive ek *STC*, se pou zot prepare pou asire i annan *availability of supplies*.

E i annan bann diferan pwen ki *STC* in met devan Gouvernman, pou nou ed zot avek. Ki nou kapab ganny sa *consistency of supplies* pou pei. Mersi.

MR SPEAKER

Mersi Minis. Onorab William.

HON WAVEN WILLIAM

Mersi Mr Speaker. Bonn apre midi Minis avek ou lekip. Mon anvi demann avek Minis si i kapab konfirman ankor enn fwa sa legzersis ki pou tous bann saler pli ba, kan ki son Minister i espekte ki sa i konplete e vin kot Lasanble?

Mon dezyenm kestyon pou adrese avek Gouverner Labank Santral, par lefe nou konnen poudir letan i annan bann sityasyon ekonomik. Eski i pou annan en lefe osi dan lafason ki bann labank i *operate* enternman?

E finalman Mr Speaker, Minis apard sa bann mezir ki ou'n dir la lokalman nou pou pran, konmsi eski i annan lezot ki pou vini ankor?

Akoz baze lo bann dimoun ki ou'n dir ou'n koz avek, eski i pou annan bann lezot similarite avek bann lezot *stakeholders* ki mon vwar poudir i ase osi enportan?

Akoz sinon bann dimoun pa pou *onboard*. Mersi.

MR SPEAKER

Mersi. Minis ou ava reponn premye.

MINISTER NAADIR HASSAN

Mersi Mr Speaker. Mersi Onorab pou kestyon. Lo ou premye kestyon *regarding* sa *salary exercise*. Dan *Budget Speech* mon ti'n mansyonnen poudir sa pou dan sa lannen, pou pran lefe 2023.

Me la nou pe regarde baze lo bann devlopman ki pe arive, ki mannyer nou kapab fer li en pti pe pli boner. Sirtou pou tous popilasyon ki zot *income* i pli ba.

Me sa i pa en keksoz *straight forward*. Akoz parey mon'n mansyonnen nou dan en program ek *IMF*. E ler ou pe al donn en logmantasyon saler, sa i annan en lenpak direk lo Bidze.

E i afekte ou *primary balance*. Ou *primary balance basically* ou diferans ant ou depans ek ou *income* ki antre.

E sanmenm sa ki mwan mon dir i enportan pou nou kapab ganny en diskisyon ek *IMF*, pou nou kapab donn en pe plis lespas pou nou kapab pran en pe sa bann mezir.

Me sa i en diskisyon ki de kote, Gouvernman avek *IMF*. I pa en garanti ki zot osi zot pou aksepte. Akoz i annan diferan keksoz ki antre.

Me nou, nou largiman for ki nou pe al met devan, se ki lager Ikrenn pa ti en *variable* ki ler nou ti diskit program. I en

keksoz *unexpected* ki'n arive. E baze lo la nou devret kapab fer en diskisyon, pou nou gete ki mannyer nou aranz keksoz.

So sa i en keksoz ki diskisyon pe komanse sa mwan. E avek mon diskisyon ek *IMF* mwan prosen, sa osi i pou lo azanda avek zot.

Lo ou dezyenm kestyon *regarding* konsiltasyon. Sa i ti en premye konsiltasyon avek bann *primary stakeholders*. Prezan baze lo ki mannyer sityasyon pe devlope, *then* pou annan lezot konsiltasyon. Anmenn plis *stakeholder onboard*. Me sa ti en premye avek bann ki pli kritik.

Parey mon'n mansyonnen, Labank Santral, *STC*, *SEYPEC*, Tourizm, *that was initial meeting*.

Me *as* nou bouz devan, i ava annan plizyer lezot konsiltasyon, pou get diferan laspe ki bor sa kriz i tous pei. Mersi.

MR SPEAKER

Mersi Gouverner. Ou ti ava kontan pran kestyon ki'n ganny adrese pou ou?

GOVERNOR OF CENTRAL BANK CAROLINE ABEL

Mersi Mr Chair. Mersi Onorab. Petet si nou regard sistenm banker. Premye reaksyon se

bann labank pe depouy bann tranzaksyon ki pe pase.

Akoz nou konnen poudir i annan sa bann diferan sanksyon ki pe ganny mete aletranze. E nou bann labank Sesel, i bezwen fer sir poudir zot pe swiv sa bann direktiv ki'n ganny donneren.

E nou lo kote Labank Santral nou pe fer sir poudir sa lenformasyon pe ariv kot zot. E ki zot pe swiv sa.

E zot pe osi - yer nou ti annan *meeting* ek bann labank mazer, sirtou ki i annan bann tranzaksyon kart. E osi nou pran kont poudir bann touris Ris pe antre dan pei avek plis lanmonnen likid.

Akoz zot pa kapab servi bann lezot mwayen. E ki bann sistenm ki zot, zot pe met an plas, pou fer sir poudir zot pe ganny en konpran sa bann larzan.

E osi angaze avek bann biznes ki ou war zot dan sa bann sityasyon, kot zot pe bezwen aksepte *cash* aköz zot kliyan pe vin fer peyman dan sa fason.

So dan sa premye lenstans se sa travay entansif ki bann labank i bezwen fer sir poudir zot bann sistenm ki an plas i solid. E ki zot kapab *monitor* tou tranzaksyon ki pe antre, ki pe sorti.

E ki Sesel a nenport moman, pa pe met li dan en sityasyon kot nou war nou an defo avek bann direktiv ki lemonn pe donneren.

Me an menm tan avek lekonomi ki i kapab ganny afekte, bann biznes si zot war zot dan difikilte, si lakantite touris ki antre dan pei i redwir, e biznes i konmans war poudir i annan en ralanti dan aktivite, so sa i pou sa dezyenm letap kot labank i pou bezwen annan sa bann diskisyon. E zot konnen aköz zot in deza pas dan sityasyon *COVID-19*.

E sa lenformasyon pou vin kot nou. E Labank Santral li i ava pran bann desizyon apropiye, si i annan sipor ki pou ganny met an plas, pou siport lekonomi dan realite an mezir ki i kontinyelman devlope.

MR SPEAKER

Mersi Gouverner. Nou ava pran kestyon Onorab Pillay.

HON SEBASTIEN PILLAY

Mersi Mr Speaker. Bonn apre midi Minis. E bonn apre midi Gouverner. En lot madanm tre for dan nou sosyete. En lenspirasyon pou bann lezot madanm.

Mr Speaker, Minis in fer en *Statement* ase serye devan

Lasanble, ki annan diferan konponan teknik. Parey Gouverner i eksplike, bann rol ki bann lenstitisyon parey *FIU* i bezwen zwe.

Me osi en rol en pe pli *socioeconomic*. Ki bann lenstitisyon parey *ASP* e lezot i bezwen zwe.

E bann *MNA* lo tou lede kote latab;- par egzant bomaten nou'n tann *MNA LDS* anmenn Mosyon, anmenn kestyon lo size *part-rental*, ki zot konsidere koman i en probleman. I en *issue* pou dimoun.

So annan pa fer okenn ilizyon pou nou sey riye ouswa gognarde, ler nou pe koz lo probleman dimoun. Annou sey adres bann kestyon direk lo kwa ki Gouvernman pou fer tanzibman.

Dan son *Statement* Minis in dir nou plizyer keksoz. Me mon pa'n vremen tann bann serten pwen konkret ki mon ti ava kontan ganny serten plis lesplikasyon lo la.

E parey *Standing Order* i dir. Pou mwan *press the Minister for action*.

Premyerman, logmantasyon saler. Kan eski pou annan en logmantasyon saler? Eski i pou sa lannen parey Prezidan in fer nou krwar? Oubyen eski i pou 2023

parey ou menm Minis ti dir dan ou Diskour Bidze?

Si i pou sa lannen, eski Gouvernman i annan lentansyon vin avek en Bidze Siplemanter? I bezwen la deswit akoz sa probleman mannyer Minis in eksplike i serye.

E lekel bann bas saler ki pou ganny touse avek sa logmantasyon saler?

Dezyenman, an relasyon avek logmantasyon dan laz pansyon, e logmantasyon dan kontribisyon. Eski Gouvernman alors pou re vwar sa desizyon e *postpone* sa *proposal* pou annan sa bann logmantasyon an vi sityasyon ekonomik?

E lefe ki sa *age group* dimoun ki pou ganny afekte, i posib ki zot pou tonm dan sa group vilnerab. E alors sa desizyon ti ava meyer ganny *postpone*.

E Gouvernman i ava petet rod en lot fason pou *subsidize* sityasyon. Par met akote bann proze kapital ki petet a sa moman donner pei pa neserman bezwen al ladan. Zis parey Vis-Prezidan Afif ti fer an 2008, ler nou ti al dan reform ekonomik.

Mon trwazyenm kestyon i konsern *subsidies* pou bann *SOEs*. Ozordi ou annan dimoun par egzant. Mon annan en

madanm ki travay ki reste Sans Soucis. I dir mwan li i met R1000 lo son kart bis tou le mwan.

Ki fer dan en lannen i pou depans li apepre R12mil. *Ok*. E prezan pri karbiran Sid Afrik ozordi in ariv 40 *Rand*. Ekivalan R40isi. Pou lemoman en lit i ankor R22, R23 mon krwar. Si mon pa tronpe.

So eski Minis ler ou pe regard *subsidy* an relasyon avek *SPTC*. Eski pou annan en *targeted subsidy* pou bann dimoun ki bann *card holders SPTC* e ki bann travayer ki servi kart *SPTC* petet i kapab *subsidize* zot, 30 a 40 poursan. Menm 50poursan. Zot *cost of travel* pou zot al dan zot travay? E mon.....

MR SPEAKER

Konbyen kekyon ou annan la? Akoz, ou annan ankor enn? Akoz mon ti ava prefere les Minis pran sa 3 kekyon.

HON SEBASTIEN PILLAY

Ok mon ava swiv ou direksyon Minis i ava reponn sa 3 kekyon.

MR SPEAKER

Selman apre sa mon pou pas lo lezot Manm. E si nou annan letan nou ava tournen nou ava rebran lot kekyon.

HON SEBASTIEN PILLAY

Be *then* mon kapab demann sa enn dernyen la?

MR SPEAKER

Si i annan enn dernyen wi ale. Si enn dernyen met li ansanm nou a fini avek.

HON SEBASTIEN PILLAY

Mersi Mr Speaker. Mon dernyen kekyon i konsern *STC* e bann komodite esansyel parey lafarin, zonnyon, ponmdeter. Nou bezwen koz lo la akoz i en *issue* e i napa dan bann laboutik.

Eski Minis i kapab dir avek nou, Gouvernman eski in fer okenn analiz pou vwar, si i annan lezot faktor dan *STC* dan lafason ki i pe fer son program lenportasyon, ki pa pe permet li pou li asire ki sa bann komodite i la?

Malgre nou'n koz lo bann defayans dan *storage*. Akoz oparavan malgre ki Minis in kritik Gouvernman oparavan, Seselwa i a rapel ki in napa mankman lafarin, in napa mankman ponmdeter, in napa mankman zonnyon.

So sa i ava en kekyon pou Minis reponn.

(Off-Mic)

HON SEBASTIEN PILLAY

Relax relax!

MR SPEAKER

Minis ou a reponn kestyon silvouple.

MINISTER NAADIR HASSAN

Mersi Mr Speaker. Mersi Onorab pou ou bann kestyon. Premye kestyon lo kote saler. Wi mon ti anonse Bidze 2022, ki Gouvernman sa lannen pou fer en legzersis pou revwar saler. Be i pou pran lefe pou 2023.

Sa ti dan *Budget Speech* 2022. *Ok?* Me parey mon'n mansyonnen dan mon *Statement given* sa kriz ki'n vini, mwan mon bezwen, Minister Finans, *Central Bank* i bezwen dan sa program ki nou annan ek *IMF*, pou nou rod en pe lespas fiskal, pou nou kapab *afford* en *increment* dan *salaries*. *Ok?*

Sa i pa tou depan lo Gouvernman aköz nou annan en program avek *IMF*. Sa ki mon'n eksplike avan.

E sa diskisyon pe komanse. I annan bann diskisyon teknik ki'n komanse. E mwan menm mon pou fer diskisyon avek bann *High Level Officials at IMF*. Pou zot pran konsiderasyon ki pe arive avek kriz Ikrenn. Avek bann

konsekans bann lezot pei. E donn nou sa-

So mon pa kapab fer en komitman 100poursan. Me mon pe fer le meyer pou nou kapab fer sa. Sa mon premye repons.

Lo kote *increase in* bann *pension reform*. Ozordi i kler ki nou annan en problem grav dan Fon Pansyon. *Ok?*

SS mon ava fer li eksplike apre. Ki *by* 2034 san okenn aksyon, Fon Pansyon pou *collapse*. *Ok?* Mon konnen kekfwa pou bann politisyen sa i pa en problem.

Akoz nou, nou garanti en pansyon dan Bidze. Me pou sa Seselwa deor la li, ki li i pa garanti en Bidze, si Fon Pansyon i *collapse*, ki bor i pou ganny en pansyon?

Sa i en keksoz serye ki nou bezwen mazin lo la. Fon Pansyon i pa en keksoz pou fer politik lo la. Aköz i enpakte lo Seselwa. *Ok?*

So mon krwar nou bezwen fer konversasyon serye lo la.

So mwan mon konpran poudir ti annan sa 2 poursan avek *the increase in pension age*. *That was the two reform* ki Fon Pansyon in propoze ek Gouvernman. *Ok?*

E diskisyon ki nou pe fer la se ki mannyer ki nou kapab *mitigate* sa. Sirtou lo sa

increase lo contribution. Eski nou kapab sey fer li par faz?

Me si nou fer li par faz *at the same time* i enpakte pli devan. Akoz si i ti bezwen 2 poursan, eski si ou *delay* li plis la prezan i pou bezwen 3 poursan, 4 poursan.

Sa i bann analiz ki mon konnen SS ek son tim kot Fon Pansyon pe fer. E nou bezwen ganny larepons sa bann kestyon.

Me mon osi in tande sa *proposal* pou koup *capital budget* pou siport Fon Pansyon. I en *proposal* ki'n konfiz mwan en pe. Be kekfw mon a fer SS as sa teknisyen eksplike akoz nou pa kapab fer sa. *Ok* mon ava fer li eksplike.

Lo kote *subsidies for SOEs*, mon dakor avek ou. Mon dakor ki nou bezwen get tou diferan kou ki en dimoun i annan. Elektrisite, delo, *SPTC*, bis, e baze lo la pran bann *targeted measure* parey ou pe dir.

E sa egzakte man bann pwen ki mon'n met devan sa group ki pe travay lo sa bann reform *ASP*. Ki mannyer nou kapab fer sa bann keksoz *targeted*.

Ki i ava asiste sa dimoun ki vreman bezwen lasistans pou pey son bis. Vreman bezwen

lasistans pou pey son *Bill* elektrik.

E *once* ki sa legzersis i konplete, Minister responsab pou *ASP*, ava vin devan Lasanble. Nou ava fer en *Statement* lo bann mezir ki pou ganny pran.

Lo katriyenm kestyon kote *STC*, ki bann *challenges* ki egziste pou *STC*. Mon'n fini mon krwar mansyonn detrwa pwen. I annan serten fakter ki eksteryer. E i annan serten fakter ki enteryer.

Lo kote eksteryer, wi nou annan problem ek *freight*. Nou annan problem ek *supply*.

Lo kote enteryer wi nou annan defayans dan *procurement team* dan *STC*, ki zot bezwen *build* zot kapasite. *Ok*. Zot kapasite ki vreman feb. Zot bezwen *build* sa kapasite, pou zot kapab negosye ek *supplier*. *Manage* zot *inventory*.

Me pli gro problem pou *STC* se *storage*. Nou pa'n investir ase dan lenfrastruktir *STC*. Napa *adequate dry storage*. Napa *cold storage*. E tousala i pran letan.

STC mon konnen parey mon ti pe dir, ti pe propoze pou *invest* plizyer milyon de Dolar dan en *cold storage facility*. Me sa pou pare ankor dan 18 mwan.

Dry storage i annan en problem. En keksoz ki *STC* in enform mwan. Plizyer komodite ki ti ganny enporte ler *COVID* ti pe komanse, zot in bezwen zete. Akoz *storage* pa bon.

Vre nou ti *stock-up* nou. Me mazorite zot in bezwen *write-off*, zete, eski nou pou fer menm keksoz? Nou pa kapab!

E mon'n, e *STC* in dir mwan ki zot bezwen ganny en *good understanding* avek zot *supplier*, pou asire ki tou semenn, tou le de semenn zot pe ganny *supplies*.

Until nou kapab *sort out* sa problem *storage* ki nou kapab *store* lafarin pou 8 mwan. Zonnyon pou 6 mwan, ponmdeter. So sa i bann *challenge* Onorab. Mersi.

MR SPEAKER

Mersi. Eski SS Payet ou pe demann li pou adres kestyon *capital projects* la? SS wi.

SS PATRICK PAYET

Mersi Mr Chair. Mersi Onorab. Bonn apre midi tou Manm Onorab e tou dimoun ki a lekout.

Mr Chair, kekfwa mon ava komans premyerman lo kote Fon Pansyon. Parey mon konnen Fon Pansyon ti'n fer bokou bann *awareness*

program avek piblik. Menm *virtually*.

E si zot regard *data* ki Fon Pansyon baze lo *assessment* e baze lo demografi ki egziste ozordi, nou vwar ki 2022 bann dimoun, *statistics* i demontre 2022 i annan apepre 6,794 dimoun ki par lao 60an ki espekte pou *retire*, vi ki ou annan sa fleksibilite ozordi.

Me selman letan ou regard bann a lavenir; par egzant letan ou regard *by* 2025, sa i pou ogmante pou ariv preske 10, 650. 2030 i pou ariv 17mil.

E ozordi kekfwa ou annan apepre 10 a 11poursan ou popilasyon ki par lao 60an. Selman *by* 2035 koumsa i pou demontre ki *almost* ou pou annan 18 a 20poursan ou popilasyon.

So ou vwar ki demografi osi, striktir nou demografi pe zwe en gran rol letan *Actuary* i fer *assessment*.

Actually la mwan pase, letan Fon Pansyon in montre nou *data*, *members fund*, savedir larzan ki nou kolekte dan kontribisyon e larzan ki nou peye pou *retirement pension*, i dan defisit 6 milyon.

E sa i konmans *alarming* pou Fon pansyon. Akoz retar ki baze lo prozeksyon, depi lannen pase in sipoze komans son *under contribution rate* baze lo

sa *actual review* ki ti ganny fer an 2018.

Me retar ki i pe gannyen, e diskisyon la ki pe ganny fer se si ou *delay* li ankor, ki gravite sa ki pou annan.

E si lespas fiskal ou pou annan adisyonnel pou ou kapab donn sa *subsidy* Fon Pansyon?

So bokou analiz pe ganny fer, ki *at the end of the day* nou pou bezwen pran en desizyon lo la.

Dezyenman lo sa pwen *capital projects*. Parey zot konnen *capital* proze ki dan Bidze, e limitasyon Bidze ki nou ti annan lannen pase, ti napa en gran kantite nouvo proze ki pe ganny finanse domestik.

I annan bann nouvo proze ki pe ganny finansman *by Grant* ouswa *by loan*. Be selman larzan ki annan lenpak kekwfa direk, se *domestic financing*. Napa sa gran kantite.

Me i annan bokou bann proze ki'n deza komanse e ki ou'n fini siny bann lagreman avek bann kontrakter.

E pou ou al negosye pou *stop*, menm si larzan i dan Bidze, pou ou al *stop* li, i en bann negosyasyon ki ou kapab pey konpansasyon sa bann kontrakter.

E *secondly* parey zot konnen ki i annan bann proze

ki nou bezwen regard a lavenir letan nou fer *investment*. Akoz sa bann proze kekwfa i pou ed osi krwasans ki ou pou espekte dan le fitir.

Pa egzanp bann nouvo semen. Bann nouvo lenfrastruktir ki nou pe mete lo *Zone Industrial Estate*. Mon konnen lo kote proze kapital avek *PUC* ki dan Bidze.

E tousala i bann lenfrastruktir ki nou pe mete *for economic* devlopman le fitir, ki pou ed la krwasans. E pou nou, nou vwar ki letan nou pe fer sa bann analiz, souvandfwa kekwfa letan nou pe koup depans Gouvernman, nou vwar ki kekwfa lo kote *Capital* proze.

Me parey mon'n dir dan Bidze, i napa sa gran kantite *capital project* ki nou kapab koupe, akoz napa bokou nouvo dan Bidze.

Me dan analiz ki nou pe fer e diskisyon avek *IMF*, nou pe regard Bidze dan son totalite. I pa zis *capital projects*. Me sirtou dan *goods and services*.

Akoz mon konnen dan *goods and services* osi, i pou kapab annan lenpak lo komodite *prices*. Par egzanp pri *fuel*.

Aktyelman Gouvernman letan ou regard dan son Bidze, apepre R60milyon par lannen zis pou *fuel*.

Elektrisite apepre R144 milyon. E deza ou vwar ki i kapab annan presyon lo kote sa de laliny bidzeter. Si nou, nou pa asize pou nou revwar Bidze san son totalite.

So i bann diskisyon ki nou pou bezwen gannyen avek bann Minister, pou zot kapab revwar zot Bidze. An diskisyon pou nou kapab donn bann lezot *targeted welfare assistance*. Mersi Mr Chair.

MR SPEAKER

Mersi. Onorab Pillay permet mwan rekonnet en pe lezot Manm. *Point of order. Ki Order?*

HON SEBASTIEN PILLAY

Mersi Mr Chairman. Mon le koriz en *misapprehension* ki'n ganny fer. An relasyon avek en *statement* ki mon'n fer dan mon kestyon.

Sa i konsern *capital projects*. E mon'n fer kler ki i enportan ki Gouvernman regard sa an relasyon avek lapros ki ti ganny pran ...

MR SPEAKER

I pa en *point of order* Onorab. Ou pe koriz en *misapprehension*. Ok. Fer li vit silvouple. Wi.

HON SEBASTIEN PILLAY

Wi. Mersi. E sa ki mon le met devan Minis se ki, eski ou SS i kapab ed mon pou klarifye sa e dir nou, ki kantite poursantaz proze ki'n ganny konplete lo Bidze lannen pase?

Ki kantite ki pa ankor ganny konplete? E konbyen ki larzan pe ganny rann avek Gouvernman an relasyon avek bann proze, ki nou pe koz bann proze kapital?

E prezan an relasyon avek en lot size kot i konsern Fon Pansyon Minis. Mon konpran sa ki ou'n dir. Me eski ou okouran ki dan Lalwa Fon Pansyon i annan en *Clause* ki dir ki Gouvernman i kapab antre pou *provide subsidy* pou Fon Pansyon?

E sa ki mon ti pe demann ou an relasyon ek sa desizyon, se ki nou *postpone* sa desizyon *until* ki nou kapab etabli ki vre lenpak sa sityasyon *Ukraine* pou annan lo pep Seselwa.

Zisteman parey ou'n dir, akoz ou'n penn en portre ase serye sa sityasyon. E sa ki mon pe fer mwan se zis pou lager pou Seselwa la deor. Mersi Mr Chairman.

MR SPEAKER

Mersi. Minis ek SS zot ava not sa bann pwen silvouple. Mon pou prosede avek lezot dimoun ki lo mon lalis.

Onorab Romain.

HON GEORGE ROMAIN

Mersi Mr Speaker. Bonn apre midi Minis ek ou delegasyon. Mr Speaker mon premye kestyon mon ti ava kontan demann Minis, vi ki nou konnen parey ou'n dir ou menm pri karbiran pe kontiny, pou monte definitivman. E pri tiket avyon byensir pou monte. E nou konnen nou *National Airline* fek sorti dan en problemm kot nou'n ed li.

Be la nou konnen definitivman si sa i persiste i pou afekte li. Alors mon kestyon mon ti a kontan demann Minis.

Si sa sityasyon i kontinyen persiste, ki Gouvernman atraver Minister Finans pe mazin en pou fer pou ed *Air Seychelles* dan sa sityasyon? Sa mon premye kestyon.

Mon dezyenm kestyon i pou Gouverner. An vi letan *COVID* nou konnen ti annan en *shortage of* deviz etranzer dan Labank Komersyal. Byensir ti napa touris pe antre dan pei byensir in fer sa lenpak.

E mon konnen Gouverner ti asiste bann Labank Komersyal par pran en pe nou rezerv. Met dan Labank Komersyal. Vann Labank Komersyal en pe Dolar.

E sa letan sa sityasyon ti, mwan mon war li ti en pe diferan. Akoz bokou bann etranze ti'n fini kit pei. Zot pa ti dan Sesel. Me ozordi nou war bokou bann etranze in deza dan nou pei zot pe travay.

E si sa sityasyon i persiste, alors mon kestyon pou Gouverner, eski si ou deviz, i annan en deviz *shortage* dan Labank Komersyal, eski Labank Santral pe mazin pou fer en pe parey ki zot ti fer dan letan *COVID*? Mersi Mr Speaker.

MR SPEAKER

Mersi. Minis ou ava pran premye kestyon.

MINISTER NAADIR HASSAN

Mersi Mr Speaker. Mersi Onorab pou sa kestyon. Lo kote *Air Seychelles* mon pozisyon in toultan kler. *Air Seychelles* i bezwen *survive* lo li menm. E pou napa okenn lasistans adisyonnèl pou *Air Seychelles*.

Ozordi nou bezwen balanse. Eski nou pou donn lasistans *SPTC*, *PUC*, or *Air Seychelles*? E ler ou get *figures* kantite touris ki *Air Seychelles* pe anmenn Sesel, kestyon ki ou bezwen demande, eski priyorite se pou siport *Air Seychelles*, ouswa pou nou siport bann

lezot antite ki vremen enpakte plis lo Seselwa?

E mon krwar larepons i kler lo la, se priyorite Gouvernman pou nou siport sa bann SOEs ki annan en lenpak sosyal lo pep Seselwa.

Mon ava pas avek Gouverner pou dezyenm kestyon.

MR SPEAKER

Gouverner *yes*.

GOVERNOR OF CENTRAL BANK CAROLINE ABEL

Mersi Mr Chairman. Mersi Onorab pou kestyon. Labank Santral son rol se fer sir poudir marse deviz etranzer pe fonksyonnen.

E dan letan kot nou obzerve poudir i pa pe fonksyonnen dan fason ki i devret, la kot Labank Santral i analiz sa sityasyon. I regarde ki kantite deviz sistenm i bezwen.

E la i son responsabilite pou met deviz dan sistenm. E sa i en rol ki Labank Santral pou toultan fer. E sirtou dan bann moman kot lekonomi i war li dan difikilte, la kot rezerv dan mazorite ka i ganny servi.

So nou, nou pe an se moman nou pe kontinyelman swiv larealite ki mannyer i pe devlope. An se moman nou pa

war okenn difikilte dan marse deviz etranze.

Sa ki bezwen deviz etranze i kapab al kot son lenstitisyon e fer son tranzaksyon.

Me si nou war nou dan en moman difisil kot sityasyon i agrave, la Labank Santral i ava pran son desizyon pou siport marse.

MR SPEAKER

Mersi Gouverner. Mon annan 3 Manm ki reste lo mon lalis. Mon pou termin avek sa 3. Mon pa pe pran ankor non. Onorab Aglae ou kestyon.

HON EGBERT AGLAE

Mersi Mr Speaker. Bonn apre midi Minis. Minis dan enn bann larepons ou'n fer sorti poudir nou annan sa sityasyon stokaz.

Mon ti ava kontan petet demann ou, an vi ki nou war sityasyon pe al dan en kriz, petet ki lantant ki Minister Finans pe fer pou annan en dyalog sirtou ek sektor prive pou osi donn en koudmen.

Akoz zot osi zot pou depan lo sirviv sa lekonomi. Eski zot, zot pe pare pou annan en diskisyon avek ou pou ede ganny serten fasilite neserer, pou kapab ed pei, pou kapab-parey Gouverner in nonm sa 3 eleman enportan ;- karbiran, manze ek latizann. Sa i enn.

Dezyenm Minis, eski zot pe mazin tous nou rezim *tax* la ki sityasyon. Akoz boner sa, mon krwar lannen pase, ti annan serten reform dan *tax*. Serten lanons ki ti ganny fer.

Petet ki pozisyon lo sa size, anvi ki la nou pe mazin menm petet donn n logmantasyon dan saler? Enn.

E osi vi ki Bidze nou pe *run* lo en defisit. E Gouvernman pe war li pe *raise* bann diferan *bonds* ek *means* finansyel pou kapab ganny en *Budget support*.

Ki lefe osi sa zot pe mazine i kapab anmennen, sirtou atraver sa bann *bond* ki zot in *issue* e bann led ki petet a lavenir ki nou'n resevwar? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Lo premye kestyon mon krwar i en pwen vreman enportan. E sa i en keksoz ki wi Gouvernman i kapab diskite avek sekter prive.

Ou konnen dan en letan kot lemonn i lo *brink* lo en lager kot menm i annan i dir i kapab annan en trwazyenm lager mondyal.

Mon krwar nou tou nou bezwen met lanmen ansanm, Gouvernman, sekter prive, ki mannyer nou kapab adres bann problemm pei.

So mon ava komans en diskisyon avek Lasanm Komers ki reprezant bann sekter prive, pou gete ki mannyer nou kapab met lanmen ansanm e ede pou nou rezourd en pe bann diferan *challenge* ki nou annan.

Lo ou dezyenm pwen *Tax Regime Review*. Pou lemoman napa okenn plan pou revir *tax* rezim. Apart bann ki'n ganny anonse. I annan en louvraz lo kote *reviewing the system VAT*. Me sa i ti en keksoz ki ti la *even* depi avan. I pa en keksoz nouvo. E i ava *follow* son *normal course*. So pou lemoman napa okenn *review* lo kote *tax*.

Lo kote Bidze ou'n mansyonn spesifikman lo kote *bond*. Bann *bonds issued* i *part of normal cash flow management* Gouvernman.

Akoz i annan bann det ki *retire*. I annan nouvo det ki ganny *issue*. So sa bann det ki'n ganny *issue* la napa naryen pou fer avek sityasyon la. Me i ti en *normal process* dan nou *cash flow management*.

In terms of nou *borrowing plan*. Savedir i keksoz ki ti'n deza antisipe pou arive. *Ok*.

Pou lemoman *until* nou *get full* lenpak bidzeter, ki tim SS pe fer. Nou pa pou dan en pozisyon pou dir ki mannyer sa pou enpakte lo *future borrowing*. Me sa i en keksoz ki ava ganny *work out in the next few weeks and months*. Mersi.

MR SPEAKER

Mersi Minis. Onorab Bistoquet.

HON ROSIE BISTOQUET

Mersi Mr Speaker. Bonn apre midi Minis ek ou delegasyon. Bonn apre midi tou Onorab. Mon annan en senp kestyon Minis. Mon pa konnen if i pou *fit* dan sa sityasyon sirtou dan sa sityasyon lager.

Eski i annan posibilite pou Gouvernman Sesel eksplor bann Korperasyon Sid-Sid avek lezot pei dan la rezyon. Espesyalman letan i annan pou fer avek lenportasyon bann *freight, sea freight*.

Pou kapab annan en lenportasyon an group ki petet i ava redwir en pe bann kou depans sirtou lo lenportasyon manze ouswa lezot keksoz pou larezyon. Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Wi sa i tou bann diskisyon ki nou pe fer avek sirtou *STC*, ki mannyer nou kapab premye parey mon'n dir *ensure* ki nou ganny. Konmsi i annan *supply* i vin dan pei.

E dezyenm ki nou kapab ganny li a en pri meyer marse kantmenm pri pe monte mondyalman. So sa i bann louvraz ki *STC* pe fer. Mersi.

MR SPEAKER

Thank you, Minis. Onorab Georges.

HON BERNARD GEORGES

Mersi Mr Chair. Mr Chair mon ti ava kontan premyerman remersye Minis, Gouverner avek Sekreter Deta, pou vin devan nou boner, dan sa kriz - pou alert nou boner dan sa kriz pou alert nou ki pou annan.

Nou bezwen espekte ki pou annan. ki pou annan bann konsekans advers avek sa lager Ikrenn. Donk mersi pou sa.

E mon konsyan ki personn pa kapab konnen ki pou arive. I tre probab ki, anfen i posib ki lager i kapab arete demen.

I posib ki i ava en lager parey Minis in dir ki pou antrenn Lerop an antye. E i posib ki nou pou *end-up* ek en

lager nikleer kot nou, nou pou asiz isi nou pou esper lefe radyasyon ariv kot nou.

Nou pa konnen. Nou pa konnen. E nou bezwen priye ki premye *rather than* dernyen ant sa 3 posibilite i arive.

Antretan i byen ki sa lekip ki la devan nou, in vin alert nou lo lefe ki pri pou monte. E i annan en serten kategori dimoun ki pou vwar li difisil an fonksyon sa, pou fer de bout zwenn.

E vin anons serten keksoz ki pou ganny fer. Serten Polisi ki pou ganny met an plas pou ed sa bann dimoun. E donk si mon'n konpran byen. I annan 3 keksoz ki nou kapab ekspekte;

Enn se, avek pri ki pou monte pou annan plis proteksyon pou kous sosyete ki pli vilnerab.

Pou annan probableman en logmantasyon saler pou ede konbat sa pri ki pe monte.

E i pou annan en rediksyon dan bann proze kapital ki pou ganny fer. E mon mazine ki mon 16 lakaz anler Mamelles pa pou ganny fer sa lannen. Nou ava bezwen esper ankor en pti pe plis.

Sa ki mon ti ava kontan *panel* i edik nou en pe lo la ozordi, se al en pe pli lwen ki sa bann program imedya ki zot in koz lo ozordi. E eksplik nou en

pti pe ki *Policy* Gouvernman oubyen Labank Santral, lo 2 keksoz.

Enn se, ki nou bezwen koman en pep fer sa ki Gouverner i demann nou toultan. E sa se redwir konsonmasyon dan en fason imedya.

Pa al kot *STC* pou fer *hoarding* me pou redwir lo en baz endividyel, sa ki nou konsonmen pou ki sa ki la deza lo bann letazer i kapab *last* en pe pli lontan.

E dezyenmman, ki mezir Gouvernman i pe mazine. En pti pe parey dan lepok *COVID* pou prodwir bokou plis lokalman. Pou pa depann lo lenportasyon otan ki posib dan sa bann moman kriz. Mersi Mr Chair.

MR SPEAKER

Byen mon ava envit Minis donn son larepons. Apre kekfwat Gouverner i a kapab azoute.

MINISTER NAADIR HASSAN

Mersi Mr Speaker. Mersi Onorab pou kestyon. Mon ava adres dezyenm bout kestyon lo kote prodiksyon lokal. E mon mazine Gouverner ou ava adres lo kote sa mesaz lo redwir *consumption*. Ki mon konnen i en mesaz ki ou pe pase *for the last two years*.

Lo kote prodiksyon lokal, mon krwar nou'n war poudir ki apre COVID in annan en kantite *increase* dan prodiksyon lokal.

Ou menm ou pase o bor semen, ou war en kantite prodwir lokal fri legim pe vann. So mon krwar Seselwa in gannyen sa mesaz, se ki i enportan pou nou *increase* nou *food security*. Ok?

So i sa *awareness* ki in enportan pou sa arive. Me lo kote Gouvernman li osi nou bezwen *in terms of* met bann Polisi an plas ki ankouraz sa prodiksyon. E sa mon krwar in fini komans arive. Ok?

Si ou get parey ozordi lo *animal feed*. Gouvernman i ankor pe *subsidize animal feed*. So sa i ede fer li *sustainable* pou prodwir poul, *pork*, lokalman.

Me nou osi bezwen ankouraz bann fermye pou *improve zot yield* e prodiksyon. So bann nouvo metod. E sa i *requires investment*.

E si ou gete avek Labank Devlopman, *threshold assistance* pou Sekter Lagrikiltir in *increase*.

Akoz in *increase* se ki mannyer nou ganny bann pti, pti oubyen bann *medium size* fermye pou zot kapab vin lo en pli gro lanpler.

So tousala i bann lasistans ki pe ganny mete. E

ki nou war. E *figure* ki'n montre pou 2021 ki mon ti prezante dan Bidze, se prodiksyon poul, prodiksyon *pork* in ogmante dan Sesel. Ok? Be nou bezwen kontinyen.

Mon konnen lo kote *Coetivy* i annan en gran proze pou *increase* prodiksyon pou *supply local market*.

So tousala dan son totalite, i bann mezir ki Gouvernman pe met an plas pou li ogmant prodiksyon lokal. E sa i enportan enn - pou nou *food security*.

Me dezyenm osi, *even* dan letan normal, i ava ede ki *foreign exchange* i ganny *spend* pou enporte i ava redwir.

So sa i enn bann priyorite Gouvernman bouz devan. Mersi.

MR SPEAKER

Mersi Minis. Gouverner.

GOVERNOR OF CENTRAL BANK CAROLINE ABEL

Mersi Mr Chairman. E mersi Onorab pou sa komanter. Mon krwar lo nou kote e ansanm avek Minister Finans, i enportan ki ozordi nou'n vini nou'n met ater devan Lasanble piblik an zeneral realite bann levennman ki pe arive dan lemond. E ki son bann

konsekans. Ekonomik ek finansyel.

Akoz kontinyelman donn piblik sa lenformasyon, nou lekspektasyon se ki dan fitir lapopilasyon i vin rezilyan, par reazir lo ki mannyer zot fer keksoz.

So pou nou mesaz i kontinyelman ki koman en pei, koman en endividi nou bezwen kontinyelman reget nou depans.

Akoz si mou pa fer li e nou kontinyen fer keksoz dan menm fason, nou realite dan en moman difisil, nou pou war poudir pei i pou kwense akoz i pou napa resours pou li kapab ed tou dimoun.

Akoz an se moman nou'n dir poudir lenflasyon pou monte, dimoun pou ganny afekte. Gouvernman i bezwen al rod resours pou li aport en soutyen lapopilasyon.

So anmezir ki nou tou nou reazir, anvi sityasyon ekonomik, i ed Gouvernman pou kapab met resours dan landrwa kot i devret mete.

So nou bezwen kontinyelman pran kont poudir larealite ekonomik i annan letan ki pou bon. I annan letan ki i pou pli difisil. E dan sa de letan, i annan fason ki nou reazir. So sa mesaz zeneral.

MR SPEAKER

Mersi Gouverner. Mon krwar ou parol i en konklizyon ase apropiye pou sa prezantasyon ki nou'n annan ozordi. Nou'n termin avek bann kestyon. E nou ava repas dan Staz Lasanble pou nou ferm deba pou ozordi.

I reste pou mwan dir Minis ek Gouverner, ek Sekreter Deta mersi pou zot partisipasyon. Lefe ki zot in vin devan nou ozordi, mon krwar in demontre ki kantite serye zot pran sa serye.

E ki nou osi nou bezwen pran li avek bokou serye. Mon ava swet zot bon kouraz dan zot travay. Zot ki bezwen diriz sa repons ki pei i bezwen donner. E mon ava swet zot bonn rantre. E mon ava war zot dan Lasanble *à la prochaine*.

Nou ava *adjourn* pou ozordi. Mon konnen bann madanm i annan en rankont avek Anbasader Franse. Mon swet zot bonn kontinyasyon. E nou ava rebran travay demen bomaten 9er. *Adjourn*.

(ADJOURNMENT)

